

欽定唐書

卷一百

土岐文庫

文庫17

W202

28

天

30

25

20

15

10

文庫 17
W202
28

唐書卷一百九十九

宋 端 明 殿 學 士 宋 祁 撰

列傳第一百二十四

儒學中

郎餘令定州新樂人祖穎字楚之與兄蔚之俱有名隋大業中為尚書民曹郎蔚之位左丞煬帝語稱二郎武德時楚之以大理卿封常山郡公與李綱陳叔達定律令持節諭山東為竇建德所獲脅以白刃終不屈賊平以老乞身諡曰平餘令博於學擢進士第授霍王元軌府參軍事從父知年亦為王友元軌每曰郎家二賢皆入府不意培塿而松柏為林也徙幽州錄事參軍有為浮屠者積薪自焚長史裴斐率官屬將觀焉餘令曰人好生惡死情也彼違蔑教義反其所欲公當察之母輕往嗟試廉按果得其姦孝敬在東宮餘令以梁元帝有孝德傳更撰後傳數十篇獻太子太子嗟重改著作佐郎卒

兄餘慶為吏清而刻於法高宗時為萬年令道無撓遺累遷御史中丞務謙謹下人引御史坐與議論吏部侍郎楊思立倨貴視選者不以禮餘慶劾免其官久之出為蘇州刺史坐累下遷交州都督驩州司馬裴敬敷與餘慶雅故以事笞餘慶婢父婢方嬖譖敬敷死獄中又哀貧無藝民詣闕訴之使者十輩臨按

乾隆四年校刊 唐書卷一百九十九列傳

昭和六十年二月一日贈
土岐羊吉氏寄

010185193786

餘慶謾調不能得其情最後廣州都督陳善弘按之餘慶自恃在朝廷久明法令輕善弘不置對善弘怒曰舞文弄法吾不及君今日以天子命治君吾力有餘矣欲撻械之餘慶懼服罪高宗詔放瓊州會赦當還朝廷惡其暴徙春州始餘慶治萬年父知運嫌其酷將杖之餘慶避免父歎曰國家用之矣吾尚奈何又為御史中丞復歎曰郎氏危矣以憂死餘慶卒以貪殘廢

徐齊聃字將道湖州長城人世客馮翊梁慈源侯整四世孫八歲能文太宗召試賜所佩金削刀舉弘文生調曹王府參軍高宗時為潞王府文學崇文館學士侍皇太子講修書于芳林門時姑為帝婕妤嫌以恩進故求出為桃林令召為沛王侍讀再遷司議郎皆不就累進西臺舍人咸亨初詔突厥酋長子弟得事東宮齊聃上書諫以為旣喪冒頓之裔解辨削在使在左右非所謂恭慎威儀以近有德任官惟賢才左右惟其人之義又長孫無忌以讒死家廟毀頓齊聃言於帝曰齊獻公陛下外祖雖後嗣有罪不宜毀及先廟今周忠孝公廟反崇飾踰制恐非所以示海內帝寤有詔復獻公官以無忌孫延主其祀齊聃善文誥帝愛之令侍皇太子及諸王屬文以職樞劇許間日一至坐漏禁中事貶蘄州司馬又流欽州卒年四十四睿宗時贈禮部尚書子堅

堅字元固幼有敏性沛王聞其名召見授紙為賦異之十四而孤及壯寬厚長者舉秀才及第為汾州參

軍事遷萬年主簿天授三年上言書有五聽令有三覆慮失情也比犯大逆詔使者勘當得實輒決人命

至重萬有一不實欲訴無由以就赤族豈不痛哉此不足檢下之姦亂適長使人威福耳臣請如令覆奏則死者無恨又古者罰不逮嗣故卻芮亂國而缺升諸朝嵇康蒙戮而紹死於難則於它親不復致疑今選部廣責逆人親屬至無服者尚數十條且詔書與逆同堂親不任京畿總麻親不得侍衛臣請如詔書外一切不禁以申曠蕩聖厯中東都留守楊再思王方慶共引為判官方慶善禮學嘗就質疑晦堅為申釋常得所未聞屬文典厚再思每目為鳳閣舍人樣與徐彥伯劉知幾張說與修三教珠英時張昌宗李嶠總領彌年不下筆堅與說專意譏綜條彙粗立諸儒因之乃成書累遷給事中封慈源縣子中宗怒章月將欲即斬之堅奏盛夏生長請須秋乃決時申救者亦眾得以撈死俄以禮部侍郎為修文館學士睿宗即位授太子左庶子兼崇文館學士修史進東海郡公遷黃門侍郎時監察御史李知古兵擊姚州海河蠻降之又請築城使輸賦徭堅議蠻夷驕靡以屬不宜與中國同法恐勞師遠伐益不償損不聽詔知古發劍南兵築城堡列州縣知古因是欲誅其豪酋入子女為奴婢蠻懼殺知古相率潰叛姚嶠路閉不通者數年初太平公主用事武攸暨屢邀請堅堅不許又以妻岑義女弟固辭機密轉太子詹事曰吾非求高逃禍耳義敗不染於惡出為絳州刺史數外徙久乃遷祕書監左散騎常侍玄宗改麗正書院為集

賢院以堅充學士副張說知院事帝大酺集賢幔舍在百司上說令揭大榜以侈其寵堅見遽命撤之曰君子烏取多尙人從上泰山以參定儀典加光祿大夫堅於典故多所諳識凡七當讓次高選卒年七十餘帝悼惜遣使就弔贈太子少保諡曰文齊聘姑爲太宗充容仲爲高宗婕妤皆明圖史議者以堅父子如漢班氏

子嶠字巨山開元中爲駕部員外郎集賢院直學士遷中書舍人內供奉河南尹封慈源縣公父子相次爲學士自祖及孫三世爲中書舍人

沈伯儀湖州吳興人武后時爲太子右諭德初太常少卿韋萬石議明堂大享事上言鄭玄說祀五天帝王肅謂祀五行帝貞觀禮從玄至顯慶禮祀昊天上帝乾封詔書祀五天帝兼祀昊天上帝詔書從貞觀禮儀鳳初詔祀事一用周制今應何樂高宗乃詔尙書省集諸儒議未能定於是大享參用貞觀顯慶二禮垂拱元年成均助教孔玄義奏嚴父莫大配天天於萬物爲最大推父偁天孝之大尊之極也易稱先王作樂崇德殷薦之上帝以配祖考上帝天也昊天祭宜祖考並配請以太宗高宗配上帝於圓丘神堯皇帝配感帝南郊祭法祖文王宗武王祖始也宗尊也一名而有二義經稱宗祀文王文王當祖而云宗包武王以言也知明堂以祖考配與二經合伯儀曰有虞氏禘黃帝而郊嚳祖顓頊而宗堯夏后氏禘黃帝而郊嚳祖顓頊而宗禹殷人禘嚳而郊冥祖契而宗湯周人禘嚳而郊稷祖文王而宗武王鄭玄曰

禘郊祖宗皆配食也祭昊天圓丘曰禘祭上帝南郊曰郊祭五帝五神明堂曰祖宗此爲最詳虞夏退頊頊郊嚳殷捨契郊冥去取違舛惟周得禮之序至明堂始兩配焉文王上配五帝武王下配五神別父子也經曰嚴父莫大於配天又曰宗祀文王於明堂以配上帝下言嚴武王以配天則武王雖在明堂未齊於配雖同祭而終爲一主也緯曰后稷爲天地主文王爲五帝宗若一神而兩祭之則薦獻數瀆此神無二主也貞觀永徽禮實專配由顯慶後始兼尊焉今請以高祖配圓丘方澤太宗配南北郊高宗配五天帝鳳閣舍人元萬頃范履冰等議今禮昊天上帝等五祀咸奉高祖太宗兼配以申孝也詩昊天章二后受之易薦上帝配祖考有兼配義高祖太宗既先配五祀當如舊請奉高宗歷配焉自是郊丘三帝並配云伯儀歷國子祭酒修文館學士卒

路敬滄貝州臨清人父文逸遇隋季大亂闔門死於盜文逸遁免流離辛苦自傷家多難閉口不食行者哀其窮彊飲食之更負以行乃得脫貞觀末官申州司馬敬滄少力學足不履門居親喪倚廬不出者三年服除號慟入門形容瘠毀妻不之識後擢進士第天授中再遷太子司議郎兼修國史崇賢館學士數受詔纂輯慶卹儀典武后稱之尤明姓系自魏晉以降推本其來皆有條序著姓略衣冠系錄等百餘篇

後坐慕連耀交通下獄死神龍初贈祕書少監
弟敬潛少與敬潛齊名歷懷州錄事參軍亦坐耀事繫獄免死後爲遂安令先是令多死敬潛欲辭妻曰
君不死獄而得全非生死有命邪從之到官有梟嘯其屏鼠數十走於前左右驅之擁杖而號敬潛不爲
懼久之遷衛令位中書舍人唐初姓譜學唯敬潛名家其後柳沖韋述蕭穎士孔至各有譏次然皆本之
路氏

王元感濮州鄆城人擢明經高第調博城丞紀王慎爲兗州都督厚加禮赦其子東平王續往受業天授
中稍遷左衛率府錄事兼直弘文館武后時已郊遂享明堂封嵩山詔與韋叔夏等草儀具衆推其練洽
轉四門博士仍直弘文館年雖老讀書不廢夜所撰書糾謬春秋振滯禮繩愆等凡數十百篇長安時上
之丐官筆楮寫藏祕書有詔兩館學士成均博士議可否祝欽明郭山暉李憲等本章句家見元感詆先
儒同異不憚數沮詰其言元感緣罅申釋竟不訕魏知古見其書歎曰五經指南也而徐堅劉知幾張思
敬等惜其異聞每爲助理聯疏薦之遂下詔褒美以爲儒宗拜太子司議郎兼崇賢館學士中宗以東宮
官屬加朝散大夫卒元感初著論三年之喪以三十有六月譏詆諸儒鳳閣舍人張柬之破其說曰三年
之喪二十五月由古則然春秋僖公三十三年十二月乙巳公薨文公二年冬公子遂如齊納幣左氏曰
禮也杜預謂僖公是年十一月納幣在十二月故謂之禮公羊傳納幣不書此何以書譏何以譏三年
之內不圖婚何休曰僖以十二月薨未終二十五月故譏云杜預推麻乙巳乃在十一月經書十二月爲
誤文公元年四月葬僖公傳曰緩夫諸侯之葬五月若十二月薨五月不得云緩則十一月明甚然二家
所競乃一月非一歲則二十五日其一驗也書稱成湯既沒太甲元年曰惟元祀十有二月伊尹祀於先
王奉嗣王祇見厥祖孔安國曰湯以元年十一月崩此則明年詳又明年大祥故下言惟三祀十有二月
朔尹以冕服奉嗣王歸于亳是十一月服除而冕顧命四月哉生魄王不懌翌日乙丑王崩丁卯命作冊
度越七日癸酉伯相命士須材則成王崩至康王麻冕黼裳凡十日康王始見廟明湯崩在十一月比殯
訖以十二月祇見其祖顧命見廟訖諸侯出廟門俟伊訓言祇見厥祖侯甸羣后咸在則崩及見廟周因
於殷也非元年前復有一歲此二十五日之二驗禮三年之喪二十五日而畢哀痛未盡然而以是爲斷
者送死有已服生有節又曰暮而小祥食菜果又暮而大祥有醯醬中月而禫食酒肉又曰再暮之喪三
年暮之喪二年九月七月之喪三時五月之喪二時三月之喪一時此二十五日之三驗儀禮暮而小祥
又暮而大祥中月而禫是月也吉祭此二十五日之四驗書春秋禮皆周公尼父所定敢問此可爲法否
昔鄭玄以中月而禫者內容一月自喪至禫凡二十七日今旣用之而二十五月初無疑論大抵子於親

喪有終身之痛創巨者日久痛深者愈遲何歲月而止乎故練而慨然悲慕未盡而踊擗之情差未祥而
廓然哀傷已除而孤藐之懷更劇此情之所致靈外飾哉故先王立其中制使情文兩稱是以祥則縞帶
素紕禫則無不佩夫去衰麻襲錦黻行道之人皆不忍直爲節之以禮匡如之何故仲由不能過制爲姊
服孔鯉不能過葦哭母彼詎不懷畏名教之嚴也當世謂東之言不詭聖人而元感論遂廢

王紹宗字承烈梁左民尙書銓曾孫系本琅邪徙江都云少貧俠嗜學工草隸客居僧坊寫書取庸自給
凡三十年庸足給一月卽止不取贏人雖厚償輒拒不受徐敬業起兵聞其行以幣劫之稱疾篤復令唐
之奇彊遣不肯赴敬業怒將殺之奇曰彼人望也殺之沮士心不可由是免事平大總管李孝逸表其
節武后召赴東都謁殿中褒慰良厚擢太子文學累進祕書少監使侍皇太子紹宗雅修飭嘗時公卿莫
不慕悅其風張易之兄弟亦頗結納易之誅坐廢卒於家嘗與人書曰鄙夫書無工者特由水墨之積習
耳常精心率意虛神靜思以取之吳中陸大夫常以余比虞君以不臨寫故也聞虞被中畫腹與余正同
虞卽世南也紹宗兄玄宗隱嵩山號太和先王傳黃老術

彭景直瀛州河間人中宗景龍末爲太常博士時獻昭乾三陵皆日祭景直上言在禮陵不日祭宗廟有
月祭故王者設廟祧壇壇爲親疎多少之殺立七廟一壇一壇曰考廟曰王考廟曰皇考廟曰顯考廟皆

月祭遠廟爲祧享嘗乃止去祧爲壇去壇爲墀有禱祭之無禱乃止譙周曰天子始祖高祖曾祖祖考之
廟皆朔加薦以象生時朔食號日祭二祧廟不月祭則古無日祭者今諸陵朔望進食近古之殷事諸節
進食近古之薦新鄭玄曰殷事月之朔半薦新奠也於儀禮朔半日猶常日朝夕也既大祥卽四時焉此
其祭皆在廟云近世始以朔望諸節祭陵寢唯四時及臘五享於廟尋經質禮無日祭於陵之文漢時京
師自高祖下至宣帝與太上皇悼皇考陵旁立廟園各有寢便殿故日祭諸寢月祭諸便殿禹以禮節
煩數白元帝願罷郡國廟丞相韋玄成等後因議七廟外寢園皆無復修議者亦以祭不欲數宜復古四
時祭於廟劉歆引春秋外傳曰祖禰日祭曾高月祀二祧時享壇壇歲貢魏晉以降不祭墓唐家擇古作
法臣謂宜罷諸陵日祭如禮便帝不從因下詔有司言諸陵不當日進食夫禮以人情爲之沿革何專古
而泥所聞乾陵宜朝晡進奠昭獻陵日一進或所司乏於費可減朕常膳爲之帝崩葬定陵有司議以和
思皇后祔葬后爲武后所殺不得其喪所將以招魂合諸梓宮景直曰招魂古無傳不可請如橋山藏衣
冠故事納后禭衣復寢宮舉衣魂輅告以太牢內之方中奉帝梓棺右覆以夷衾衆當其言制曰可景直
後歷禮部郎中卒

盧粲幽州范陽人後魏侍中陽烏五世孫祖彥卿亦善著書粲始冠擢進士第神龍中累遷給事中時節

愍太子立章后疾之諷中宗以衛府封物給東宮粢駮奏太子七噎主歲時服用宜取於百司周禮諸用財器歲終則會唯王及太子不會今乃與諸王等夷非所謂憲章古昔者詔可武崇訓死詔墓視陵制粢曰凡王公主墓無稱陵者唯永泰公主事出特制非後人所援比崇訓榮兆請視諸王詔曰安樂公主與永泰不異崇訓於主當同穴為陵不疑粢固執以陵之稱本施尊極雖崇訓之親不及雍王雍墓不稱陵崇訓緣主而得假是名哉詔可主大怒出粢陳州刺史粢曰苟所論得行雖遠何憚開元初為祕書少監其從父行嘉仕為雍王記室亦以學聞粢累封固安縣侯終邠王傅諡曰景

尹知章絳州翼城人少雖學未甚通解忽夢人持巨鑿破其心內若劑焉驚悟志思開徹遂徧明六經諸生嘗講授者更北面受大義長安中擢定王府文學遷太常博士中宗時或建言以涼武昭王為七廟始祖知章議武昭遠世非王業所因乃止出為陸渾令坐事輒棄官去時散騎常侍解琬亦罷歸與知章覃思經術舉訢然張說表諸朝擢禮部員外郎轉國子博士馬懷素緒定祕書奏知章是正文字每休沐講授未始輟於易老莊書尤縣解弟子貧者贖給之性和厚人不見有喜愠未嘗問產業其子欲廣市樵米為歲中計知章曰如而計則貧人何以取資且吾烏應奪民利邪卒官所注傳頗多行於時門人孫季良等頌其德刻著東都國子監門外季良偃師人一名翌仕歷左拾遺集賢院直學士

張齊賢陝州陝人聖初為太常奉禮郎武后詔百官議告朔於明堂講時令布政事京官九品以上四方朝集使皆列於廷太常博士辟閻仁謂曰經無天子月告朔唯玉藻天子聽朔南門之外周太宰正月之吉布政於邦國都鄙于寶曰建子月告朔日也此玉藻聽朔同誼今元日讀時令合古聽朔事獨鄭玄以秦制月令有五帝五官因言聽朔必以特牲告時帝及神以文王武王配其言非是月令曰其帝太昊其神句芒謂宣令告人使奉時務業月皆有令故云非天子月朔以配帝祭也告朔者諸侯禮也春秋既視朔遂登臺玄又說人君月告朔於廟其祭為朝享魯自文公始不視朔明非天子所行玄謂告帝即人帝神即重黎五官不言天子拜祭臣請罷告朔月祭以應古禮齊賢不違其說質曰穀梁氏稱閏月天子不告朔它月故告朔矣左氏言魯不告閏朔為棄時政則諸侯雖閏告朔矣周太史頌朔於邦國玉藻閏月王居門是天子雖閏亦告朔二家去聖不遠載天子諸侯告朔事顯弗繆今議者乃以太宰正月之吉布治邦國而言天子元日一告朔殊失其旨一歲之元六官自布所職之典于寶謂吉為朔故世人謬吉為告據繆失經不得為法議者又引左氏說專在諸侯不知玉藻與左說正同而獨於天子言歲首一告何去取之恣也又謂時帝五人帝也玄於時帝包五人故以文武作配是並告兩五帝為不疑諸侯受朔天子藏於廟天子受朔於天宜在明堂故告時帝配祖考議者曰天子月告祭頌朔則諸侯安得藏之

故太宰歲首布一歲事太史頒之也是不然周太史頒朔邦國是總頒十二朔於諸侯天子猶月告者頒官府都鄙也內外異言之也禮不可罷鳳閣侍郎王方慶又推言明堂布政之宮所以明天氣統萬物也漢儒以明堂太廟爲一宗祀其祖而配上帝取宗祀曰清廟正室爲太宗向陽爲明堂建學爲太學園水爲辟雍異名同事古之制也天子以正月上辛總受十二月政於南郊還藏於祖廟月取一政班之明堂諸侯則受於天子藏之祖廟月取一政行之於國王者以其禮告廟謂之告朔視月之政謂之視朔玉藻玄冕而朝日東門之外聽朔南門之外鄭玄說明堂在國陽就其時之堂而聽朔焉卒事宿路寢今元日通天宮受朝有司遂讀時令布政古之禮也舊說天子歲入明堂者十八大亨一月告朔十二四時迎氣四巡狩之歲一今議者唯許歲首一入不亦隘乎陛下幸建明堂遵用告朔事若月一聽則近於煩每孟月視朔惟制定其禮臣下不敢專成均博士吳楊吾等共言秦滅學告朔廢今用四孟月季夏至明堂告五時帝堂上請兼如齊賢方慶議不數歲禮亦廢久之齊賢遷博士時東都置太社禮部尙書祝欽明問禮官博士周家田主用所宜木今社主石奈何齊賢與太常少卿韋叔夏國子司業郭山暉尹知章等議春秋君以軍行祓社魯鼓祝奉以從故曰不用命戮於社社稷主用石以可奉而行也崔靈恩曰社主用石以地產最實歟呂氏春秋言殷人社用石後魏天平中遷太社石主其來尙矣周之田主用所宜木具

民間之社歟非太社也於是舊主長尺有六寸方尺七寸問博士云何齊賢等議社主之制禮無傳天子親征載以行則非過重禮社祭土主陰氣韓詩外傳天子太社方五丈諸侯半之五土數社主宜長五尺以準數五方二尺以準陰偶剋其上以象物生方其下以象地體埋半土中本末均也請度以古尺云又問社稷壇隨四方用色而中不數尺冒黃土謂何齊賢等曰天子太社度廣五尺分四方上冒黃土象王者覆被四方然則當以黃土覆壇上舊壇上不數尺覆被之狹垂於古於是以方色飾壇四面及陛而黃土全覆上焉祭牲皆太牢其後改先農曰帝社又立帝稷皆齊賢等參定中宗卽位因武后東都廟改爲唐廟議滿七室以涼武昭王爲始祖齊賢上議禮天子七廟尊始封君曰太祖百代不遷始祖無聞焉殷自玄王至湯周后稷至武王皆出太祖後合食有序景皇帝始封唐實爲太祖以世數近故尙在昭穆今乃上引武昭王爲始祖異乎殷周之本高稷也高稷興祚景皇帝是也昭王國不世傳後嗣失守景帝實始封唐子孫是承若近捨唐遠引涼不見其可且魏不祖曹參晉不祖司馬卽宋不祖楚元王齊梁不祖蕭何陳隋不祖胡公楊震今謂昭王爲祖可乎漢以周郊后稷議欲郊堯杜林以爲周興自后稷漢業特起功不緣堯卒不果郊武德初定去昭王尤近不託祖者不可故也今而立之非祖宗意景皇失位神弗臨享殆非詭厥孫謀者博士劉承慶尹知章又言受命之君王迹有淺深代系有遠邇祖以功昭穆以親

有功者不遷親盡者毀今不宜以廟數未備引當遷之主於昭穆上苟充七室也景皇帝既號太祖以世
凌猶在六室位則室未當有七非天子廟不當七也大帝神主既祔宣皇帝當遷宣非始祖又無宗號親
盡而遷不可復立請仍爲六室詔宰相詳裁於是祝欽明等上言博士等三百人爲兩說齊賢等不祖武
昭王劉承慶等請遷宣皇帝臣等欲皆可其奏詔可俄以孝敬皇帝爲義宗列於廟爲七室西京大廟亦
如之齊賢遷累諫議大夫卒

柳沖蒲州虞鄉人隋饒州刺史莊曾孫父楚賢大業中爲河北縣長高祖兵興堯君素據郡固守楚賢說
曰隋之亡天下共知唐公名在圖籙動以誠信豪英景赴天所贊也君子見幾而作俟終日邪君素不從
楚賢潛行自歸授侍御史貞觀中持節冊拜突厥辭其遣不受歷交桂二州都督杭州刺史皆有名沖好
學多所研總天授初爲司府寺主簿詔遣安撫淮南使有指封河東縣男中宗景龍中遷左散騎常侍修
國史初太宗命諸儒議氏族志甄差羣姓其後門胄興替不常沖請改修其書帝詔魏元忠張錫肅至忠
岑羲崔湜徐堅劉憲吳兢及沖共取德功時望國籍之家等而次之夷蕃酋長襲冠帶者析著別品會元
忠等繼物故至先天時復詔沖及堅競與魏知古陸象先劉子玄等討綴書乃成號姓系錄歷太子賓客
宋王師昭文館學士以老致仕開元初詔沖與薛南金復加刊竄乃定後柳芳著論甚詳今刪其要著之

左方芳之言曰氏族者古史官所記也昔周小史定繫世籍昭穆故古有世本錄黃帝以來至春秋時諸

侯卿大夫名號繼統左丘明傳春秋亦言天子建德因生以賜姓胙之士命之氏諸侯以字爲氏以諡爲
族昔堯賜伯禹姓曰姒氏曰有夏伯尼姓曰姜氏曰有呂下及三代官有世功則有官族邑亦如之後世
或氏於國則齊魯秦吳氏於諡則文武成宣氏於官則司馬司徒氏於爵則王孫公孫氏於字則孟孫叔
孫氏於居則東門北郭氏於志則三烏五鹿氏於事則巫乙匠陶於是受姓命氏粲然衆矣秦既滅學公
侯子孫失其本系漢興司馬遷父子乃約世本修史記因周譜明世家乃知姓氏之所由出虞夏商周昆
吾大彭豕韋齊桓晉文皆同祖也更王迭霸多者千祀少者數十代先王之封既絕後嗣蒙其福猶爲疆
家漢高帝興徒步有天下命官以賢詔爵以功誓曰非劉氏王無功侯者天下共誅之先王公卿之胄才
則用不才棄之不辨士與庶族然則始尙官矣然猶徙山東豪傑以實京師齊諸田楚屈景皆右姓也其
後進拔豪英論而錄之蓋七相五公之所由興也魏氏立九品置中正尊世胄卑寒士權歸右姓已其州
大中正主簿郡中正功曹皆取著姓士族爲之以定門胄品藻人物晉宋因之始尙姓已然其別貴賤分
士庶不可易也于時有司選舉必稽譜籍而考其真僞故官有世胄譜有世官賈氏王氏譜學出焉由是
有譜局令史職皆具過江則爲僑姓王謝袁蕭爲大東南則爲吳姓朱張顧陸爲大山東則爲郡姓王崔

盧李鄭爲大關中亦號郡姓韋裴柳薛楊杜首之代北則爲虜姓元長孫宇文于陸源寶首之虜姓者魏孝文帝遷洛有八氏十姓三十六族九十二姓八氏十姓出於帝宗屬或諸國從魏者三十六族九十二姓世爲部落大人並號河南洛陽人郡姓者以中國士人差第閹閹爲之制凡三世有三公者曰膏梁有令僕者曰華腴尙書領護而上者爲甲姓九卿若方伯者爲乙姓散騎常侍大中大夫者爲丙姓吏部正員郎爲丁姓凡得入者謂之四姓又詔代人諸胄初無族姓其穆陸奚于下吏部勿充猥官得視四姓北齊因仍舉秀才州主簿郡功曹非四姓不在選故江左定氏族凡郡上姓第一則爲右姓太和以郡四姓爲右姓齊浮屠曇剛類例凡甲門爲右姓周建德氏族以四海通望爲右姓隋開皇氏族以上品茂姓則爲右姓唐貞觀氏族志凡第一等則爲右姓路氏著姓略以盛門爲右姓柳沖姓族系錄凡四海望族則爲右姓不通歷代之說不可與言譜也今流俗獨以崔盧李鄭爲四姓加太原王氏號五姓蓋不經也夫文之弊至於尙官官之弊至於尙姓姓之弊至於尙詐詐承其弊不知其所以弊乃反古道罷鄉舉離地著尊執事之吏於是乎士無鄉里里無衣冠人無廉恥士族亂而庶人僭矣故善言譜者繫之地望而不惑質之姓氏而無疑綴之婚姻而有別山東之人質故尙婚媿其信可與也江左之人文故尙人物其智可與也關中之人雄故尙冠冕其達可與也代北之人武故尙貴戚其泰可與也及其弊則尙婚媿者先

外族後本宗尙人物者進庶輩連嫡長尙冠冕者略仇儻慕榮華尙貴戚者狃勢利亡禮教四者俱備則

失其所尙矣人無所守則士族削士族削則國從而衰管仲曰爲國之道利出一孔者王一孔者疆三孔者弱四孔者亡故冠婚者人道大倫周漢之官人齊其政一其門使下知禁此出一孔也故王魏晉官人尊中正立九品鄉有異政家有競心此出二孔也故疆江左代北諸姓紛亂不一其要無歸此出三孔也故弱隋氏官人以吏道治天下人之行不本鄉黨政煩於上人亂於下此出四孔也故亡唐承隋亂宜救之以忠忠厚則鄉黨之行修鄉黨之行修則人物之道長人物之道長則冠冕之緒崇冠冕之緒崇則教化之風美乃可與古參矣晉太元中散騎常侍河東賈弼撰姓氏簿狀十八州百十六郡合七百一十二篇甄析士庶無所遺宋王弘劉湛好其書弘每日對于客可不犯一人諱湛爲選曹撰百家譜以助銓序文傷寡省王儉又廣之王僧孺演益爲十八篇東南諸族自爲一篇不入百家數弼傳子匪之匪之傳子希鏡希鏡撰姓氏要狀十五篇尤所諳究希鏡傳子執執更作姓氏英賢一百篇又著百家譜廣兩王所記執傳其孫冠冠撰梁國親皇太子序親簿四篇王氏之學本於賈氏唐興言譜者以路敬淳爲宗柳沖韋述次之李守素亦明姓氏時謂肉譜者後有李公淹蕭穎士殷寅孔至爲世所稱初漢有鄧氏官譜應劭有氏族一篇王符潛夫論亦有姓氏一篇宋何承天有姓苑二篇譜學大抵具此魏太和時詔諸郡中

元各列本土姓族次第爲舉選格名曰方司格人到于今稱之

馬懷素字惟白潤州丹徒人客江都師事李善貧無資晝樵夜輒然以讀書遂博通經史擢進士第又中文學優贍科補郿尉積勞遷左臺監察御史長安中大夫魏元忠爲張易之構謫嶺表太僕崔貞慎東宮率獨孤禕之祖道易之怒使人上急變告貞慎等與元忠謀反武后詔懷素按之使者促迫懷素執不從曰貞慎餞流人當得罪以爲謀反則非昔彭越以逆誅樂布奏事尸下漢不坐罪今元忠罪非越比不宜坐餞闕之人且陛下謀生殺柄欲加之罪自當處決聖心既付臣按狀惟知守陛下法爾后意解貞慎等乃免宰相李迥秀藉易之勢斂賦誣法懷素劾罷之轉禮部員外郎以十道使黜陟江西處決平恕遷考功覈取實才權貴謁請不能阿撓擢中書舍人內供奉爲修文館直學士開元初爲戶部侍郎封常山縣公進兼昭文館學士篤學手未嘗廢卷謙恭慎畏推爲長者玄宗詔與褚無量同爲侍讀更日番入既叩閣肩輿以進或行在遠聽乘馬宮中每晏見帝自送迎以師臣禮有詔句校祕書是時文籍盈漫皆衰朽蟬斷籤牋紛舛懷素建白願下紫微黃門召宿學巨儒就校繆闕又言自齊以前舊籍王儉七志已詳請採近書篇目及前志遺者續儉志以藏祕府詔可卽拜懷素祕書監乃詔國子博士尹知章四門助教王直直國子監趙玄默陸渾丞吳綽桑泉尉韋述扶風丞馬利徵湖州司功參軍劉彥直臨汝丞宋辭玉恭

陵丞陸紹伯新鄭尉李子釗杭州參軍殷踐猷梓潼尉解崇質四門直講余欽進士王愜劉仲巳右威衛

參軍侯行果邢州司戶參軍袁暉海州錄事參軍晁良右率府胄曹參軍母暉滎陽主簿王灣太常寺太祝鄭良金等分部議次踐猷從弟祕書丞承業武陟尉徐楚璧是正文字懷素奏祕書少監盧備崔沔爲修圖書副使祕書郎田可封康子元爲判官然懷素不善著述未能有所緒別會卒帝舉哀洛陽南城門贈潤州刺史諡曰文給輿還鄉里喪事官辦懷素卒後詔祕書官並號修書學士草定四部人人意自出無所統一踰年不成有司疲於供擬太僕卿王毛仲奏罷內料又詔右常侍褚無量大理卿元行沖考絀不應選者無量等奏修撰有條宜得大儒綜治詔委行沖乃令暉述欽總緝部分踐猷愜治經述欽治史暉彥直治子灣仲巳治集八年四錄成上之學士無賞擢者行沖知麗正院又奏紹伯利徵彥直踐猷行果子釗直暉述灣玄默欽良金與朝邑丞馮朝隱冠氏尉權寅獻祕書省校書郎孟曉揚州兵曹參軍韓覃王嗣琳福昌令張悌進士崔藏之入校麗正書由是祕書省罷譏緝而學士皆在麗正矣愜仲巳老病還鄉里紹伯卒於官直終岐王府記室參軍事玄默集賢直學士利徵出爲山荏令儒緩無治術免官終於家子釗坐保任非人終德州長史欽至太學博士集賢院學士灣洛陽尉良金右補闕京兆府倉曹參軍事寅獻臨淮太守曉左補闕覃萊州別駕坐誣告刺史流遠方藏之膳部員外郎明年以將仕郎梁令

瓚文學直書院後以右率府兵曹參軍而罷終恆王府司馬祕書省校書郎源幼良代利徵後以協律郎罷

殷踐猷字伯起陳給事中不害五世從孫博學尤通氏族麻數醫方與賀知章陸象先章述最善知章嘗號爲五總龜謂龜千年五聚問無不知也初爲杭州參軍舉文儒異等科授祕書省學士用曹州司法參軍兼應正殿學士以叔父喪哀慟歐血而卒年四十八

少子寅舉宏辭爲太子校書出爲永寧尉吏侮謾甚寅怒殺之貶澄城丞病且死以母蕭老不忍決及斂其子亮斷指髮置棺中自誓事祖母如寅在其後侍蕭疾不脫衣者數年有白鷺巢其楣後終給事中杭州刺史

踐猷弟季友歷祕書郎善畫從父仲容終冬官郎中有重名子承業以謹樸稱歷太子左諭德右威衛將軍族子成己管州長史初母顏叔父吏部郎中敬仲爲酷吏所陷率二妹割耳訴冤敬仲得減死及成己生而左耳缺云

孔若思越州山陰人陳吏部尚書英四世孫祖紹安與兄紹新蚤知名陳亡客居鄞勵志於學外兄虞世南曰本朝淪覆善分煙滅有弟若此知不亡矣紹安與孫萬壽皆以文辭稱時謂孫孔隋大業末爲監察

御史高祖討賊河東紹安與夏侯端同監軍禮遇尤密帝受禪端先歸拜祕書監已而紹安問道走長安

帝悅擢內史舍人賜宅一區良馬二匹若思早孤其母躬訓教長以博學聞有遺以褚遂良書者納一卷焉其人曰是書貴千金何取之廉答曰審爾此爲多矣更還其半擢明經庫部郎中常曰仕宦至郎中足矣座右置止水一石明自足意中宗初敬暉桓彥範當國以若思多識古今凡大政事必咨質後行三遷禮部侍郎出爲衛州刺史故事以宗室爲州別駕見刺史驚放不肯致恭若思劾奏別駕李道欽諂狀有詔別駕見刺史致恭自若思始以清白擢銀青光祿大夫賜絹百匹累封梁郡公開元七年卒諡曰惠

從父禎第進士歷監察御史門無賓謁時譏其介高宗時再遷絳州刺史封武昌縣子諡曰溫子季詡字季和永昌初擢制科授祕書郎陳子昂常稱其神清韻遠可比衛玠終左補闕

若思子至字惟微歷著作郎明氏族學與韋述蕭穎士柳沖齊名譏百家類例以張說等爲近世新族劄去之說子埒方有寵怒曰天下族姓何豫若事而妄紛紛埒弟素善至以實告初書成示韋述述謂可傳及聞埒語懼欲更增損述曰止丈夫奮筆成一家書奈何因人動搖有死不可改遂罷時述及穎士冲皆譏類例而至書稱工

宋 端 明 殿 學 士 宋 祁 撰

列傳第一百二十五

儒學下

褚無量字弘度杭州鹽官人幼授經於沈子正曹福刻意墳典家濱臨平湖有龍出人皆走觀無量尚幼讀書若不聞衆異之尤精禮司馬史記擢明經第累除國子博士遷司業兼修文館學士中宗將南郊詔定儀典時祝欽明郭山暉建言皇后為亞獻無量與太常博士唐紹蔣欽緒固爭以為郊祀國大事其折衷莫如周禮周禮冬至祭天圓丘不以地配唯始祖為主亦不以妣配故后不得與又太宗伯凡大祭祀王后不與則攝而薦豆籩徹是后不應助祭又內宰職大祭祀后裸獻則贊瑤爵祭天無裸知此乃宗廟祭耳巾車內司服掌后六服與五路無后祭天之服與路是后不助祭天也惟漢有天地合祭皇后參享事未代黷神事不經見不可為法時左僕射韋巨源佐欽明故無量議格以母老解官玄宗為太子復拜國子司業兼侍讀撰翼善記以進厚被禮答太子釋奠國學令講經建端樹義博敏而辯進銀青光祿大夫錫子蕃渥及即位遷左散騎常侍兼國子祭酒封舒國公母喪解詔州刺史薛瑩弔祭賜物加等廬墓

左鹿犯所植松柏無量號訴曰山林不乏忍犯吾塋樹耶自是羣鹿馴擾不復根觸無量爲終身不御其肉矣除召復故官以耆老隨仗聽徐行又爲設腰舉許乘入殿中頻上書陳得失開元五年帝將幸東都而太廟壞姚崇建言廟本符堅故殿不宜罷行無量鄙其言以爲不足聽乃上疏曰王者陰盛陽微則先祖見變今後宮非御幸者宜悉出之以應變異舉峻良擢奢靡輕賦慎刑納諫爭察諛諛繼絕世則天人和會災異訖息帝是崇語車駕遂東無量又上言昔虞舜之狩秩山川徧羣神漢孝景祠黃帝橋山孝武祠舜九疑高祖過魏祭信陵君墓過趙封樂毅後孝章祠桓譚家願陛下所過名山大川已陵墳衍古帝王賢臣在祀典者並詔致祭自古受命之君必興滅繼絕崇德報功故存人之國大於救人之災立人之後重於封人之墓願到東都收敘唐初建今功臣世絕者雖在支庶咸得承襲帝納其言卽詔無量祠堯平陽宋璟祠舜蒲坂蘇頌祠禹安邑在所刺史參獻又求武德以來勳臣苗裔紹續其封初內府舊書自高宗時藏宮中甲乙叢倒無量建請繕錄補第以廣祕籍天子詔於東都乾元殿東廂部彙整比無量爲之使因表聞喜尉盧僊江夏尉陸去泰左監門率府曹參軍王擇從武陟尉徐楚璧分部讐定衛尉設次光祿給食又詔祕書省司經局昭文崇文二館更相檢讐采天下遺書以益闕文不數年四庫完治帝詔羣臣觀書賜無量等帛有差無量又言貞觀御書皆宰相署尾臣位卑不足以辱請與宰相聯名拔尾不從帝西還從書廳正殿更以脩書學士爲麗正殿直學士比京官預朝會復詔無量就麗正寫續前功皇太子及四王未就學無量以孝經論語五通獻帝曰朕知之矣乃選鄒常享郭謙光潘元祚等爲太子諸王侍讀七年太子齒冑於學詔無量升坐講勸百官觀禮厚資賜卒年七十五病困語人以麗正書未畢爲恨帝聞悼痛詔宰相曰無量朕師今其永逝宜用優典於是贈禮部尚書諡曰文葬事官給所議述百餘篇沒後有於書殿得講史記至言十二篇上之帝歎息以絹五百匹賜其家始無量與馬懷素爲侍讀後祕書少監康子原國子博士侯行果亦踐其選雖賞資亟加而禮遇衰矣陸去泰歷左右補闕內供奉王擇從京兆人終汜水令徐楚璧初應制舉三登甲科開元時爲中書舍人集賢院學士帝屬文多令視草終中書侍郎東海縣子在中書省久是時李林甫用事或言計議多所參助後更名安貞元澹字行沖以字顯後魏常山王素蓮之後少孤養於外祖司農卿韋機及長博學尤通故訓及進士第累遷通事舍人狄仁傑器之嘗謂仁傑曰下之事上譬富家儲積以自資也脯腊膾臠以供滋膳參朮芝桂以防疾疢門下充旨味者多矣願以小人備一藥石可乎仁傑笑曰君正吾藥籠中物不可一日無也景雲中授太常少卿行沖以系出拓拔恨史無編年乃撰魏典三十篇事詳文約學者尙之初魏明帝時河西柳谷出石有牛繼馬之象魏收以晉元帝乃牛氏子冒司馬姓以著石符行沖謂昭成皇帝名繼繼

晉受命獨此可以當之有人破古冢得銅器似瑟琴身正圓人莫能辨行沖曰此阮咸所作器也命易以木絃之其聲亮雅樂家遂謂之阮咸開元初罷太子詹事出爲岐州刺史兼關內按察使自以書生非彈治才固辭入爲右散騎常侍東都副留守嗣彭王子志謙坐讎人告變考訊自誣株蔓四十人行沖察其枉列奏見原四遷大理卿不樂法家固謝所居官改左散騎常侍封常山縣公充使檢校集賢再遷太子賓客弘文館學士先是馬懷素撰書志褚無量校麗正四部書業未卒相次物故詔行沖并代之玄宗自註孝經詔行沖爲疏立于學官以老罷麗正校書事初魏光乘請用魏徵類禮列于經帝命行沖與諸儒集義作疏將立之學乃引國子博士范行恭四門助教施敬本采獲刊綴爲五十篇上于官於是右丞相張說建言戴聖所錄向已千載與經並立不可罷魏孫炎始因舊書摛類相比有如鈔綴諸儒共非之至徵更加整次乃爲訓注恐不可用帝然之書留中不出行沖意諸儒間已因著論自辯名曰釋疑曰客問主人小戴之學康成之注魏氏乃有刊易二經孰優主人曰小戴禮行於漢末馬融爲傳盧植合二十九篇而爲之解世所不傳鉤黨獄起康成於竄伏之中理紛拏之典雖存探究咨謀靡所具鄭志者百有餘科章句之徒曾不是省王肅因之或多攻詆而鄭學有孫炎雖扶鄭義條例支分箴石間起增革百篇魏氏病羣言之冗脛采衆說之精簡刊正芟書畢以聞太宗嘉賞錄賜諸儒陛下業宜所循農乃制諸儒甄分舊義豈懼章句之士堅持昔言據屢不申疑於知新果於仍舊客曰當用和選使必用舊疑而不申列答曰改易章句是有五難漢孔安國注古文尙書族兄臧與書曰相如常恐俗儒淫詞冒義欲撥亂反正而未能也浮學守株衆非非正自古而然恐此道未信而獨智爲譴一也昔孔季產專古學有孔扶者與俗浮沈每誡產曰今朝廷率章句內學君獨脩古義古義非章句內學危身之道也獨善不容於世君其殆哉二也劉歆好左氏欲建學官哀帝納之諸儒遷延不肯置對歆移書謂讓諸博士皆忿恨龔勝時爲光祿大夫見歆議乃乞骸骨司空師丹因大發怒詆歆改亂前志非毀先帝所立歆懼出爲五原太守以君賓之學公仲之博猶迫同門朋黨之議卒令子駿負謗三也王肅規鄭玄數千百條鄭學馬昭詆劾肅短詔遣博士張融按經問詰融推處是非而肅酬對疲於歲時四也王粲曰世稱伊雒以東淮漢以北康成一人而已咸言先儒多闕鄭氏道備繁竊嗟怪因求所學得尙書注退思其意皆盡矣所疑猶未諭焉凡有二篇王邵曰魏晉浮華古道湮替歷載三百士大夫恥爲章句唯草野生專經自許不能博究擇從其善徒欲父康成兄子慎靈道孔聖誤諱言鄭服非然則鄭服之外皆讎矣五也夫物極則變比及百年當有明哲君子恨不與吾同世者道之行廢必有其時者歟何遽速近名之嫌邪俄丐致仕十七年卒七十七贈禮部尙書諡曰獻

陳貞節潁川人開元初爲右拾遺初隱章懷懿德節愍四太子並建陵廟分八署置官列吏卒四時祠官進饗貞節以爲非是上言王者制祀以功德者猶親盡而毀四太子廟皆別祖無功於人而國祠時薦有司守衛與列帝侔金奏登歌所以頌功德詩曰鍾鼓既設一朝饗之使無功而頌不曰舞詠非度邪周制始祖乃稱小廟未知四廟欲何名乎請罷卒吏詔祠官無領屬以應禮典古者別子爲祖故有大小宗若謂祀未可絕宜許所後子孫奉之詔有司博議駕部員外郎裴子餘曰四太子皆先帝冢嗣列聖念懿屬而爲之享春秋書晉世子曰將以晉界秦秦將祀予此不祀也又言神不歆非類君祀無乃戾乎此有廟也會定公元年立煬宮煬伯禽子季氏遠祖尙不爲限況天子篤親親以及旁蕃誰不曰然太常博士段同曰四陵廟皆天子睦親繼絕也逝者錫藉繁猶生者之開茅土古封建子弟詎皆有功生無所議死乃援禮停祠人其謂何隱於上伯祖也服總章懷伯父也服蕃懿德節愍堂昆弟也服大功親未盡廟不可廢禮部尙書鄭惟忠等二十七人亦附其言於是四陵廟惟減吏卒半它如舊遷太常博士玄宗奉昭成皇后祔睿宗室又欲肅明皇后并升焉貞節奏言廟必有配一帝一后禮之正也昭成皇后有大妣之德宜升配睿宗肅明皇后既非子貴宜在別廟周人奏夷則歌小呂以享先妣先妣姜嫄也以生后稷故特立廟曰闕宮晉簡文帝鄭宣皇后不配食築宮於外以歲時致享肅明請準周姜嫄晉宣后納主別廟時李如備於是留主備坤廟詔太廟母置官屬貞節又與博士蘇胤上言睿宗於孝和弟也按賀循說兄弟不相爲後故殷盤庚不序陽甲而上繼先君漢光武不嗣孝成而上承元帝晉懷帝繼世祖不繼惠帝故陽甲孝成出爲別廟又言兄弟共世昭穆位同則毀二廟有天下者從禰而上事七廟尊者所統廣故及遠祖若容兄弟則上毀祖考天子不得全事七世矣請以中宗爲別廟大禘則合食太祖睿宗繼高宗則祿獻承序詔可乃奉中宗別廟升睿宗爲第七室五年太廟壞天子舍神主太極殿營新廟素服避正寢三日不朝猶幸東都伊闕男子孫平子上書曰乃正月太廟毀此躋二帝之驗也春秋君薨卒哭而祔祔而作主特祀於主烝嘗禘於廟今皆違之魯文公之二年躋僖於閔上後太室壞春秋書其災說曰僖雖閔兄嘗爲之臣居君上是謂失禮故太室壞且兄臣於弟猶不可躋弟嘗臣兄乃可躋乎莊公薨閔公二年而禘春秋非之況大行夏崩而太廟冬禘不亦亟乎太室尊所若曰魯自是陵夷墮周公之祀太廟今壞意者其將陵夷墮先帝之祀乎陛下未祭孝和先祭太上皇先臣後君昔躋兄弟上今弟先兄祭昔太室壞今太廟毀與春秋正同不可不察武后篡國孝和中興有功今內主別祠不得立於世亦已薄矣夫功不可棄君不可下長不可輕且臣繼君猶子繼父故禹不先鯀周不先不密宋鄭不以帝乙厲王不肖猶尊之也況中興邪晉太康時宣帝廟地陷梁折又三年太廟殿陷而及泉更營之梁又下天之

所禮非必朽而壞也晉不承天故及於亂臣謂宜遷孝和還廟何必違禮下同魯晉哉帝異其言詔有司復議貞節獻與博士馮宗質之曰天子七廟三昭三穆與太祖而七父昭子穆兄弟不與焉殷自成湯至帝乙十二君其父子世六易乾鑿度曰殷之帝乙六世王則兄弟不為世矣殷人六廟親廟四并湯而大殷兄弟四君若以為世方上毀四室乃無祖禰是必不然古者絲禰極祖雖迭毀迭遷而三昭穆未嘗闕也禮大宗無子則立支子又曰為人後者為之子無兄弟相為後者故捨至親取遠屬父子曰繼兄弟曰及兄弟不相入廟尚矣借有兄弟代立承統告享不得稱嗣子嗣孫乃言伯考伯祖何統緒乎殷十二君惟三祖三宗明兄弟自為別廟漢世祖列七廟而惠帝不與文武子孫昌衍文為漢太宗晉景帝亦文帝兄景絕世不列於廟及告諡世祖稱景為從祖今謂晉武帝越崇其父而廟毀及亡何漢出惠帝而享世長久乎七廟五廟明天子諸侯也父子相繼一統也昭穆列序重繼也禮兄弟相繼不得稱嗣子明睿宗不父孝和必上繼高宗者偶室於廟則為二穆於禮可乎禮所不可而使天子旁紹伯考棄已親正統哉孝和中興別建園寢百世不毀尚何議哉平子猥引僖公逆祀為比殊不知孝和升新寢聖真方耐廟則未嘗一日居上也帝語宰相召平子與博士詳論博士護前言合軌平子平子援經辯數分明獻等不能屈蘇頌右博士故平子坐貶都城尉然諸儒以平子孤挺見進於禮官不帝亦知其直久不決然卒不復中宗於廟明年帝將大享明堂貞節惡武后所營非古所謂木不鑽土不文之制乃與馮宗上言明堂必直丙巳以憲房心布政太微上帝之所武后始以乾元正寢占陽午地先帝所以聽政故毀殿作堂撤之日有音如雷庶民譁訕以為神靈不悅堂成災火從之后不脩德俄復營構殫用極侈詭譎厥變又欲嚴配上帝神安肯臨且密邇掖庭人神雜擾是謂不可放物者也二京上都四方是則天子聽政乃居便坐無以尊示羣臣願以明堂復為乾元殿使人識其舊不亦愈乎詔所司詳議刑部尚書王志愔等僉謂明堂環怪不法天燼之餘不容大享請因舊制還署乾元正寢正至天子御以朝會若大享復寓園丘制曰可貞節以壽卒

施敬本潤州丹陽人開元中為四門助教玄宗將封禪詔有司講求典禮舊制盥手洗爵皆侍中主之詔祀天神太祝主之敬本上言曰周制大宗伯鬱人下士二掌祿事漢無鬱人用近臣漢世侍中微甚籍孺閔孺等幸臣為之後漢邵閔自侍中遷步兵校尉秩千石其職省起居執虎子蓋襲臣也今侍中位宰相非鬱人比祝者薦主人意於神非賤職也古二君相見卿為上儼況天人際哉周太祝下大夫二上士四下大夫今郎中太常丞之比上士員外郎博士之比漢太祝令秩六百石今太祝乃下士以下士接天以大臣奉天子輕重不倫非禮也舊制謁者引太尉升壇謁者位下升壇禮重漢尚書御史屬有謁者僕射

一秩六百石銅印青綬謁者三十五以郎中滿歲稱給事中未滿歲稱謁者光祿勳屬有謁者掌賓贊員七十秩比六百石則古謁者名秩差異等今謁者班微循空名忘實事非所以事天也帝詔中書令張說引敬本熟悉其議故侍中祝謁者視禮輕重以它官攝領敬本以太常博士為集賢院脩撰踰年遷右補闕祕書郎卒

盧履冰幽州范陽人元魏都官尚書義儔五世孫開元五年仕歷右補闕建言古者父在為母菴徹靈而心喪武后始請同父三年非是請如禮便玄宗疑之又以舅嫂叔服未安并下百官議刑部郎中田再思曰會禮之家比聚訟循古不必是而行今未必非父在為母三年高宗實行之著令已久何必乖先帝之旨闕人子之情愛一菴服於其親使與伯叔母姑姊妹同嫂叔舅甥服太宗實制之闕百年無異論不可改履冰因言上元中父在為母三年后雖請未用也逮垂拱始行之至有祖父母在而子孫婦沒行服再菴不可謂宜禮女子無專道故曰家無二尊父在為母服菴統一尊也今不正其失恐後世復有婦奪夫之敗不可不察書留未下履冰即極陳父在為母立几筵者一菴心喪者再菴父必三年而後娶以達子之志夫聖人豈蔑情於所生固有意於天下昔武后陰儲篡謀豫自光崇升菴齊抗斬衰俄而乘陵唐家以啟廢階孝和僅得反正章氏復出就殺天子繼亡宗社故至將以正夫菴之闕非特母子間也義者哉

未習先王之旨安足議夫禮哉罔極者春秋祭祀以時思之謂君子有終身之憂何限一菴二菴服哉聖人之於禮必建中制使賢不肖共成文理而後釋彼伯叔姑姊烏有筵杖之制三年心喪乎母齊父斬不易之道也左散騎常侍元行沖議曰古緣情制服女天父妻天夫斬衰三年情禮俱盡者因心立極也妻喪杖菴情禮俱殺者遠嫌疑尊乾道也為嫡子三年斬衰而不去官尊祖重嫡崇其禮殺其情也孝莫大於嚴父故父在為母免官齊而菴心喪三年情已申而禮殺也自堯舜周公孔子所同而今捨尊厭之重虧嚴父之義謂之禮可乎姨兼從母之名以母之女黨加以舅服不為無禮嫂叔不服則遠嫌也請據古為適帝弗報是時言喪服各以所見奮交口紛騰七年乃下詔服紀一用古制自是人間父在為母服或菴而禫禫而釋心喪三年或菴而禫終三年或齊衰三年後履冰以官卒

王仲丘沂州琅邪人祖師順仕高宗議濟輸事有名當時終司門郎中仲丘開元中歷左補闕內供奉集賢脩撰起居舍人時典章差駁仲丘欲合貞觀顯慶二禮據有其舉之莫可廢之之誼即上言貞觀禮正月上辛祀感帝於南郊顯慶禮祀昊天上帝於圓丘以祈穀臣謂詩春夏祈穀於上帝禮上辛祈穀於上帝則上帝當昊天矣鄭玄曰天之五帝遞王王者必感一以興故夏正月祭所生於郊以其祖配之因以

祈穀感帝之祀貞觀用之矣請因祈穀之壇遍祭五方帝五帝者五行之精九穀之宗也請二禮皆用貞觀禮零祀五方上帝五人帝五官於南郊顯慶禮祀昊天上帝於圓丘臣謂零上帝為百穀祈甘雨故月令大雩帝用盛樂鄭玄說帝上帝也乃天別號祀於圓丘尊天位也顯慶祀昊天與月令合而貞觀嘗祀五帝矣請二禮皆用貞觀禮季秋祀五方帝五官於明堂顯慶禮祀昊天上帝於明堂臣謂周郊祀后稷以配天宗祀文王於明堂以配上帝先儒以天為感帝引太微五帝著之上帝則屬之昊天鄭玄稱周官旅上帝祀五帝各文而異禮不容并而為一故於孝經天上帝申之曰上帝亦天也神無二主但異其處以避后稷今顯慶享上帝合於經然貞觀嘗祀五方帝矣請二禮皆用詔可遷禮部員外郎卒贈祕書少監

康子元越州會稽人仕歷獻陵令開元初詔中書令張說舉能治易老莊者集賢直學士侯行果薦子元及平陽敬會真於說說藉以聞並賜衣幣得侍讀子元擢累祕書少監會真四門博士俄皆兼集賢侍講學士玄宗將東之泰山說引子元行果徐堅韋縉商載封禪儀初高宗之封中書令許敬宗議周人尚臭故前祭而燔柴說堅子元白奏周官樂六變天神降是降神以樂非緣燔也宋齊以來皆先嚼福酒乃燎請先祭後燔如貞觀禮便行果與趙冬曦議以為先燎降神尚矣若祭已而燔神無由降子元議誕不徒

說曰康子獨出象輪以當一隊邪議未判說請決於帝帝詔後燔乘輿自營還滅從官先次東都唯子元毋嬰章述以學士從久乃徙宗正少卿以疾授祕書監致仕卒贈汴州刺史帝嘗制贊賜說子元命工圖其像詔冬曦述更分為傳行果者上谷人歷國子司業侍皇太子讀卒贈慶王傅始行果會真及長樂馮朝隱同進講朝隱能推索老莊祕義會真亦善老子每啟篇先薰盥乃讀帝曰我欲更求善易者然無賢行果云朝隱終太子右諭德會真太學博士

趙冬曦定州鼓城人進士擢第歷左拾遺神龍初上書曰古律條目千餘隋時姦臣侮法著律曰律無正條者出罪舉重以明輕入罪舉輕以明重一辭而廢條目數百自是輕重訟愛憎被罰者不知其然使賈誼見之慟哭必矣夫法易知則下不敢犯而遠機穽文義深則吏乘便而朋附盛律令格式謂宜刊定科條直書其事其以準加減比附量情及舉輕以明重不應為之類皆勿用使愚夫愚婦相率而遠罪犯者雖貴必坐律明則人信法一則主尊當時稱是開元初遷監察御史坐事流岳州召還復官與祕書少監賀知章校書郎孫季良大理評事咸廩業入集賢院脩撰是時將仕郎王嗣琳四門助教范仙廈為校勘翰林供奉呂向東方顯為校理未幾冬曦知史官事遷考功員外郎踰年與季良廩業知章呂向皆為直學士冬曦俄遷中書舍人內供奉以國子祭酒卒冬曦性放達不屑世事兄夏日弟和壁安貞居貞頤貞

彙貞皆擢進士第安貞給事中居貞吳郡採訪使頤貞安西都護居貞子昌別傳王嗣琳以太子校書郎
罷東方顯上書忤旨左遷高安丞廩業亦坐事左遷餘杭令仙履善講論後爲道士開元集賢學士又有
尹愔陸堅鄭欽說盧僕名稍著

尹愔秦州天水人父思貞字季弱明春秋擢高第嘗受學於國子博士王道珪稱之曰吾門人多矣尹子
叵測也以親喪哀毀除喪不仕左右史張說尹元凱薦爲國子大成每釋奠講辨三教聽者皆得所未聞
遷四門助教讀諸經義樞續史記皆未就夢天官麟臺交辟寤而會親族敘訣二日卒年四十愔博學尤
通老子書初爲道士玄宗尙玄旨有薦愔者召對喜甚厚禮之拜諫議大夫集賢院學士兼脩國史固辭
不起有詔以道士服視事乃就職顯領集賢史館圖書開元末卒贈左散騎常侍

陸堅河南洛陽人初爲汝州參軍以友婿李憇伏誅貶涪州參軍再遷通事舍人有詔起復遣中官敦諭
不就以給事中兼學士善書初名友悌玄宗嘉其剛正更賜名從封泰山封建安男帝待之甚厚圖形禁
中親制贊以祕書監卒年七十一贈吏部尙書諡曰懿

鄭欽說後魏濮陽太守敬叔八世孫開元初繇新津丞請試五經擢第授鞏縣尉集賢院校理歷右補闕
內供奉通憲衛博物初梁太常任昉大同四年七月於鍾山嶺中得銘曰龜言土善言水旬服黃鍾散靈

地瘠在三上庚唯通七中已六千三百浹辰交二九重三因百圯當時莫能辨者因藏之戒諸子曰世世
以銘訪通人有知之者吾死無恨昉五世孫升之隱居商洛寫以授欽說欽說出使得之於長樂驛至數
水三十里而悟曰卜宅者度葬之歲月而先議墓地日辰旬服五百也黃鍾十一也繇大同四年卻求漢
建武四年凡五百一十一年葬以三月十日庚寅三上庚也地以七月十二日己巳七中己也浹辰十二
也建武四年三月至大同四年七月六千三百一十二月月一交故曰六千三百浹辰交二九十八也重
三六也建武四年三月十日距大同四年七月十二日十八萬六千四百日故曰二九重三四百圯升之
大驚服其智欽說雅爲李林甫所惡韋堅死欽說時位殿中侍御史常爲堅判官貶夜郎尉卒子克鈞爲
都官郎中吐蕃圍靈州軍餉匱竭德宗以克鈞爲靈夏二州運糧使轉米峙塞下守者遂安

盧僎吏部尙書從願三從父也自聞喜尉爲學士終吏部員外郎兄備中宗時歷右補闕默啜入寇敗沙
吒忠義詔百官陳破賊勝策獨備上疏以爲治內可以及外賞罰明則士盡節鳴沙之役主將先遁中軍
猶能死戰正法紀功則戒行可勸若忠義騎將材不可當大任宜因古法募人徙邊免行役次廬伍明教
令賞虜獲近戰則守家遠戰則利貨購辯勇結諸蕃以圖攻取擇邊州刺史蒐乘積粟謹烽燧以備守中
宗善其言然無施行者備終祕書少監

曠助字叔佐趙州人後徙關中淹該經術天寶末調臨海尉丹陽主簿秩滿屏居甘足疏糗善爲春秋考三家短長縫菴漏闕號集傳凡十年乃成復攝其綱條爲例統其言孔子脩春秋意以爲夏政忠忠之敝野商人承之以敬敬之敝鬼周人承之以文文之敝僂救僂莫若忠夫文者忠之末也設教於本其敝且未設教於末敝將奈何武王周公承商之敝不得已用之周公沒莫知所以改故其敝甚於二代孔子傷之曰虞夏之道寡怨於民商周之道不勝其敝故曰後代雖有作者虞帝不可及已蓋言唐虞之化難行於季世而夏之忠當變而致焉故春秋以權輔用以誠斷禮而以忠道原情云不拘空名不尙狷介從宜採亂因時黜陟古語曰商變夏周變商春秋變周而公羊子亦言樂道堯舜之道以擬後聖是知春秋用二帝三王法以夏爲本不壹守周典明矣又言幽厲雖衰雅未爲風逮平王之東人習餘化苟有善惡當以周法正之故斷自平王之季以隱公爲始所以拯薄勉善拯周之敝革禮之失也助愛公穀二家以左氏解義多謬其書乃出於孔氏門人且論語孔子所引率前世人老彭伯夷等類非同時而言左氏明恥之巨亦恥之巨明者蓋如史佚遲任者又左氏傳國語屬綴不倫序事乖刺非一人所爲蓋左氏集諸國史以釋春秋後人謂左氏便傳著巨明非也助之鑿意多此類助門人趙匡陸質其高弟也助卒年四十七質與其子異稟錄助所爲春秋集註總例請匡損益質纂會之號纂例匡者字伯循河東人歷羊州刺史質所稱爲趙夫子者大曆時助匡質以春秋施士句以詩仲子陵袁彞章形章以禮蔡廣成以易強蒙以論語皆自名其學而士句子陵最卓異士句吳人兼善左氏春秋以二經教授繇四門助教爲博士秩滿當去諸生封疏乞留凡十九年卒於官弟子共葬之士句譏春秋傳未甚傳後文宗喜經術宰相李石因言士句春秋可讀帝曰朕見之矣穿鑿之學徒爲異同但學者如浚井得美水而已何必勞苦旁求然後爲得邪子陵蜀人好古學舍峨眉山舉賢良方正擢太常博士通后蒼大小戴禮有司請正太祖東嚮位而遷獻懿二主子陵議藏主德明興聖廟其言典正後異論紛洄復爲通難示諸儒諸儒不能曲久之典黔中選補乘傳過家西人以爲榮終司門員外郎子陵以文義自怡及亡其家所存惟圖書及酒數斛而已

贊曰春秋詩易書由孔子時師弟子相傳歷暴秦不斷如系至漢興劉挾書令則儒者肆然講授經典遼興左氏與孔子同時以魯史附春秋作傳而公羊高穀梁赤皆出子夏門人三家言經各有回舛然猶悉本之聖人其得與失蓋十五義或繆誤先儒畏聖人不敢輒改也曠助在唐名治春秋據誦三家不本所承自用名學憑私臆決尊之曰孔子意也趙陸從而唱之遂顯于時嗚呼孔子沒乃數千年助所推著果其意乎其未可必也以未可必而必之則固持一己之固而倡茲世則誣誣與固君子所不取助果謂可

乎徒令後生穿鑿詭辨詭前人捨成說而自爲紛紛助所階已

韋彤京兆人四世從祖方質爲武后時宰相彤名治禮德宗時爲太常博士先此天寶中詔尙食朔望進食太廟天子使中人侍祠有司不與也貞觀十二年帝始詔朔望食昇宗正太常合供於是彤與博士裴堪議曰禮宗廟朔望不祭園寢則有之貞觀開元間在禮若令不敢變古天寶中始有進食事殆王璵緣生事亡用燕具饗饌參瀆禮薦不可示遠傳曰祭非外至生於心者也是故聖人等牲牢布籩豆昆蟲草木可薦者莫不咸在所以享宗廟交神明全孝敬也潔膳羞八珍百品可嗜之饗美臠甘旨謂之饗味所以燕賓客接人情示慈惠也是則薦與宴聖人判爲二物不可亂也今若熟饗而享非以異爲敬之意且祭不欲數亦不欲疏感時致享以制中也今園寢月二祭不爲疏廟歲五享不爲數有司奉承得盡其恭若又加盛饌於朔望是失禮之中有司不得盡其恭也故王者稽古弗敢以孝思之極而溢禮弗敢以肴品之多而賸味願罷天寶所增奉園寢以珍奉宗廟以禮兩得所宜帝曰是禮先帝裁定遠更之其謂朕何徐議其可而朔望食卒不廢會昭陵寢宮爲原火延燔而客祭瑤臺佛寺又故宮在山上乏水泉作者憚勞欲卽行宮作寢詔宰相百官議吏部員外郎楊於陵議曰園寢非二代制自秦漢以來附陵置寢或

建若園則無闕焉韋玄成等議園寢於興廢初無適語且寢宮所占在柏城中拒凌不遠使諸寢之寢皆有區限故不可徙若止柏城則故寢已燬行宮已久因以治飾亦復何嫌或曰太宗創業寢宮不輒易是

不然夫陵域宅神神本靜今大興荒廢曷役密邇非幽窅所安改之便彤曰先王建都立邑不利則爲之遷況有故邪今文寢災徙而宮之非無故也神安於徙因而建寢於禮至順又它陵皆在柏城隨便營作不越封兆力省易從帝重改先帝制還宮山顛彤卒後武宗會昌五年詔京城不許羣臣作私廟宰相李德裕等引彤所議古制廟必中門之外吉凶皆告以親而尊之不自專也今俾立廟京外不能得其意於禮宮之南九坊三坊曰園外地荒左立廟無嫌餘六坊可禁詔不許聽準古卽居所立廟

陳京字慶復陳宜都王叔明五世孫父兼爲右補闕翰林學士京善文辭常褒稱之妻以兄子擢進士第遷累太常博士德宗在奉天聞段秀實爲賊所害七日不朝宰相以爲方多難時不宜壅萬機天下其謂何京曰丞相之言非也夫褒大節郵賢臣天下所以安況卓卓特異者乎帝曰善還京師擢左補闕帝以盧杞爲饒州刺史京與趙需裴佶宇文炫盧景亮張薦共劾杞輔政要位大臣踰時月不得對百官懷懼常若兵在頸陛下復用之姦賊唾掌復興帝不聽京等爭尤確帝大怒左右辟易諫者稍引卻京正色曰儒等毋遽退極道不可以死請杞遂廢帝之立迎訪太后久不得意且怠京密白第遣使物色以求帝大悟終代不敢置初玄宗肅宗旣附室遷獻懿二祖於西夾室引太祖位東嚮禮儀使于休烈議獻懿屬尊

於太祖若合食則太祖位不得正請藏二祖神主以太宗中宗睿宗肅宗從世祖南向高宗玄宗從高祖
北向禘祫不及二祖凡十八年建中初代宗喪畢當大禘京以太常博士上言春秋之義毀廟之主陳於
太祖未毀廟之主合食於祖無毀廟遷主不享之言唐家祀制與周異周以后稷爲始封祖而毀主皆在
后稷下故太祖東向常統其尊司馬晉以高皇太皇征西四府君爲別廟大禘祫則正太祖位無所屈別
廟祭高太以降所以敘親也唐家宜別爲獻懿二祖立廟禘祫則祭太祖遂正東向位德明興聖二帝向
已有廟則藏祔二祖爲宜詔百官普議禮儀使太子少師顏真卿曰今議者有三一謂獻懿親遠而遷不
當祫宜藏主西室二謂二祖宜祫食與太祖並昭穆闕東向位三謂引二祖祫祫即太祖永不得全其始
宜以二主祔德明廟雖然於人神未厭也景帝既受命始封矣百代不遷矣而又配天尊無與上至禘祫
時暨屈昭穆以申孝尊先實明神之意所以教天下之孝也況晉蔡謨等有成議不爲無據請大禘享奉
獻主東向懿主居昭景主居穆重本尚順爲萬代法夫祫合也有如別享德明是乃分食非合食也時議
者舉然於是還獻懿主祫於廟如真卿議貞元七年太常卿裴郁上言商周以高稷爲祖上無餘尊故合
食有序漢受命祖高皇帝故太上皇不以昭穆合食魏祖武帝晉祖宣帝故高皇處士征西等君亦不以
昭穆合食景皇帝始封唐唐推祖焉而獻懿親盡廟遷猶居東向非禮之祀神所不享願下羣臣議於是
太子左庶子李嶠等上言禮按晉孫資請太祖以前雖有主禘祫所不及其所及者太祖後未毀已升藏
於二祧者故雖百代及之獻懿在始封前親盡主遷上擬三代則禘祫所不及太祖而下若世祖則春秋
所謂陳於太祖者漢議罷郡國廟丞相韋玄成議太上皇孝惠親盡宜毀太上主宜瘞於園惠主遷高廟
太上皇在太祖前主瘞於園不及禘祫獻懿比也惠遷高廟在太祖後而及禘祫世祖比也魏明帝遷虛
土主置園邑歲時以令丞奉薦東晉以征西等祖遷入西除同謂之祧皆不及祀故唐初下詔開元禘祫
猶虛東向位洎立九廟追祖獻懿然祝於三祖不稱臣至德時復作九廟遂不爲弘農府君主以祀不及
也廣德中始以景皇帝當東向位以獻懿兩主親盡罷祫而藏顏真卿引蔡謨議復奉獻主東向懿昭景
穆不記謨議晉未嘗用而唐一王法容可準乎臣等謂嘗禘郊社無二尊瘞毀遷藏各以義斷景皇帝已
東向一日改易不可謂禮宜復藏獻懿二主於西室以本祭法遠廟爲祧去祧而壇去壇而壇壇壇有禘
祭無禘止之義太祖得正無所屈吏部郎中柳冕等十二人議曰天子以受命之君爲太祖諸侯以始封
之主爲祖故自太祖祖以下親盡迭毀洎秦滅學漢不暇禮晉失宋因故有連王廟之制有虛太祖之位
且不列昭穆非所謂有序不違迭毀非所謂有殺連王廟非所謂有別虛太祖位非所謂一尊此禮所由
廢也傳曰父爲士子爲天子祭以天子葬以士今獻懿二祖在唐未受命時猶士也故高祖太宗以天子

之禮祭之而不敢奉以東向位今而易之無乃亂先帝序乎周有天下追王大王王季以天子禮及其祭則親盡而毀漢有天下尊太上皇以天子之禮及祭也親盡而毀唐家追王獻懿二祖以天子禮及其祭也親盡而毀復何所疑周官有先公之祧先王之祧先公遷主藏后稷之廟其周末受命之祧乎先王遷主藏文武之廟其周已受命之祧乎故有二祧所以異廟也今自獻而下猶先公也自景而下猶先王也請別廟以居二祖則行周道復古制便工部郎中張薦等請自獻而降悉入昭穆虛東向位司勳員外郎裴樞曰禮親親故尊祖尊祖故敬宗敬宗故收族收族故宗廟嚴宗廟嚴故社稷重太祖之上復追尊焉則尊祖之義乖太廟之外別祭廟焉則社稷不重漢章立成請瘞主於園晉虞喜請瘞廟兩皆間喜據左氏自證曰先王日祭祖考月祀會高時享及二祧歲祫及壇墠終禘及郊宗石室是謂郊宗之祖喜請夾室中爲石室以處之是不然何者夾室所以居太祖下非太祖上藏主所居未有卑處正尊居傍也若建石室於園寢安遷主采漢晉舊章祫禘率一祭庶乎春秋得變之正是時京以考功員外郎又言興聖皇帝則獻之曾祖懿之高祖以曾孫祔曾高之廟人情大順也京兆少尹韋武曰祫則大合禘則序祫當祫之歲常以獻京向率懿而後以昭穆極親親及禘則太祖筵於西列衆主左右於是太祖不爲降獻無所厭時諸儒以左氏子齊聖不先父食請迎獻主權東向太祖暫遷位同官尉仲子陵曰所謂不先食者已明正文公逆祀儒者安知夏后世數未足時言禹不先禘乎魏晉始祖率近始祖上皆有遷主引國書詩則承闕可也因虞主則瘞園可也緣違祧則築宮可也以太祖實卑則虛位可也然承闕與瘞園臣子所不安若虛正位則太祖之尊無時而申請奉獻懿二祖遷於德明興聖廟爲順或曰二祖別廟非合食且德明興聖二廟禘祫之年皆有薦饗是已分食奚獨疑二祖乎國子四門博士韓愈質衆議自申其說曰一謂獻懿二主宜永藏夾室臣不謂可且禮祫祭毀主皆合食今藏夾室至禘得不食太廟乎若二祖不豫不謂之合矣二謂兩主宜毀而瘞之臣不謂可禮天子七廟一壇一墠遷主皆藏於祧雖百代不毀祫則太廟享焉魏晉以來始有毀瘞之議不見於經唐家立九廟以周制推之獻懿猶在壇墠可毀瘞而不禘祫乎三謂二祖之主宜各遷諸陵臣不謂可二祖享太廟二百年一日遷之恐眷顧依違不即享於下國四謂宜奉主祔興聖廟而不禘祫臣不謂可禮祭如在景皇帝雖太祖於獻懿子孫也今引子東向廢父之祭不可謂典五謂獻懿宜別立廟京師臣不謂可凡禮有降有殺故去廟爲祧去祧爲壇去壇爲墠去墠爲鬼漸而遠者祭益希晉立煬宮春秋非之謂不當取已毀之廟既藏之主復築宮以祭今議正同故臣皆不謂可古者殷祖多王周祖后稷太祖之上皆自爲帝又世數已遠不復祭之故始禘得東向也景皇帝雖太祖於獻懿子孫也當禘祫獻祖居東向位景從昭若穆是祖以孫尊孫以祖屈神道人

情其不相違又常祭衆合祭寡則太祖所屈少而所伸多與其伸孫尊廢祖祭不以順乎冕又上禘禴議證十四篇帝詔尙書省會百官國子儒官明定可否左司郎中陸淳奏按禮及諸儒議復太祖之位正也太祖位正則獻懿二主宜有所安今議者有四曰藏夾室曰置別廟曰各遷於園曰祔興聖廟臣謂藏夾室則享獻無期非周人藏二祧之義置別廟論始曹魏禮無傳焉司馬晉議而不用遷諸園亂宗廟之制唯祔興聖廟祔若祫一祭庶乎得禮帝依違未決也十九年將禘祭京復奏禘祭大合祖宗必尊太祖位正昭穆請詔百官議尙書左僕射姚南仲等請奏獻懿主祔德明興聖廟鴻臚卿王權申衍之曰周人祖文王宗武王故詩清廟章曰祀文王也故不言太王王季則太王王季而上皆祔后稷故清廟得祀文王也太王王季之尊私禮也祔后稷廟不敢以私奪公也古者先王遷廟主以昭穆合藏於祖廟獻懿主宜祔興聖廟則太祖東向得其尊獻懿主歸得其所是時言祔興聖廟什七八天子尙猶豫未刪定至是羣臣稍顯言二祖本追崇非有受命開國之鴻構又權根援詩禮明白帝泮然於是定遷二祖於興聖廟凡禘祫一享詔增廣興聖一室會祀日薄廟未成張繪爲室內神主廟垣間奉興聖德明主居之廟成而祔自是景皇帝遂東向京自博士獻議彌二十年乃決諸儒無後言帝賜京緋衣銀魚昭陵寢占山上宦侍懼輒汲之請更其所密相未能抗京曰此太宗之志其儉足以爲後世法不可改議者多附宦人帝曰京謙善卒不從帝嘗京謂有宰相才欲用之會病狂易自束弗效又言中書舍人崔胤使中丞李漢言曰

帝使請辨無狀然猶自考功員外再遷給事中皆兼集賢殿學士帝疑京爲忌者中傷中人問賈相繼後對延英帝諭遣京沮駭走出罷爲祕書少監卒初帝討李希烈財用屈京與戶部侍郎趙贊請稅民屋架籍賈人貨力以率貸之憲宗嘗問宰相李吉甫我在藩邸聞德宗播遷梁漢久乃復誰寔召亂爲我言之對曰德宗始卽位躬行慈儉引崔祐甫輔政四方企望至治祐甫歿宰相非其人姦佞營壘謂河北叛臣可以力服甘語先入主聽惑焉而陳京趙贊爲帝稅屋架貸賈繆內怨外忿身及大亂咎與信宵人剝下佐上賴天之靈敗不抵亡帝恨惋曰京與贊真賊臣京無子以從子襲嗣襲孫伯宣辭著作佐郎不拜贊曰德宗敝政稅間架借商錢宮市爲最甚順宗爲太子欲極陳之懲王叔文之諫而止其畏如此區區之臣昌顏而關說難哉其饜國日淺志不在民矣憲宗聞暴斂之令首於賊臣感憤太息愛人之至也及任程昇皇甫鏞諫者不聽興利之臣敗君之德甚矣

年喪既葬除服魏亦以既葬爲節皇太子興國爲體若不變除則東宮臣僕亦以衰麻出入殿省太子遂以卒哭除服貞觀十年六月文德皇后崩十一月而葬太子喪服之節國史不書至明年正月以晉王爲并州都督既命官當已除矣今皇太子宜如魏晉制既葬而虞虞而卒哭卒哭而除心喪三年宰相劉滋齊映召問當等子食於有喪者之側未嘗飽也今太子以衰服侍膳至葬可乎令羣臣齊衰三十日公除宜約以爲服限乃請如宋齊皇后爲其父母服三十日除入謁則服墨慘還宮衰麻右補闕穆質上疏曰三年之喪自天子達於庶人漢文帝以宗廟社稷之重自貶乃以日易月後世所不能革太子人臣也不得如人君之制母喪宜無厭降惟晉既葬公除議者詭辭以甘時主不足師法今有司之議虧化敗俗常情所鬱夫政以德爲本德以孝爲大後世記禮之失自今而始顧不重哉父在爲母替古禮也國朝服之三年臣謂三年則太重唯行古爲得禮德宗遣內常侍馬欽敘謂質曰太子有撫軍監國問安侍膳之事有司以三十日除既葬釋服以墨衰終是何疑邪質又奏疏曰太子於陛下子道也臣道也君臣以義則撫軍監國有權奪父子問安侍膳固無服衰之嫌古未有服衰而廢者舒王以下服三年將不得問安侍膳邪太子舒王皆臣子也不宜甚異且皇后天下之母其父母士庶也以天下之母爲士庶降服可也太子臣子也以臣子爲母降可乎公除非古也入公門變服今替喪以下慘制是也太子晨昏侍非公除此

墨衰奪情事緣金革今不監國撫軍何攝奪邪子之於父母應異而情地太子君君之於臣

少忍使失令名哉乃詔宰臣與有司更議當等曰禮有公門脫齊衰開元禮皇后父母服十二月從朝旨則十三日而除皇太子外祖父母服五月從朝旨則五日而除恐喪服入侍傷至尊之意非特以金革奪也太子公除以墨慘奉朝歸宮衰麻酌變爲制可也宰相乃令太常卿鄭叔則草奏既葬卒哭十一月小祥十三月大祥十五日禫內謁卽墨服復詔問質質以爲雖不能循古禮猶愈於魏晉之文遠甚宰相乃言太子居皇后喪至朝則抑哀承慈實臣子至行唯心與服內外宜稱今質請降詔於外無害墨衰於內臣謂言行於外而服異於內事非至誠乖於德教請下明詔如叔則議天子從之及董晉代叔則爲太常卿帝曰皇太子服期絲諫官初非朕意暢當等請循魏晉故事至論也當以果州刺史卒

林蘊字復夢泉州莆田人父披字茂彥以臨汀多山鬼淫祠民厭若之讓無鬼論刺史樊晃奏署臨汀令以治行遷別駕蘊世通經西川節度使韋臯辟推官劉闢反蘊曉以逆順不聽復遺書切諫闢怒械於獄且殺之將就刑大呼曰危邦不入亂邦不居得死爲幸矣闢惜其直陰戒刑人抽劍磨其頸以脅服之蘊叱曰死卽死我頸豈頑奴砥石邪闢知不可服捨之斥爲唐昌尉及闢敗蘊名重京師李吉甫李絳武元衡爲相蘊貽書諷以國家有西土猶右臂也今臂不附體北彌幽郊西極汧隴不數百里爲外域涇原鳳

翔邠寧三鎮皆右臂大藩擁旄鉞數十百人唯李抱玉請復河湟命將不得其人宜拔行伍之長使守秦隴王者功成作樂治定制禮有權臣制樂曲自立喪紀舜命契百姓弗親五品不遜汝作司徒唐以臯佑鏐季安爲司徒官不擇人盧從史于臯嘗罪大而刑輕農桑無百分之一農夫一人給百口蠶婦一人供百身竭力於下者飢不得食寒不得衣邊兵菜色而將帥縱侈自養中人十戶不足以給一無功之卒百卒不足奉一驕將大事皆當時極微蘊亦章臯所引重嫉其專制感憤關說然嗜酒多忤物宰相置不用也滄景程權辟掌書記既而權上四州版籍請吏而軍中習熟擅地畏內屬挾權拒命不得出蘊陳君臣大誼諭首將人人釋然於是權得去蘊遷禮部員外郎刑部侍郎劉伯芻薦之於朝出爲邵州刺史嘗杖殺客闖玄之投尸江中籍其妻爲倡復坐贓杖流儋州而卒蘊辯給嘗有姓崔者矜氏族蘊折之曰崔杼弑齊君林放問禮之本優劣何如邪其人俯首不能對

韋公肅隋儀同觀城公約七世孫元和初爲太常博士兼脩議憲宗將耕籍詔公肅草具儀典容家善之太子少傅判太常卿事鄭餘慶廟有二祖妣疑於祔祭請諸有司公肅議古諸侯一娶九女故廟無二嫡自秦以來有再娶前娶後繼皆嫡也兩祔無嫌晉驃騎大將軍溫嶠繼室三疑並爲夫人以問大學博士陳紆紆曰妻雖先沒榮辱並從夫禮祔於祖姑祖姑有三則各祔舅之所生是皆夫人也生以正禮沒不

用祔於是遂用紆議且嫡繼於古有殊制於今無異等祔配之典安得不同卿士之寢祭二妻廟享可異

乎古繼以媵妾今以嫡妻不宜援一娶爲比使子孫榮享不逮也或曰春秋魯惠公元妃孟子卒繼室以聲子聲子孟姪娣也不入惠廟宋武公生仲子歸於魯生桓公而惠薨立宮而奉之不合於惠公而別宮者何追父志也然其比奈何曰晉南昌府君廟有荀薛兩氏景帝廟有夏侯羊兩氏唐家睿宗室則昭成肅明二后故太師顏真卿祖室有殷柳兩氏二夫人並祔故事則然諸儒不能異初睿宗祥月太常奏朔望弛朝尚食進蔬具止樂餘日御便殿具供奉仗中書門下官得侍它非奏事毋謁前忌與晦三日後三日皆不聽事忌晦之明日百官叩側門通慰後遂爲常及是公肅上言禮忌日不樂而無忌月唯晉穆帝將納后疑康帝忌月下其議有司於是荀納王洽等引忌時忌歲譏破其言今有司承前所禁在二十五月限有弛朝徹樂事喪除則禮革王者不以私懷踰禮節故禫禮從月樂漸去其情也不容追遠而立禮反重今茲太常雖郊廟樂且停習是謂反重以慢神也有司悉禁中外作樂是謂無故而徹也願依經誼裁正其違有詔中書門下召禮官學官議咸曰宜如公肅所請制可以官壽卒

許康佐貞元中舉進士宏辭連中之家苦貧母老求爲知院官人譏其不擇祿及母喪已除凡辟命皆不答人乃知其爲親屈由是有名遷侍御史以中書舍人爲侍講學士與王起皆爲文宗寵禮帝讀春秋至

闕弒吳子餘祭問闕何人邪康佐以中官方彊不敢對帝嘻笑罷後觀書蓬萊殿召李訓問之對曰古關
寺今宦人也君不近刑臣以為輕死之道孔子書之以為戒帝曰朕邇刑臣多矣得不慮哉訓曰列聖知
而不能遠惡而不能去陛下念之宗廟福也於是內謀翦除矣康佐知帝指因辭疾罷為兵部侍郎遷禮
部尚書卒贈吏部諡曰懿其諸弟皆擢進士第而堯佐最先進又舉宏辭為太子校書郎八年康佐繼之
堯佐位諫議大夫

唐書卷二百一

唐書卷二百一

宋 端 明 殿 學 士 宋 祁 撰

列傳第一百二十六

文藝上

唐有天下三百年文章無慮三變高祖太宗大難始夷汾江左餘風絺句繪章揣合低叩故王楊為之伯
玄宗好經術羣臣稍厭雕琢索理致崇雅黜浮氣益雄渾則燕許擅其宗是時唐興已百年諸儒爭自名
家大庠正元間美才輩出擢嶠道真涵泳聖涯於是韓愈倡之柳宗元李翱皇甫湜等和之排逐百家法
度森嚴抵轆晉魏上軌漢周唐之文完然為一王法此其極也若侍從酬奉則李嶠宋之問沈佺期王維
制冊則常袞楊炎陸贄權德輿王仲舒李德裕言詩則杜甫李白元稹白居易劉禹錫誦怪則李賀杜牧
李商隱皆卓然以所長為一世冠其可尚已然嘗言之夫子之門以文章為下科何哉蓋天之付與於君
子小人無常分惟能者得之故號一藝自中智以還恃以取敗者有之朋姦飾僞者有之怨望訕國者有
之若君子則不然自能以功業行實光明于時亦不一于立言而垂不腐有如不得試固且闡繹優游異
不及排怨不及諱而不忘納君於善故可貴也今但取以文自名者為文藝篇若韋應物沈亞之閻防祖

乾隆四年校刊

唐書卷二百一列傳

一

蘇薛能鄭谷等其類尚多皆班班有文在人間史家逸其行事故弗得述云

袁朗其先雍州長安人父樞仕陳爲尚書左僕射朗在陳爲祕書郎江總尤器之後主聞其才詔爲月賦一篇灑然無留思後主曰謝莊不得獨美於前矣復詔爲芝草嘉蓮二頌歎賞尤厚累遷太子洗馬德敬殿學士陳亡入隋歷尚書儀曹郎武德初隱太子與秦王齊王相傾爭致名臣以自助太子有詹事李綱賈軌庶子裴矩鄭善果友賀德仁洗馬魏徵中舍人王珪舍人徐師謨率更令歐陽詢典膳監任瓌直典書坊唐臨隴西公府祭酒韋挺記室參軍事庾抱左領大都督府長史唐憲秦王有友于志靈記室參軍事房玄齡虞世南顏思魯諮議參軍事竇綸蕭景兵曹杜如晦鍾曹褚遂良士曹戴胄閻立德參軍事薛元敬蔡允恭主簿薛收李道玄典籤蘇幹文學姚思廉褚亮燉煌公府文學顏師古右元帥府司馬蕭瑀行軍元帥府長史屈突通司馬竇誕天策府長史唐儉司馬封倫軍諮祭酒蘇世長兵曹參軍事杜淹倉曹李守素參軍事顏相時齊王有記室參軍事榮九思戶曹武士逸典籤裴宣儼朗爲文學從父弟承序亦有名王召爲文學館學士朗累封汝南縣男再轉給事中卒太宗爲廢朝一日謂高士廉曰朗任淺而性謹厚使人悼惜詔給喪費存問其家朗遠祖滂爲漢司徒自滂至朗凡十二世其間位司徒司空者四世淑顯察皆死宋難昂著節齊梁時朗自以中外人物爲海內冠雖張邢王氏鍾爲公卿特以累朝生而有功不爲任郎孫詔而功中爲蘇州刺史司馬張浦者侍中文瑒子嘗曰滂曰州得一良吏則兩郡安矣天下甲門也誼曰夫門戶者歷世名節爲天下所高老夫是也山東人尙婚媾求祿利耳至見危授命則無人焉何足尙邪沛大慙承序爲齊王元吉府學士府廢補建昌令治尙慈簡吏民懷德高宗之爲晉王也太宗崇選僚屬問梁陳名臣子弟誰可者岑文本曰昔陳亡百司奔散有袁憲者朝服立後主傍白刃不避也王世充篡隋羣臣表勸進而憲子給事中承家稱疾不肯署今其少子承序風操清亮無愧先烈帝乃召拜晉王友兼侍讀加弘文館學士卒

朗從祖弟利貞陳中書令敬孫高宗時爲太常博士周王侍讀及王立爲太子百官上禮帝欲大會羣臣命婦合宴宣政殿設九部伎散樂利貞上疏諫以爲前殿路門非命婦宴會倡優進御之所請徙命婦別殿九部伎從左右門入罷散樂不進帝納之既會帝傳詔利貞曰卿棄葉忠鯁能抗疏規朕之失不厚賜無以勸能者乃賜物百段擢祠部員外郎中宗立以舊恩追贈祕書少監

賀德仁越州山陰人父朗終陳散騎常侍德仁與從兄德基師事周弘正以文辭稱人爲語曰學行可師賀德基文質彬彬賀德仁兄弟八人時比漢荀氏太守鄱陽王伯山改所居甘滂里爲高陽云始德仁在陳爲吳興王友入隋楊素薦其材授豫章王記室王遇之厚徙封齊復爲府屬王廢官吏抵罪而德仁以

忠謹獲賞補河東司法參軍素與隱太子善高祖起兵太子封隴西公以德仁爲友庾抱爲記室俄並遷中舍人以年耆不更吏職徙洗馬與蕭德言陳子良皆爲東宮學士貞觀初遷趙王友卒從子紀敬亦博學高宗時紀爲太子洗馬豫修五禮敬率更令兼太子侍讀皆爲崇賢館學士抱者陳御史中丞衆孫開皇中爲延州參軍入調吏部尙書牛弘給筆札令自序援筆而成爲元德太子學士會嫡皇孫生大宴坐中獻頌太子嗟賞及在隴西府文檄皆出其手

蔡允恭荊州江陵人後梁左民尙書大業子美姿容工爲詩仕隋歷起居舍人煬帝有所賦必令諷誦遣教宮人允恭恥之數稱疾授內史舍人俾入宮固辭繇是疎斥帝遇弒經事宇文化及竇建德歸國爲秦王府參軍文學館學士貞觀初除太子洗馬卒著後梁春秋

謝偃衛州衛人本姓直勒氏祖孝政仕北齊爲散騎常侍改姓謝偃在隋爲散從正員郎貞觀初應詔對策高第歷高陵主簿太宗幸東都方穀洛壞洛陽宮詔求直言偃上書陳得失帝稱善引爲弘文館直學士遷魏王府功曹嘗爲麀影賦二篇帝美其文召見欲偃作賦先爲序一篇頗言天下又安功德茂盛意授偃使賦偃緣帝指名篇曰述聖帝悅賜帛數十初帝卽位直中書省張蘊古上大寶箴諷帝以民畏而未懷其辭挺切擢大理丞偃又獻惟皇誠德賦其序大略言治忘亂安忘危逸忘勞得忘失四者人主莫所以亡朝萬國則思己所以尊巡府庫則思今所以得視功臣則思其輔佐之始見名將則思用力之初如此則人無易心天下何患乎不化哉且行之堯舜暮失之桀紂豈異人哉其賦蓋規帝成功而自處至難云又譏玉謀真紀以勸封禪時李百藥工詩而偃善賦時人稱李詩謝賦府廢終湘潭令蘊古洹水人敏書傳曉世務文擅當時後坐事誅

崔信明青州益都人高祖光伯仕後魏爲七兵尙書信明之生五月五日日方中有異雀鳴集庭樹太史令史良爲占曰五月爲火火主離離爲文日中文之盛也雀五色而鳴此兒將以文顯然雀類微位殆不高邪及長彊記美文章鄉人高孝基嘗語人曰崔生才富爲一時冠但恨位不到耳隋大業中爲堯城令竇建德僞號而信明族弟敬素者爲賊鴻臚卿自謂得意語信明日夏王英武有舉天下心士女襁負而至不可數兄不以此時立功立事豈所謂見幾不俟終日乎答曰昔申胥海隅釣師能固其節爾欲吾屈身賊中求斗筲邪遂踰城去隱太行山貞觀六年有詔卽家拜興勢丞遷秦川令卒信明寔充以門望自負嘗矜其文謂過李百藥議者不許揚州錄事參軍鄭世翼者亦驚偃數忼輕忤物遇信明江中謂曰聞公有楓落吳江冷願見其餘信明欣然多出衆篇世翼覽未終曰所見不逮所聞投諸水引舟去世翼鄭

州樂陽人周儀同大將軍敬德孫貞觀時坐怨謗流死嶺州讓交游傳行於世信明子冬日武后時位黃門侍郎爲酷吏誣死

劉延祐徐州彭城人伯父庠之少志學與孫萬壽李百藥相友善武德中杜淹薦爲信都令有惠政永徽初以著作郎弘文館學士與令狐德棻陽仁卿等議次國史并實錄以勞封陽城縣男終楚州刺史延祐擢進士補渭南尉有吏能治第一李勣戒之曰子春秋少而有美名宜稍自抑無爲出人上延祐欽納後檢校司賓少卿封薛縣男徐敬業敗詔延祐持節到軍時吏議敬業所署五品官殊死六品流延祐謂誣脅可察以情乃論授五品官當流六品以下除名全宥甚衆拜箕州刺史轉安南都護舊僱戶歲半租延祐責全入衆始怨謀亂延祐誅其渠李嗣仙而餘黨丁建等遂叛合衆圍安南府城中兵少不支嬰壘待援廣州大族馮子猷幸立功按兵不出延祐遇害桂州司馬曹玄靜進兵討建斬之

延祐從弟藏器高宗時爲侍御史衛尉卿尉遲寶琳脅人爲妾藏器劾還之寶琳私請帝止其還凡再劾再止藏器曰法爲天下縣衡萬民所共陛下用捨繇情法何所施今寶琳私請陛下從之臣公劾陛下亦從之今日從明日改下何所遵彼匹夫匹婦猶憚失信況天子乎帝乃詔可然內衡之不悅也稍遷比部員外郎監察御史魏元忠稱其賢帝欲擢任爲吏部侍郎魏玄同沮曰彼守道不篤者安用之遂出爲宋

州司馬卒

子知柔性簡靜美風儀居親喪廬墓側詔築闕表之歷國子司業累遷工部尚書開元六年河南大水詔知柔馳驛察民疾苦及吏善惡所表陳州刺史韋嗣立汝州刺史崔日用兗州刺史韋元珪符離令慕母頊等止二十七人有治狀久之遷太子賓客封彭城縣侯致仕給全祿終身遺令薄葬祖載服用皆自處其費贈太子少保諡曰文弟知幾別有傳

張昌齡冀州南宮人與兄昌宗皆以文自名州欲舉秀才昌齡以科廢久固讓更舉進士與王公治齊名皆爲考功員外郎王師旦所絀太宗問其故答曰昌齡等華而少實其文浮靡非令器也取之則後生勸慕亂陛下風雅帝然之貞觀末翠微宮成獻頌闕下召見試息兵詔少選成文帝大悅戒之曰昔禰衡播岳矜己傲物不得死卿才不減二人宜鑒于前副朕所求乃敕於通事舍人裏供奉俄爲崑山道記室平龜茲露布爲士所稱賀蘭敏之奏豫北門修撰卒昌宗官至太子舍人修文館學士撰古文紀年新傳數十篇

崔行功恆州井陘人祖謙之仕北齊終鉅鹿太守徙占鹿泉少好學唐儉愛其才妻以女因倩作文奏高宗時累轉吏部郎中以善占奏常兼通事舍人內供奉坐事貶游安令又召爲司文郎中與蘭臺侍郎李

懷儼並主朝廷大典冊初太宗命祕書監魏徵寫四部羣書將藏內府置讎正三十員書工百員徵從職又詔虞世南顏師古踵領功不就顯慶中罷讎正員聽書工寫于家送官取直使散官隨番刊正至是詔東臺侍郎趙仁本舍人張文瓘及行功懷儼相次充使檢校置詳正學士代散官以勞遷蘭臺侍郎卒孫銑尚定安公主爲太府卿初主降王同皎後降銑主卒皎子繇請與父合葬給事中夏侯銛駁奏主與王氏絕喪當還雀詔可銛猶出爲瀘州都督行功兄子玄暉別有傳

杜審言字必簡襄州襄陽人晉征南將軍預達裔擢進士爲隰城尉恃才高以傲世見疾蘇味道爲天官侍郎審言集判出謂人曰味道必死人驚問故答曰彼見吾判且羞死又嘗語人曰吾文章當得屈宋作衙官吾筆當得王羲之北面其矜誕類此累遷洛陽丞坐事貶吉州司戶參軍司馬周季重司戶郭若訥構其罪繫獄將殺之季重等酒酣審言子并年十三襲刃刺季重於坐左右殺并季重將死曰審言有孝子吾不知若訥故誤我審言免官還東都蘇頌傷并孝烈誌其墓劉允濟祭以文後武后召審言將用之問曰卿喜否審言蹈舞謝后令賦歡喜詩歎重其文授著作佐郎遷膳部員外郎神龍初坐交通張易之流峯州入爲國子監主簿修文館直學士卒太學士李嶠等奏請加贈詔贈著作郎初審言病甚宋之問武平一等省候何如答曰甚爲造化小兒相苦尙何言然吾在久壓公等今且死固大慰但恨不見替人云少與李嶠蘇味道爲文章四友世號崔李蘇杜之七審言爲朋類云

從祖兄易簡九歲能屬文長博學爲岑文本所器擢進士補渭南尉咸亨初歷殿中侍御史嘗道遇吏部尙書李敬玄不避敬玄恨召爲考功員外郎屈之而侍郎裴行儉與敬玄不平故易簡上書言敬玄罪敬玄曰襄陽兒輕薄乃爾因奏易簡險躁高宗怒貶開州司馬審言生子閑閑生甫

甫字子美少貧不自振客吳越齊趙間李邕奇其材先往見之舉進士不中第困長安天寶十三載玄宗朝獻太清宮饗廟及郊甫奏賦三篇帝奇之使待制集賢院命宰相試文章擢河西尉不拜改右衛率府胄曹參軍數上賦頌因高自稱道且言先臣恕預以來承儒守官十一世迨審言以文章顯中宗時臣賴緒業自七歲屬辭且四十年然衣不蓋體常寄食於人竊恐轉死溝壑伏惟天子哀憐之若令執先臣故事拔泥塗之久辱則臣之述作雖不足鼓吹六經至沈鬱頓挫隨時敏給楊雄枚臯可企及也有臣如此陛下其忍棄之會祿山亂天子入蜀甫避走三川肅宗立自鄜州羸服欲奔行在爲賊所得至德二年亡走鳳翔上謁拜右拾遺與房瑄爲布衣交瑄時敗陳濤斜又以客董廷蘭罷宰相甫上疏言罪細不宜免大臣帝怒詔三司雜問宰相張鎰曰甫若抵罪絕言者路帝乃解甫謝且稱瑄宰相子少自樹立爲醇儒有大臣體時論許瑄才堪公輔陛下果委而相之觀其深念主憂義形於色然性失於簡酷嗜鼓琴廷蘭

詔瑄門下貧疾昏老依倚爲非瑄愛惜人情一至玷汙臣歎其功名未就志氣挫衄陛下棄細錄大所以冒死稱述涉近許激違忤聖心陛下赦臣百死再賜骸骨天下之幸非臣獨蒙然帝自是不甚省錄時所在寇奪甫家寓鄜年難寔孺弱至餓死因許甫自往省視從還京師出爲華州司功參軍關輔饑輒棄官去客秦州負薪採橡栗自給流落劍南結廬成都西郭召補京兆功曹參軍不至會嚴武節度劍南東西川往依焉武再帥劍南表爲參謀檢校工部員外郎武以世舊待甫甚善親至其家甫見之或時不巾而性褊躁傲誕嘗醉登武牀睨視曰嚴挺之乃有此兒武亦暴猛外若不爲忤中銜之一日欲殺甫及梓州刺史章彝集吏於門武將出冠鉤于簾三左右白其母奔救得止獨殺彝武卒崔旰等亂甫往來梓夔間大庾中出盟唐下江陵沔沅湘以登衡山因客耒陽游嶽祠大水遽至涉旬不得食縣令具舟迎之乃得還令嘗饋牛炙白酒大醉一昔卒年五十九甫曠放不自檢好論天下大事高而不切少與李白齊名時號李杜嘗從白及高適過汴州酒酣登吹臺慷慨懷古人莫測也數嘗寇亂挺節無所汙爲歌詩傷時憊弱情不忘君人憐其忠云

贊曰唐興詩人承陳隋風流浮靡相矜至宋之間沈佺期等研揣聲音浮切不差而號律詩競相襲沿逮開元間稍裁以雅正然恃華者質反好麗者壯違人得一槩皆自名所長至甫渾灑汪洋茫千變萬狀兼古今而有之它人不足甫乃屬餘發膏髓沾丐後人多矣故元稹謂詩人以來未有如子美者甫又善陳時事律切精深至千言不少衰世號詩史昌黎韓愈於文章慎許可至歌詩獨推曰李杜文章在光燄萬丈長誠可信云

王勃字子安絳州龍門人六歲善文辭九歲得顏師古注漢書讀之作指瑕以隨其失麟德初劉祥道巡行關內勃上書自陳祥道表于朝對策高第年未及冠授朝散郎數獻頌闕下沛王聞其名召署府修撰論次平臺祕略書成王愛重之是時諸王鬪雞勃戲爲文檄英王雖高宗怒曰是且交構斥出府勃既廢客劍南嘗登葛嶺山曠望慨然思諸葛亮之功賦詩見情聞號州多藥草求補參軍倚才陵藉爲僚吏共嫉官奴曹達抵罪匿勃所懼事洩輒殺之事覺當誅會赦除名父福時絳州司功參軍坐勃故左遷交趾令勃往省度海溺水瘞而卒年二十九初道出鍾陵九月九日都督大宴滕王閣宿命其婿作序以夸客因出紙筆徧請客莫敢當至勃沆然不辭都督怒起更衣遣吏伺其文輒報一再報語益奇乃矍然曰天才也請遂成文極歡罷勃屬文初不精思先磨墨數升則酣飲引被覆面臥及寤援筆成篇不易一字時人謂勃爲腹藁尤喜著書初祖通隋末居白牛溪教授門人甚衆嘗起漢魏盡晉作書百二十篇以續古尚書後亡其序有錄無書者十篇勃補完缺逸定著二十五篇嘗謂人子不可不知醫時長安曹元有

祕術勃從之游盡得其要嘗讀易夜夢若有告者曰易有太極子勉思之痛而作易發揮數篇至晉卦會
病止又謂王者乘土王世五十數盡千年乘金王世四十九數九百年乘水王世二十數六百年乘木王
世三十數八百年乘火王世二十數七百年天地之常也自黃帝至漢五運適周土復歸唐唐應繼周漢
不可承周隋短祚乃斥魏晉以降非真主正統皆五行沴氣遂作唐家千歲祿武后時李嗣真請以周漢
爲二王後而廢周隋中宗復用周隋天寶中太平久上言者多以詭異進有崔昌者采勃舊說上五行應
運歷請承周漢廢周隋爲閏右相李林甫亦贊佑之集公卿議可否集賢學士衛包起居舍人閻伯璵上
表曰都堂集議之夕四星聚於尾天意昭然矣於是玄宗下詔以唐承漢黜隋以前帝王廢介鄴公尊周
漢爲二王後以商爲三恪京城起周武王漢高祖廟授崔昌太子贊善大夫衛包司虞員外郎楊國忠爲
右相自稱隋宗建議復用魏爲三恪周隋爲魏王後鄴介二公復舊封貶崔昌烏雷尉衛包夜郎尉閻伯
璵涪川尉

勃兄勳弟助皆第進士劇長壽中爲鳳閣舍人壽春等五王出閣有司具儀忘載冊文羣臣已在乃寤其
闕宰相失色勳召五吏執筆分占其辭粲然皆畢人人嗟服尋加弘文館學士兼知天官侍郎始裴行儉
典選見勳與蘇味道曰二子者皆銜衡才至是語驗勳素善劉思禮用爲箕州刺史與基連繼謀反勳與
兄涇州刺史助及助皆坐誅而龍初諱復官

助字子功七歲喪母哀號隣里爲泣居父憂毀骨立服除爲監察御史裏行初勳勃皆著才名故杜易
簡稱三珠樹其後助劾又以文顯劾早卒福時少子勸亦有文福時嘗詔韓思彥思彥戲曰武子有馬癖
君有譽兒癖王家癖何多耶使助出其文思彥曰生子若是可夸也勃與楊炯照隣略賓王皆以文章
齊名天下稱王楊盧駱四傑炯嘗曰吾媿在盧前恥居王後議者謂然

炯華陰人舉神童授校書郎永隆二年皇太子已釋奠表豪俊充崇文館學士中書侍郎薛元超薦炯及
鄭祖玄鄧玄挺崔融等詔可遷詹事司直俄坐從父弟神讓與徐敬業亂出爲梓州司法參軍遷盈川令
張說以箴贈行戒其苛至官果以嚴酷稱吏稍忤意榜殺之不爲人所多卒官下中宗時贈著作郎
照隣字昇之范陽人十歲從曹憲王義方授蒼雅調鄧王府典籤王愛重謂人曰此吾之相如調新都尉
病去官居太白山得方士玄明膏餌之會父喪號嘔丹輒出由是疾益甚客東龍門山布衣蘇夔裴瑾之
輩方質范履冰等時時供衣藥疾甚足孿一手又廢乃去具茨山下買園數十畝疏潁水周舍復豫爲墓
偃臥其中照隣自以當高宗時尚吏已獨儒武后尚法已獨黃老后封嵩山屢聘賢士已已廢著五悲文
以自明病既久與親屬訣自沈潁水

賓王義烏人七歲能賦詩初爲道王府屬嘗使自言所能賓王不答歷武功主簿裴行儉爲洮州總管表
寧書奏不應調長安主簿武后時數上疏言事下除臨海丞鞅鞅不得志棄官去徐敬業亂署賓王爲府
屬爲敬業傳檄天下斥武后罪后讀但嘻笑至一杯之土未乾六尺之孤安在矍然曰誰爲之或以賓王
對后曰宰相安得失此人敬業敗賓王亡命不知所之中宗時詔求其文得數百篇它日崔融與張說評
物等曰勃文章宏放非常人所及燭照隣可以企之說曰不然盈川文如縣河酌之不竭優於盧而不減
王恥居後信然愧在前謙也開元中說與徐堅論近世文章說曰李嶠崔融薛稷宋之問之文如良金美
玉無施不可富嘉謨如孤峯絕岸壁立萬仞濃雲鬱興震雷俱發誠可畏也若施於廊廟駭矣閭朝隱如
麗服靚粧燕歌趙舞觀者忘疲若頽之風雅則罪人矣堅問今世奈何說曰韓休之文如大羹玄酒有典
則薄滋味許景先如豐肌膩理雖穠華可愛而乏風骨張九齡如輕縑素練實濟時用而窘邊幅王翰如
瓊栝玉翠雖爛然可珍而多玷缺堅謂篤論云

元萬頃後魏京兆王子推裔祖白澤武德中仕至梁利十一州都督封新安公萬頃起家爲通事舍人從
李勣征高麗管書記勣命別將郭待封以舟師赴平壤馮師本載糧繼之不及期欲報勣而恐爲謀所得
萬頃爲作離合詩遺勣勣曰軍機切遠何用詩爲欲斬待封萬頃言狀乃免又使萬頃草檄襲高麗而
襲其不知守鴨綠之險莫離支報曰謹聞命從兵固守軍不得入高宗聞之投萬頃嶺外會赦還爲著作

武后諷帝召諸儒論議禁中萬頃與周王府戶曹參軍范履冰苗神客太子舍人周思茂右史胡楚賓
與選凡譔列女傳臣軌百僚新戒樂書等九千餘篇至朝廷疑議表疏皆密使參處以分宰相權故時謂
北門學士思茂履冰神客供奉左右或二十餘年萬頃敏文辭然放達不治細檢無儒者風武后時累遷
鳳閣侍郎坐誅履冰者河內人垂拱中歷鸞臺天官二侍郎春官尙書同鳳閣鸞臺平章事兼修國史載
初初坐舉逆人被殺神客東光人終著作郎思茂漳南人與弟思鈞早知名累遷麟臺少監崇文館學士
垂拱中下獄死楚賓秋浦人屬文敏甚必酒中然後下筆高宗命作文常以金銀栝酌酒飲之文成輒賜
焉家居率沈飲無留賄費盡復入得賜而出類爲常性重慎未嘗語禁中事人及其醉問之亦熟視不答
尋兼崇賢直學士卒

萬頃孫正修名節擢明經高第授監門衛兵曹參軍舅孫述與譚物理歎己不逮肅宗初吏部尙書崔寓
典選正以書判第一召詣京師以父詢情老辭疾免河南節度使崔光遠表置其府史思明陷河洛輦父
匿山中賊以名購正度事急謂弟曰賊祿不可養親彼利吾名難免矣然不汗身而死吾猶生也賊既得
誘以高位瞋目固拒兄弟皆遇害父聞仰藥死路人爲哭事平詔錄伏節十一姓而正爲冠贈祕書少監

以其子義方爲華州參軍義方歷京兆府司錄韋夏卿李寶繼爲尹事必咨之歷號商二州刺史福建觀察使中官吐突承瓘閩人也義方用其親屬爲右職李吉甫再當國陰欲承瓘與助卽召義方爲京兆尹李絳惡其黨出爲鄜坊觀察使一切辨治然苛刻人多怨之卒贈左散騎常侍弟季方舉明經調楚巨尉歷殿中侍御史兵部尙書王紹表爲度支員外郎遷金騰二部郎中號能職王叔文用事憚季方不爲用以兵部郎中使新羅新羅聞中國喪不時遣供饋乏季方正色責之閉戶絕食待死夷人悔謝結歡乃還本年五十一遷同州刺史

唐書卷二百一

唐書卷二百一考證

崔信明傳高祖光伯○舊書後魏七兵尙書光伯曾孫

崔行功傳祖謙之仕北齊終鉅鹿太守○舊書鉅鹿太守伯讓曾孫

杜審言孫甫嘗醉登巖武牀瞪視曰巖挺之乃有此兒武亦暴猛外若不爲忤中銜之一日欲殺甫及梓

州刺史章彝集吏于門武將出冠鈎于簾三左右白其母奔救得止○臣德潛按舊書武雖急暴不以

爲意今閱甫集無論兩人贈答劇見交誼至武沒後甫哭歸觀云一哀三峽暮遺後見君情八哀中云

空餘老賓客身上媿簪纓欲殺甫事恐好事者爲之新書喜聞其說而采之也當從舊書

王勃傳年二十九○舊書作二十八

駱賓王傳敬業敗賓王亡命不知所之○舊書敬業敗伏誅

中宗時詔求其文○舊書則天重其文遣使求之

元萬頃傳馮師本載糧繼之○舊書作別帥馮本

宋 端 明 殿 學 士 宋 祁 撰

列傳第一百二十七

文藝中

李適字子至京兆萬年人舉進士再調猗氏尉武后脩三教珠英書以李嶠張昌宗為使取文學士綴集於是適與王無競尹元凱富嘉謨宋之問沈佺期閻朝隱劉允濟在選書成遷戶部員外郎俄兼脩書學士景龍初又擢脩文館學士睿宗時待詔宣光閣再遷工部侍郎卒年四十九贈貝州刺史嘗夢與人論大衍數寤而曰吾壽盡此乎勅其子曰霸陵原西視京師吾樂之可營墓樹十松焉及未病時衣冠往寢石榻上置所讀九經要句及素琴于前士貴其達子季卿亦能文舉明經博學宏辭調鄂尉肅宗時為中書舍人以累貶通州別駕代宗立遷為京兆少尹復授舍人進吏部侍郎河南江淮宣慰使振拔幽滯號振職大厯中終右散騎常侍遺命以布車一乘葬贈禮部尚書季卿在朝薦進才髦與人交有終始恢博君子也初中宗景龍二年始於脩文館置大學士四員學士八員直學士十二員象四時八節十二月於是李嶠宗楚客趙彥昭韋嗣立為大學士適劉憲崔湜鄭愔盧藏用李乂岑羲劉子玄為學士薛稷馬懷

素宋之問武平一杜審言沈佺期閻朝隱爲直學士又召徐堅韋元巨徐彥伯劉允濟等滿員其後被選者不一凡天子饗會游豫唯宰相及學士得從春幸梨園並渭水祓除則賜細柳圍辟癘夏宴蒲萄園賜朱櫻秋登慈恩浮圖獻菊花酒稱壽冬幸新豐歷白鹿觀上驪山賜浴湯池給香粉蘭澤從行給翔麟馬品官黃衣各一帝有所感卽賦詩學士皆屬和當時人所歆慕然皆狎猥佻佻忘君臣禮法惟以文華取幸若韋元巨劉允濟沈佺期宋之問閻朝隱等無它稱附篇左云

韋元巨京兆萬年人祖澄越王府記室撰女誠傳于時元巨擢進士第補東阿尉遷左臺監察御史與張易之有姻屬易之敗貶感義尉俄召爲主客員外郎遷中書舍人舅陸頌妻韋后弟也故元巨憑以復進云

劉允濟字允濟河南鞏人其先出沛國齊彭城郡丞璵六世孫少孤事母尤孝工文辭與王勃齊名舉進士補下邳尉累遷著作佐郎采魯哀公後十二世接戰國爲魯後春秋獻之遷左史兼直弘文館武后明堂成奏賦述功德手詔褒咨除著作郎爲來俊臣飛構當死以母老丐餘年繫獄會赦免貶大庾尉復爲著作佐郎脩國史常曰史官善惡必書使驕主賊臣懼此權顧輕哉而班生受金陳壽求米僕乃視如浮雲耳遷鳳閣舍人坐二張昵狎除青州長史有清白稱巡察使路敬潛言狀以內憂去官服除召爲脩文館學士卽久片喜甚與家人樂飲數日卒

沈佺期字雲卿相州內黃人及進士第由協律郎累除給事中考功受賊劾未究會張易之敗遂長流驪州稍遷台州錄事參軍事入計得召見拜起居郎兼脩文館直學士既侍宴帝詔學士等舞回波佺期爲弄辭悅帝還賜牙緋尋歷中書舍人太子少詹事開元初卒弟全交全字皆有才章而不逮佺期

宋之問字延清一名少連汾州人父令文高宗時爲東臺詳正學士之問偉儀貌雄于辯甫冠武后召與楊炯分直習藝館累轉尙方監丞左奉宸內供奉武后游洛南龍門詔從臣賦詩左史東方虬詩先成后賜錦袍之問俄頃獻后覽之嗟賞更奪袍以賜于時張易之等悉昵寵甚之問與閻朝隱沈佺期劉允濟傾心媚附易之所賦諸篇盡之問朝隱所爲至爲易之奉溺器及敗貶瀧州朝隱崖州並參軍事之問逃歸洛陽匿張仲之家會武三思復用事仲之與王同皎謀殺三思安王室之問得其實令兒子曇與冉祖雍上急變因丐贖罪由是擢鴻臚主簿天下醜其行景龍中遷考功員外郎諂事太平公主故見用及安樂公主權盛復往請結故太平深疾之中宗將用爲中書舍人太平發其知貢舉時賊餉狼藉下遷汴州長史未行改越州長史頗自力爲政窮歷剡溪山置酒賦詩流布京師人人傳諷睿宗立以兪險惡詔流欽州祖雍歷中書舍人刑部侍郎倡飲省中爲御史劾奏貶蘄州刺史至是亦流嶺南並賜死桂州之

問得詔震汗東西步不引決祖雍請使者曰之問有妻子幸聽訣使者許之而之問荒悖不能處家事祖雍怒曰與公俱負國家當死奈何遲回邪乃飲食洗沐就死祖雍江夏王道宗甥及進士第有名于時魏建安後遂江左詩律屢變至沈約庾信以音韻相婉附屬對精密及之問沈佺期又加靡麗回忌聲病納句準篇如錦繡成文學者宗之號為沈宋語曰蘇李居前沈宋比肩謂蘇武李陵也初之問父令文富文辭且工書有力絕人世稱三絕都下有牛善觸人莫敢嬰令文直往拔取角折其頸殺之既之問以文章起其弟之悌以躄勇聞之孫精草隸世謂皆得父一絕之悌長八尺開元中歷劍南節度使太原尹嘗坐事流朱焉會蠻陷驩州授總管擊之募壯士八人被重甲大呼薄賊曰獠動即死賊七百人皆伏不能興遂平賊之孫為連州參軍刺史聞其善歌使教婢日執笏立簾外唱吟自如

閻朝隱字友倩趙州欒城人少與兄鏡幾弟仙舟皆著名連中進士孝悌廉讓科補陽武尉中宗為太子朝隱以舍人幸性滑稽屬辭奇詭為武后所賞累遷給事中仗內供奉后有疾令往禱少室山乃沐浴伏身俎盤為犧請代后疾還奏會后亦愈大見褒賜其資佞諂如此景龍初自崖州遇赦還累遷著作郎先

天中為祕書少監坐事貶通州別駕卒

尹元凱瀛州樂壽人由慈州司倉參軍坐事免棲遲不出者二十年與張說盧藏用厚詔起為右補闕時

有魏谷倚者為太原主簿並貢文辭時稱北京三傑天下文章尚徐庾浮俚不競獨嘉謨少微本經術雅厚雄邁人爭慕之號吳富體豫修三教珠英章嗣立薦嘉謨少微並為左臺監察御史已而嘉謨死少微方病聞之為慟亦卒

劉憲字元度宋州靈陵人父思立在高宗時為名御史于時河南北大旱詔遣御史中丞崔謚等分道賑贖思立建言蠶務未畢而遣使撫巡所至不能無勞餞又賑給須立簿最稽出入往返停滯妨廢且廣若無驛處馬須豫集以一馬勞數家今農事待雨興作輟日役破歲計本欲安存更煩擾之望且責州縣給貸須秋遣使便詔聽罷謚等行遷考功員外郎始議加明經帖進士雜文卒官下憲擢進士調河南尉累進左臺監察御史天授中奉詔按來俊臣罪憲疾其酷欲痛繩之反為所構貶澠水令俊臣死召為給事中轉中書舍人坐善張易之出為渝州刺史除太僕少卿脩國史兼脩文館學士遷太子詹事時玄宗在東宮雅意墳史憲啟曰殿下位副君有絕人之才非以尋擿章句要通大意而已侍讀褚无量經明行脩耆年宿望宜數召問以察其言太子順納會卒贈兗州都督武后時敕吏部糊名考判求高才惟憲與王適司馬鐘梁載言入第二等適幽州人終雍州司功參軍鐘河南人神龍初以中書侍郎卒事繼母孝奉

祿不入私舍與弟銓伯父希象皆歷殿中侍御史希象剛直不諂終主爵員外郎載言聊城人歷鳳閣舍人專知制誥終懷州刺史

李邕字泰和揚州江都人父善有雅行淹貫古今不能屬辭故人號書籠顯慶中累擢宗賢館直學士兼沛王侍讀為文選注敷析淵洽表上之賜賚頗渥除潞王府記室參軍為涇城令坐與賀蘭敏之善流姚州遇赦還居汴鄭間講授諸生四遠至傳其業號文選舉邕少知名始善注文選釋事而忘意書成以問邕邕不敢對善詰之邕意欲有所更善曰試為我補益之邕附事見義善以其不可奪故兩書並行既冠見特進李嶠自言讀書未徧願一見祕書嶠曰祕閣萬卷豈時日能習邪邕因請乃假直祕書未幾辭去嶠驚試問奧篇隱映了辯如響嶠歎曰子且名家嶠為內史與監察御史張廷珪薦邕文高氣方直才任諫諍乃召拜左拾遺御史中丞宋璟劾張昌宗等反狀武后不應邕立階下大言曰璟所陳社稷大計陛下當聽后色解即可環奏邕出或讓曰子位卑一忤旨禍不測邕曰不如是名亦不傳中宗立鄭普思以方技幸擢祕書監邕諫曰陛下躬政日淺有九重之嚴未聞道路橫議今籍籍皆言普思馮詭說妖祥陛下不知猥見驅使孔子曰詩三百一言以蔽之曰思無邪陛下誠以普思術可致長生則爽鳩氏且因之承有天下非陛下乃今可得能致神人邪秦漢且因之承有天下非陛下乃今可得能致佛法邪梁武帝且因之承有天下非陛下乃今可得能鬼道邪墨翟千寶且各闢其主承有天下非陛下乃今可得自古堯舜稱聖者臣觀所以行皆在人事敦睦九族平章百姓不聞以鬼神道治天下惟陛下省察不納五王誅坐善張柬之出為南和令貶富州司戶參軍事韋氏平召拜左臺殿中侍御史彈劾任職人頗憚之譙王重福謀反邕與洛州司馬崔日知捕支黨遷戶部員外郎岑羲崔湜惡日用而邕與之交玄宗在東宮邕及崔隱甫倪若水同被禮遇羲等忌之貶邕舍城丞玄宗即位召為戶部郎中張廷珪為黃門侍郎而善陵方幸共援邕為御史中丞姚崇疾邕險躁左遷括州司馬起為陳州刺史帝封泰山還邕見帝汴州詔獻辭賦帝悅矜肆自謂且宰相邕素輕張說與相惡會仇人告邕贓貸枉法下獄當死許昌男子孔璋上書天子曰明主舉能而捨過取才而棄行烈士抗節勇者不避死故晉用林父不以過漢任陳平不以行禽息隕身不祈生北郭碎首不愛死向若林父誅陳平死百里不用曼嬰見遂是晉無赤狄之士漢無天子之尊秦不疆齊不霸矣伏見陳州刺史邕剛毅忠烈難不苟免往者折二張之角挫韋氏之鋒雖身受謫屈而姦謀沮解卽邕有功於國且邕所能者拯孤恤窮救乏賑惠家無私聚今聞坐贓下吏死在且夕臣聞生無益於國者不若殺身以明賢臣願以大尺之軀膏鈇鉞以代邕死臣與邕生平不款曲臣知有邕邕不知有臣臣不逮邕明矣夫知賢而舉仁也任人之患義也獲一善以死臣又何求伏惟陛

乾隆四年校刊 唐書卷一百一列傳 四

下寬豈之死使率德改行興林父曲逆之功臣得瞑目附禽息北郭之迹大願畢矣若以陽和方始重行
大戮則臣請伏劍不敢煩有司皇天后土實聞臣言昔吳楚反漢得劇孟則不憂夫以一賢而敵七國之
衆伏惟敷含垢之道棄瑕之義遠思劇孟近取於豈況告成岱宗天地更新赦而復論人誰無罪惟明王
國之臣聞士爲知己者死臣不爲死者所知而甘之死者非特惜豈賢亦以成陛下矜能之慈疏奏豈得
減死貶遵化尉流璋嶺南豈妻溫復爲豈請戍邊自贖曰豈少習文章疾惡如讐不容於衆邪佞切齒諸
儒側目頻謫遠郡削跡朝端不啻十載歲時歎戀聞者傷懷屬國家有事泰山法駕旋路豈獻牛酒例蒙
恩私妾聞正人用則佞人憂豈之禍端故自此始且豈比任外官卒無一毀天意暫顧罪過旋生諺曰士
無賢不肖入朝見疾惟陛下明察豈初蒙訊責便繫牢戶水不入口者踰五日氣息奄奄惟吏是聽事生
吏口迫豈手書貸人蠶種以爲枉法市羅貢奉指爲姦贓于時甌使朝堂守捉嚴固號天訴地誰肯爲聞
泣血去國投骨荒裔永無還期妾願使豈得充一卒効力王事膏塗朔邊骨蕘沙壤成豈夙心表入不省
豈後從中人楊思勳討嶺南賊有功徙澧州司馬開元二十三年起爲括州刺史喜興利除害復坐誣枉
且得罪天子識其名詔勿劾後歷淄滑二州刺史上計京師始豈蚤有名重義愛士久斥外不與士大夫
接既入朝人間傳其眉目瓌異至阡陌聚觀後生望風內謁門巷填隘中人臨問索所爲文章且進上以
讀婚不得留出爲汲郡北海太守天寶中左驍衛兵曹參軍柳勣有罪下獄豈嘗遺勣馬故吉溫使引豈

嘗以休咎相語陰賂遺宰相李林甫素忌豈因傳以罪詔刑部員外郎祁順之監察御史羅布爽就郡杖

殺之時年七十代宗時贈祕書監豈之文於碑頌是所長人奉金帛請其文前後所受鉅萬計豈雖訕不

進而文名天下時稱李北海盧藏用嘗謂豈如干將莫邪難與爭鋒但虞傷缺耳後卒如晉杜甫知豈負

謗死作八哀詩讀者傷之豈資豪放不能治細行所在賄謝收游自肆終以敗云

呂向字子回亡其世貫或曰涇州人少孤託外祖母隱陸渾山工草隸能一筆環寫百字若繁髮然世號
連錦書彊志于學每賣藥卽市閱書遂通古今玄宗開元十年召入翰林兼集賢院校理侍太子友諸王
爲文章時帝歲遣使采擇天下姝好內之後宮號花鳥使向因奏美人賦以諷帝善之擢左拾遺天子數
校獵渭川向又獻詩規諷進左補闕帝自爲文勒石西嶽詔向爲鐫勒使以起居舍人從帝東巡帝引頡
利發及蕃夷酋長入仗內賜弓矢射禽向上言鷓臯不鳴未爲瑞鳥豺虎雖伏弗曰仁獸况突厥安忍殘
賊莫顧君父陛下震以武義來以文德勢不得不廷故稽顙稱臣奔命遣使陛下引內從官陪封禪盛禮
使飛矢於前同獲獸之樂是狎昵大過或荆卿詭動何羅竊發逼嚴躡冒清塵縱醢單于汗穹廬何以塞
責帝順納詔蕃夷出仗久之遷主客郎中專侍皇太子眷資良異始向之生父岷客遠方不遺少喪母失

墓所在將葬巫者求得之不知父在七招魂合諸墓後有傳父猶在者訪索累年不獲它日自朝還道見一老人物色問之果父也下馬抱父足號慟行人爲流涕帝聞咨歎官岌朝散大夫賜錦綵給內教坊樂工娛懌其心卒贈東平太守向終喪再遷中書舍人改工部侍郎卒贈華陰太守嘗以李善釋文選爲繁釀與呂延濟劉良張銑李周翰等更爲詁解時號五臣注

王翰字子羽并州晉陽人少豪健恃才及進士第然喜捕酒張嘉貞爲本州長史偉其人厚遇之翰自歌以舞屬嘉貞神氣軒舉自如張說至禮益加復舉直言極諫調昌樂尉又舉超拔羣類方說輔政故召爲祕書正字擢通事舍人駕部員外郎家畜聲伎自使頤令自視王侯人莫不惡之說罷宰相翰出爲汝州長史徙仙州別駕日與才士豪俠飲樂游畋伐鼓窮歡坐貶道州司馬卒

孫逖博州武水人後魏光祿大夫惠蔚其先也祖希壯爲韓王府典籤四世傳一子故無近屬父嘉之少孤依外家客涉鞏間垂拱初詣洛陽獻書不報第進士終襄邑令逖幼有文屬思警敏年十五見雍州長史崔日用令賦土火爐援筆成篇理趣不凡日用駭歎遂與定交舉手筆俊拔哲人奇士隱淪屠釣及文藻宏麗等科開元十年又舉賢良方正玄宗御洛城門引見命戶部郎中蘇晉等第其文異等擢左拾遺張說命子均增往拜之李邕負才自陳州入計裏其文示逖李膺鎮太原表置幕府以起居舍人入爲集賢院脩撰時海內少事帝賜羣臣十日一燕宰相蕭嵩會百官賦天成玄澤維南有山楊之華三月英莢

有蘭和風嘉木等詩八篇繼雅頌體使逖序所以然改考功員外郎取顏真卿李華蕭穎士趙麟等皆海內有名士俄遷中書舍人是時嘉之且八十猶爲令逖求降外官增父秩帝嘉納拜嘉之宋州司馬聽致仕父喪缺復拜舍人開元間蘇頲齊澣蘇晉賈曾韓休許景先及逖典詔誥爲代言最而逖尤精密張九齡視其草欲易一字卒不能也居職八年判刑部侍郎以病風乞解徙太子左庶子遂縣廢累年徙少詹事上元中卒贈尚書右僕射諡曰文諸子成最知名成字思退推蔭仕累洛陽長安令兄宿爲華州刺史因悻病瘖成請告往視不待報輒行代宗嘉其悝不責也稍遷倉部郎中京兆少尹爲信州刺史歲大旱發倉以賤直售民故飢而不亡再葺增戶五千詔書褒美徙蘇州改桂管觀察使卒成通經術奏議據正嘗有葺喪弔者至成不易纒而見客疑之請故答曰纒者古居喪常服去之則廢喪也今而巾幘失矣子公器亦至嘗管經略使公器子簡字樞中元和初登進士第辟鎮國荆南幕府累遷左司吏部二郎中繇諫議大夫知制誥進中書舍人初逖掌誥至代宗時宿又居職逮簡凡三世會昌初遷尚書左丞建言班位以品秩爲等差今官兼臺省位置遷誤不可爲法元和元年御史臺白奏常參官兼大夫中丞者視檢校官居本品同類官上其後侍郎兼大夫者皆在左右丞上當時侍郎兼大夫少唯京兆尹兼之京兆尹

從三品今位乃在本品同類官從三品卿監上太常宗正卿正三品下左丞乃正四品上戶部侍郎正四品下今戶部侍郎兼大夫當在本品同類正四品下諸曹侍郎上不宜居正四品丞郎上又右丞正四品下吏部侍郎正四品上今吏部侍郎位右丞之下蓋以丞有繩轄之重雖吏部品高猶居其下然則戶部侍郎雖兼大夫安得居其上哉今散官自將仕郎至開府特進每品正從有上中下名級各異則正從上下不得謂之同品京兆河南司錄及諸府州錄事參軍事皆操紀律正諸曹與尚書省左右丞紀綱六曹略等假使諸曹掾因功勞加臺省官安得位在司錄錄事參軍上且左丞糾射八坐玉省內禁令宗廟祠祭事御史不當得彈奏之良以臺官所奏拘牽成例不揣事之輕重使理可循雖無往比自宜行之否者號曰舊章正可改也武宗詔兩省官詳議皆從簡請歷河中興元宣武節度使檢校尚書右僕射東都留守而弟範亦爲淄青節度使世推顯家

李白字太白興聖皇帝九世孫其先隋末以罪徙西域神龍初遁還客巴西白之生母夢長庚星因以命之十歲通詩書既長隱岷山州舉有道不應蘇頲爲益州長史見白異之曰是子天才奇特少益以學可比相如然喜縱橫擊劍爲任俠輕財重施更客任城與孔巢父韓準裴政張叔明陶沔居徂徠山日沈飲號竹溪六逸天寶初南入會稽與吳筠善筠被召故白亦至長安往見賀知章知章見其文歎曰子真仙人也言於玄宗召見金鑾殿論當世事奏頌一篇帝賜食親爲調羹有詔供奉翰林白猶與飲徒醉于

市帝坐沈香亭子意有所感欲得白爲樂章召入而白已醉左右以水頰面稍解援筆成文婉麗精切無留思帝愛其才數宴見白嘗侍帝醉使高力士脫鞵力士素貴恥之撻其詩以激楊貴妃帝欲官白妃輒沮止白自知不爲親近所容益驚放不自脩與知章李適之汝陽王璣崔宗之蘇晉張旭焦遂爲酒八仙人懇求還山帝賜金放還白浮游四方嘗乘舟與崔宗之自采石至金陵著宮錦袍坐舟中旁若無人安祿山反轉側宿松匡廬間永王璘辟爲府僚佐璘起兵逃還彭澤璘敗當誅初白游并州見郭子儀奇之子儀嘗犯法白爲救免至是子儀請解官以贖有詔長流夜郎會赦還尋陽坐事下獄時宋若思將吳兵三千赴河南道尋陽釋囚辟爲參謀未幾辭職李陽冰爲當塗令白依之代宗立以左拾遺召而白已卒年六十餘白晚好黃老度牛渚磯至姑孰悅謝家青山欲終焉及卒葬東麓元和末宣歙觀察使范傳正祭其冢禁樵採訪後裔惟二孫女嫁爲民妻進止仍有風範因泣曰先祖志在青山頃葬東麓非本意傳正爲改葬立二碑焉告二女將改妻士族辭以孤窮失身命也不願更嫁傳正嘉歎復其夫徭役文宗時詔以白歌詩裴旻劍舞張旭草書爲三絕旭蘇州吳人嗜酒每大醉呼叫狂走乃下筆或以頭濡墨而書旣醒自視以爲神不可復得也世呼張顛初仕爲常熟尉有老人陳牒求判宿昔又來旭怒其煩責之老

人曰觀公筆奇妙欲以藏家爾旭因問所藏盡出其父書旭視之天下奇筆也自是盡其法旭自言始見公主擔夫爭道又聞鼓吹而得筆法意觀倡公孫舞劍器得其神後人論書歐虞褚陸皆有異論至旭無非短者傳其法惟崔邈顏真卿云旻嘗與幽州都督孫佺北伐爲奚所圍旻舞刀立馬上矢四集皆迎刀而斷奚大驚引去後以龍華軍使守北平北平多虎旻善射一日得虎三十一休山下有老父曰此彪也稍北有真虎使將軍遇之且敗旻不信怒罵趨之有虎出叢薄中小而猛據地大吼旻馬辟易弓矢皆墜自是不復射

王維字摩詰九歲知屬辭與弟縉齊名資孝友開元初擢進士調大樂丞坐累爲濟州司倉參軍張九齡執政擢右拾遺歷監察御史母喪毀幾不生服除累遷給事中安祿山反玄宗西狩維爲賊得以藥下利陽瘖祿山素知其才迎置洛陽迫爲給事中祿山大宴凝碧池悉召梨園諸工合樂諸工皆泣維聞悲甚賦詩悼痛賊平皆下獄或以詩聞行在時縉位已顯請削官贖維罪肅宗亦自憐之下遷太子中允久之遷中庶子三遷尚書右丞縉爲蜀州刺史未還維自表已有五短縉五長臣在省戶縉遠方願歸所任官放田里使縉得還京師議者不之罪久乃召縉爲左散騎常侍上元初卒年六十一疾甚縉在鳳翔作書與別又遺親故書數幅停筆而化贈秘書監維工草隸善畫名盛於開元天寶間豪貴人虛左以迎縉

商諸王命若師友遺思入神至山水平遠雲霧石色繪工以爲天機所到學者不及也嘗有以按樂圖示

者無題識維徐云此霓裳第三疊最初拍也客未然引工按曲乃信兄弟皆篤志奉佛食不葷衣不文綵別墅在桐川地奇勝有華子岡欽湖竹里館柳浪菜莢泝辛夷塢與裴迪游其中賦詩相酬爲樂喪妻不娶孤居三十年母亡表桐川第爲寺終葬其西寶應中代宗語縉曰朕嘗於諸王座聞維樂章今傳幾何道中人王承華往取縉哀集數十百篇上之

鄭虔鄭州滎陽人天寶初爲協律郎集綴當世事著書八十餘篇有窺其藁者上書告虔私撰國史虔蒼黃焚之坐謫十年還京師玄宗愛其才欲置左右以不事事更爲置廣文館以虔爲博士虔聞命不知廣文曹司何在訴宰相宰相曰上增國學置廣文館以居賢者令後世言廣文博士自君始不亦美乎虔乃就職久之雨壞廡舍有司不復脩完寓治國子館自是遂廢初虔追細故書可誌者得四十餘篇國子司業蘇源明名其書爲會粹虔善圖山水好書常苦無紙於是慈恩寺貯柿葉數屋遂往日取葉肄書歲久殆遍嘗自寫其詩并畫以獻帝大署其尾曰鄭虔三絕遷著作郎安祿山反遣張通儒劫百官置東都僞授虔水部郎中因稱風緩求攝市令潛以密章達靈武賊平與張通王維並囚宣陽里三人者皆善畫崔圓使繪齋壁虔等方悸死即極思祈解於圓卒免死貶台州司戶參軍事維止下遷後數年卒虔學長於

蘇

地里山川險易方隅物產兵戎窳寡無不詳嘗為天寶軍防錄言典事該諸儒服其善著書時號鄭廣文在官貧約甚澹如也杜甫嘗贈以詩曰才名四十年坐客寒無斃云有鄭相如者自滄州來師事處處未之禮問問何所業相如曰聞孔子稱繼周者百世可知僕亦能知之處駭然即曰開元盡三十年當改元盡十五年天下亂賊臣僭位公當汗偽官願守節可以免處又問自謂云何答曰相如有官三年死衢州是年及進士第調信安尉既三年處詢吏部則相如果死故處念其言終不附賊

蕭穎士字茂挺梁鄱陽王恢七世孫祖晶賢而有謀任雅相伐高麗表為記室越王貞舉兵杖策詣之陳三策王不用晶度必敗乃亡去客死廣陵穎士四歲屬文十歲補太學生觀書一覽即誦通百家譜系書稽學開元二十三年舉進士對策第一父旻以莒丞抵罪穎士往訴於府佐張惟一惟一曰旻有佳兒吾以旻獲譴不憾乃平宥之天寶初穎士補秘書正字于時裴耀卿席豫張均宋遙韋述皆先進器其材與鈞禮由是名播天下奉使括遺書趙衛間淹久不報為有司劾免留客濮陽於是尹徵王恆盧異盧士式賈豈趙匡闔士和柳井等皆執弟子禮以次授業號蕭夫子召為集賢校理宰相李林甫欲見之穎士方父喪不詣林甫嘗至故人舍邀穎士穎士前往哭門內以待林甫不得已前弔乃去怒其不下已調廣陵參軍事穎士急中不能堪作伐櫻桃樹賦曰擢無庸之瑣質蒙本枝以自庇雖先疑而或薦非和羹之正味以譏林甫云君子慎其福會母喪免流潘吳越嘗謂仲尼作春秋為百王不易法而司馬遷作本紀書

表世家列傳敘事依違失褒貶體不足以訓乃起漢元年訖隋義寧編年依春秋義類為傳百篇在魏書高貴崩曰司馬昭弒帝於南闕在梁書陳受禪曰陳霸先反又自以梁枝孫而宣帝逆取順守故武帝得血食三紀昔曲沃篡晉而文公為五伯仲尼弗貶也乃黜陳閔隋以唐土德承梁火德皆自斷諸儒不與論也有太原王緒者僧辯裔孫讓永靈公輔梁書黜陳不帝穎士佐之亦著梁蕭史譜及作梁不禪陳論以發緒義例使光明云史官韋述薦穎士自代召詣史館待制穎士乘傳詣京師而林甫方威福自擅穎士遂不屈愈見疾俄免官往來鄆杜間林甫死更調河南府參軍事倭國遣使入朝自陳國人願得蕭夫子為師者中書舍人張漸等諫不可而止安祿山寵恣穎士陰語柳井曰胡人負寵而驕亂不久矣東京其先陷乎即託疾游太室山已而祿山反穎士往見河南採訪使郭納言禦守計納忽不用歎曰肉食者以兒戲禦劇賊難矣哉聞封常清陳兵東京往觀之不宿而還因藏家書於箕穎間身走山南節度使源洧辟掌書記賊別校攻南陽洧懼欲退保江陵穎士說曰官兵守潼關財用急必待江淮轉餉乃足餉道由漢沔則襄陽乃今天下喉襟一日不守則大事去矣且列郡數十人百萬訓兵攘寇社稷之功也賊方專嗜陝公何遽輕土地欲笑天下乎洧乃按甲不出亦會祿山死賊解去洧卒往客金陵永王璘召之

不見時盛王爲淮南節度大使留蜀不遣副大使李承式玩兵不振穎士與宰相崔圓書以爲今兵食所資在東南但楚越重山複江自中原擾則盜先起宜時遣使以扞鎮江淮俄而劉展果反賊圍雍丘魯泗上軍承式遣兵往救大宴賓客陳女樂穎士曰天子暴露豈臣下盡歡時邪夫投兵不測乃使觀聽華麗一旦思歸誰致其死哉弗納崔圓聞之卽授揚州功曹參軍至官信宿去後客死汝南逆旅年五十二門人共謚曰文元先生穎士樂聞人善以推引後進爲己任如李陽李幼卿皇甫冉陸渭等數十人由獎目皆爲名士天下推知人稱蕭功曹嘗兄事元德秀而友殷寅顏真卿柳芳陸據李華邵軫趙驊時人語曰殷顏柳陸李蕭邵軫以能全其交也所與遊者孔至賈至源行恭張有略族弟季遐劉穎韓拯陳晉孫益韋建韋收獨華與齊名世號蕭李嘗與華據游洛龍門讀路旁碑穎士卽誦華再閱據三乃能盡記聞者謂三人才高下此其分也有奴事穎士十年管楚嚴慘或勸其去答曰非不能愛其才耳穎士數稱班彪皇甫謐張華劉琨潘尼能尙古而混流俗不自振曹植陸機所不逮也又言裴子野善著書所許可當世者陳子昂富嘉謨盧藏用之文辭董南事孔述睿之博學而已子存字伯誠亮直有父風能文辭與韓會沈既濟梁肅徐岱等善浙西觀察使李栖筠表常熟主簿顏真卿在湖州與存及陸鴻漸等討據古今韻字所原作書數百篇建中初由殿中侍御史四遷比部郎中張滂主財賦辟存留務京師裴延齡與滂不協存疾其姦去官風痺卒韓愈少爲存所知自袁州還過存廬山故居而諸子前死唯一女在爲經

其家殷寅者陳郡人邵軫者汝南人陸據河南人字德隣後周上庸公騰六世孫神寓警邁善物理年三十始到京師公卿愛其文交譽之天寶十三載終司勳員外郎

柳并者字伯存大厯中辟河東府掌書記遷殿中侍御史喪明終於家初并與劉太真尹徵閻士和受業於穎士而并好黃老穎士常曰太真吾入室者也斯文不墜寄是子云徵博聞彊識士和鈞深致遠吾弗逮已并不受命而尙黃老子亦何誅并弟談字中庸穎士愛其才以女妻之士和字伯均著蘭陵先生誄蕭夫子集論因推歷世文章而盛推穎士所長以爲聞蕭氏風者五尺童子羞稱曹陸

皇甫冉字茂政十歲便能屬文張九齡歎異之與弟曾皆善詩天寶中踵登進士授無錫尉王縉爲河南元帥表掌書記遷累右補闕卒曾字孝常歷監察御史其名與冉相上下當時比張氏景陽孟陽云蘇源明京兆武功人初名預字弱夫少孤寓居徐兗工文辭有名天寶間及進士第更試集賢院累遷太子諭德出爲東平太守是時濟陽郡太守李俊以郡瀕河請增領宿城中都二縣以紓民力一縣隸東平魯郡者也於是源明議廢濟陽析三縣分隸濟南東平濮陽詔河南採訪使會濮陽太守崔季重魯郡太守李蘭濟南太守田琦及源明俊五太守議于東平不能決旣而卒廢濟陽以縣皆隸東平召源明爲國

子司業安祿山陷京師源明以病不受僞署肅宗復兩京擢考功郎中知制誥是時承大盜之餘國用爲屈宰相王璵以祈禱進禁中禱祀窮日夜中官用事給養繁靡羣臣莫敢切諍昭應令梁鎮上書勸帝罷淫祀其他不暇及也源明數陳政治得失及史思明陷洛陽有詔幸東京將親征源明因上疏極諫曰淫雨積時道路方梗甚不可一也自春大旱秋苗耗半斂糴未畢先之以清道之役申之以供頓之苦甚不可二也每立殿廊見旌旗之下餓夫執爨仆于行間日見二三市井餒餒求食死于路旁日見四五甚不可三也姦夫盜兒連牆接棟磨礪以須陛下之出御史大夫必不能澄清禁止甚不可四也聖皇巡蜀之初都內財貨吏民資產靡散于道路之手至有乘馬馱驢入宣政紫宸者況陛下初有四海威制不及曩時遠矣今茲東行殆賊臣誘掖陛下而已詩曰三星在霄謂危亡在於須臾臣不勝嗚咽爲陛下痛之願速罷幸不然窮此樂禍已扼腕於下甚不可五也方今河洛驛驢江湖叛渙詩曰中原有菽庶民采之彼思明楚元皆采菽之人也陛下何遽輕萬乘而速成之邪甚不可六也大河南北舉爲寇盜三公以下廩稍匱絕將士糧賜僅支日月而中官冗食不減往年梨園雜伎愈盛今日陛下未得穆然高枕殆繇此也自非中庸指使太常正樂外願一切放歸給長牒勿事須五六年後隨事蠲省令聚而仰給甚不可七也李光弼拔河陽王思禮下晉原衛伯玉拂焉普過析支不日可至御史大夫王玄志壓巫閭臨幽都汝州

過嬰子計日反接而至矣陛下不坐而受之乃欲親征徇一朝之怒甚不可八也王者之於天地神祇享之以牲幣而已記曰不祈方士彼淫巫愚祝妄有關說甚不可九也天子順動人皆幸之之謂幸人皆病之之謂不幸臣等屢佛視聽聯伏赤墀之下頓顙流涕而出雖陛下優容貸罪凡百之臣必昌言于朝萬口謗于外甚不可十也臣聞子不諍於父不孝也臣不諍於君不忠也不孝不忠爲苟榮冒祿罔牢之物不若也臣雖至賤不能委身罔牢之中將使樵夫指而笑之帝嘉其切直遂罷東幸後以祕書少監卒源明雅善杜甫鄭虔其最稱者元結梁肅肅字敬之一字寬中隋刑部尚書毗五世孫世居陸渾建中初中文辭清麗科擢太子校書郎肅復薦其材授右拾遺脩史以母羸老不赴杜佑辟淮南掌書記召爲監察御史轉右補闕翰林學士皇太子諸王侍讀卒年四十一贈禮部郎中

李適傳子季卿亦能文○舊書作李適之之子

宋之問傳汾州人○舊書作虢州弘農人

李邕傳父善爲文選注數析淵洽表上之○沈炳震曰舊書所注文擇六十卷大行於時

孫逖傳博州武水人○舊書作潞州陟縣人

宋 端 明 殿 學 士 宋 邢 縠

列傳第一百二十八

文藝下

李華字遐叔趙州贊皇人曾祖太冲名冠宗族間鄉人語曰太冲無兄太宗時擢祠部郎中華少曠達外若坦蕩內謹重尚然許每慕汲黯為人累中進士宏辭科天寶十一載遷監察御史宰相楊國忠支姬所在橫猾華出使劾按不撓州縣肅然為權幸見疾徙右補闕安祿山反上誅守之策皆留不報玄宗入蜀百官解竄華母在鄴欲間行輦母以逃為盜所得僞署鳳閣舍人賊平貶杭州司戶參軍華自傷踐危亂不能完節又不能安親欲終養而母亡遂屏居江南上元中以左補闕司封員外郎召之華喟然曰烏有曠節危親欲荷天子寵乎稱疾不拜李峴領選江南表置幕府擢檢校吏部員外郎苦風痺去官客隱山陽勒子弟力農安於窮槁晚事浮圖法不甚著書惟天下士大夫家傳墓版及州縣碑頌時齋金帛往請乃疆為應大厯初卒初華作含元殿賦成以示蕭穎士穎士曰景福之上靈光之下華文辭絳麗少宏傑氣穎士健爽自肆時謂不及穎士而華自疑過之因作甲古戰場文極思研推已成汗為故書雜置梵

書之皮它日與穎士讀之稱工華問今誰可及穎士曰君加精思便能至矣華愕然而服華愛獎士類名隨以重若獨孤及韓雲卿韓會李紆柳誠崔祐甫皇甫冉謝良弼朱巨川後至執政顯官華觸禍銜悔及爲元德秀權臯銘四皓贊稱道深婉讀者憐其志宗子翰從子觀皆有名翰擢進士第調衛尉天寶末房瑁韋陟俱薦爲史官宰相不肯擬翰所善張巡死節睢陽人媚其功以爲降賊肅宗未及知翰傳巡功狀表上之曰臣聞聖主褒死難之士養死事之孤或親推轎車或追建邑封厚死以慰生撫存以答亡君不遺於臣臣亦不背其君也自逆胡構亂據雒陽引幽朔以吞河南故御史中丞贈揚州大都督張巡忠誼奮發率烏合守雍丘潰賊心腹及魯炅棄甲宛葉哥舒翰敗績潼關賊遂盜神器鷓時二京南臨漢江西逼岐雍羣帥列城望風出奔巡守孤城不爲却賊欲繞出巡後以擾江淮巡退軍睢陽扼東南咽喉自春訖冬大戰數十小戰數百以弱制彊出奇無窮殺賊兇醜凡十餘萬賊不敢越睢陽取江淮江淮以完巡之力也城孤糧盡外救不至猶奮羸起病摧鋒陷堅三軍噉膚而食知死不叛城陷見執卒無撓詞慢叱兇徒精貫白日雖古忠烈無以加焉議者罪巡以食人愚巡以守死臣竊痛之夫忠者臣之教恕者法之情巡握節而死非虧教也析骸以爨非本情也春秋以功覆過書赦過有刑在易遏惡揚善爲國者錄用棄瑕今者乃欲議巡之罪是廢教絕節不以功掩過不以刑恕情善可遏惡可揚瑕錄而用棄非所以獎人倫明勸戒也且祿山背德大臣將相比肩從賊巡官不朝宴不坐無一任之士一節之權復奮身死節以動義旅不謂忠乎以數千卒橫挫賊鋒若無巡則無睢陽無睢陽則無江淮有如賊因江淮之資兵廣而財積根結盤據西向以拒雖終殲滅其曠日持久必矣今陝鄂一戰犬羊駭北王師震其西巡扼其東此天使巡舉江淮以待陛下師至而巡死不謂功乎古者列國侵伐猶分災救患諸將同受國恩奉辭伐罪巡固守亦待外援援不至而食盡食盡而人則巡之情可求矣假巡守城之初已計食人損數百衆以全天下臣尙謂功過相掩况非素志乎夫子制春秋明褒貶齊桓公將封禪略不書晉文公召王河陽書而諱之巡蒼黃之罪輕於僭禪興復之功重於糾合今巡子亞夫雖得官不免飢寒江淮既巡所保戶口充完宜割百戶俸食其子且疆死爲厲有所歸則不爲災巡身首分裂將士骸骼不掩宜於睢陽相擇高原起大冢招魂而葬旌善之義也臣少與巡游哀巡死難不親休明唯令名其榮祿也若不時紀錄月日寢悠或掩而不傳或傳而不實巡生死不遇誠可悲悼謹撰傳一篇昧死上儻得列于史官死骨不朽帝繇是感悟而巡大節白於世義士多之翰累遷左補闕翰林學士大庾中病免客陽翟卒翰爲文精密而思遲常從令皇甫曾求音樂思澗則奏之神逸乃屬文族弟紆自有傳

觀字元賓貞元中舉進士宏辭連中授太子校書郎卒年二十九觀屬文不襲松前人時謂與韓愈相上

下及觀少天而愈後文益工議者以觀文未極愈老不休故卒擅名陸希聲以爲觀尙辭故辭勝理愈尙質故理勝辭雖愈窮老終不能加觀之辭觀後愈死亦不能逮愈之質云

孟浩然字浩然襄州襄陽人少好節義喜振人患難隱鹿門山年四十乃游京師嘗於太學賦詩一座嗟伏無敢抗張九齡王維雅稱道之維私邀入內署俄而玄宗至浩然匿牀下維以實對帝喜曰朕聞其人而未見也何懼而匿詔浩然出帝問其詩浩然再拜自誦所爲至不才明主棄之句帝曰卿不求仕而朕未嘗棄卿奈何誣我因放還採訪使韓朝宗約浩然偕至京師欲薦諸朝會故人至劇飲歡甚或曰君與韓公有期浩然叱曰業已飲違恤他卒不起朝宗怒辭行浩然不悔也張九齡爲荊州辟置于府府罷開元末病疽背卒後樊澤爲節度使時浩然墓庫壞符載以牋叩澤曰故處士孟浩然文質傑美殞落歲久門裔陵遲巨隴頽沒永懷若人行路慨然前公欲更築大墓閩州摺紳聞風竦動而今外迫軍旅內勞賓客牽耗歲時或有未遑誠令好事者乘而有之負公夙志矣澤乃更爲刻碑鳳林山南封寵其墓初王維過鄆州畫浩然像于刺史亭因曰浩然亭咸通中刺史鄭誠謂賢者名不可斥更署曰孟亭開元天寶間同知名者王昌齡崔顥皆位不顯昌齡字少伯江寧人第進士補祕書郎又中宏辭遷汜水尉不護細行貶龍標尉以世亂還鄉里爲刺史閩巨勝所殺張錫按軍河南兵大集曉最後期將戮之錫曰有親乞貸

餘命錫曰王昌齡之親欲與誰養曉默然昌齡工詩維密而思清時謂王江寧云崔顥者亦擢進士第有

文無行好蒲博嗜酒娶妻惟擇美者俄又棄之凡四五娶終司勳員外郎初李昌聞其名虛舍邀之顯至獻詩首章曰十五嫁王昌豈叱曰小兒無禮不與接而去

劉太真宣州人善屬文師蘭陵蕭穎士舉高第進士淮南陳少游表爲掌書記嘗以少游擬桓文爲義士所譽興元初爲河東宣慰賑給使累遷刑部侍郎德宗以天下平貞元四年九月詔羣臣宴曲江自爲詩敕宰相擇文人廣和李泌等請羣臣皆和帝自第之以太真李紆等爲上鮑防于邵等次之張濛等爲下與擇者四十一人惟泌李晟馬燧三宰相無所差次遷禮部掌貢士多取大臣貴近子弟坐貶信州刺史卒

邵說相州安陽人已擢進士第未調陷史思明逮朝義敗歸郭子儀子儀愛其才留幕府遷累長安令祕書少監大厯末上言天道三十年一小變六十年一大變祿山思明之難出入二紀多難漸平向之亂今將變而之治宜建徽號承天意而方謁郊廟大赦各士誠恐雲雨之施未普鬱結之氣未除願因此時修享獻款郊廟褒有德錄賢人與天下更始振災益壽之術也不聽德宗立擢吏部侍郎說因自陳家本儒先祖長白山人貞一以武后革命終身不肯仕先臣殿中侍御史瓊之逮事玄宗臣十六卽孤長育母手

天寶中始仕會喪客河北祿山亂喪紀當終臣不禡衰經又再葺懼終不免陰走洛魏慶緒遁保西城搜
脅儒者爲己用以兵迫臣遂陷醜逆俄而史思明順附欲問道歸北闕下肅宗拜臣左金吾衛騎曹參軍
許留思明所會烏承恩事路絕不得歸朝義之敗欲固守河陽臣知回紇利野戰陰勸其行以破賊計朝
義已走臣西歸獻狀先帝詔翰林索臣所言與王伾偕召先帝謂誠節白著故擢伾侍御史臣爲殿中
侍御史使者宣旨制詔盡言其狀則疇昔本末先帝知之今又推以不次雖自天斷尙恐受謗與人傷陛
下之明今吏員未乏而調者多益以功優準平格以判留人去者十七彼且鼓譟說以投疑于上此臣所
大懼也因薦戶部郎中肅定司農卿庾準自代不許說在職以才顯或言且執政金吾將軍裴儼謂柳載
曰說事賊爲劇官掌其兵大小百戰掠名家子爲奴婢不可計得有死而無厚顏乃崇第產附貴俸欲以
相邦其能久乎建中三年逐嚴郢說與郢善微諷朱泚訟其寃爲草奏貶歸州刺史卒

于邵字相門其先自代來爲京兆萬年人天寶末第進士以書判超絕補崇文校書郎繇比部郎中爲道
州刺史未行徙巴州會歲餘部獠亂薄城下邵勵兵拒戰且遣使諭曉獠丐降邵儒服出賊見皆拜卽引
去節度使李抱玉以聞遷梓州辭疾不拜授兵部郎中崔靈帥蜀表爲度支副使俄以諫議大夫知制誥
進禮部侍郎朝有大典冊必出其手爲三司使治薛豈獄失德宗旨貶桂州長史復爲太子賓客與宰相
陸贄不平出杭州刺史久疾求告貶衢州別駕徙江州卒年八十一邵孝悌有行遷謚益修澆弊澤始舉

賢良邵望見曰將相材也崔元翰舉進士年五十矣邵以其文擢異等曰後當司詔令已而皆然獨孤授
舉博學宏辭吏部考當乙邵覆之置甲科人咨其公

崔元翰名鵬以字行父良佐與齊國公日用從昆弟也擢明經甲科補湖城主簿以母喪遂不仕治詩易
書春秋譚演範忘象渾天等論數十篇隱共北白鹿山之陽卒門人共謚曰貞文孝父元翰舉進士博學
宏辭賢良方正皆異等議成李勉表在幕府馬燧更表爲太原掌書記召拜禮部員外郎寶參乘政引知
制誥其訓辭溫厚有典誥風然性剛褊不能取容於時孤特自恃掌誥凡再葺不遷罷爲比部郎中時已
七十餘卒其好學老不倦用思精緻馳騁班固蔡邕間以自名家怨陸贄李充乃附裴延齡延齡表鈎校
京兆妄費持吏甚急而充等自無過訖不能傳致以罪云

于公異蘇州吳人進士擢第李晟表爲招討府掌書記朱泚平露布於德宗曰臣旣肅清宮禁祇奉寢園
鐘簾不移廟貌如故帝覽泣下曰誰爲之辭或以公異對帝咨歎一再始公異與陸贄故有隙時贄在翰
林聞不喜世多言公異不能事後母旣仕不歸省及贄當政乃奏其狀詔賜孝經罷歸田里盧邁坐舉非
其人奪俸兩月時中書舍人高郢嘗薦御史元敦義及公異被譴郢亦劾敦義無美行詔免敦義官公異

蘇是不自振而卒

李益故宰相揆族子於詩尤所長貞元末名與宗人賀相埒每一篇成樂工爭以賂求取之被聲歌供奉天子至征人早行等篇天下皆施之圖繪少癡而忌克防閑妻妾苛嚴世謂妒為李益疾同輩行稍稍進顯益獨不調鬱鬱去游燕劉濟辟置幕府進為營田副使嘗與濟詩語怨望憲宗雅知名召為祕書少監集賢殿學士自負才凌藉士眾不能堪諫官因暴幽州時怨望語詔降秩俄復舊官累遷右散騎常侍太和初以禮部尚書致仕卒時又有太子庶子李益同在朝故世言文章李益以辨云

盧綸字允言河中蒲人避天寶亂客鄆陽大厯初數舉進士不入第元載取綸文以進補闕鄉尉累遷監察御史輒稱疾去坐與王縉善久不調渾瑊鎮河中辟元帥判官累遷檢校戶部郎中嘗朝京師是時翼韋渠牟得幸德宗表其才召見禁中帝有所作輒使廣和異日問渠牟盧綸李益何在答曰綸從渾瑊在河中驛召之會卒綸與吉中孚韓翃錢起司空曙苗發崔峒耿漳夏侯審李端皆能詩齊名號大厯十才子憲宗詔中書舍人張仲素訪集遺文文宗尤愛其詩問宰相綸文章幾何亦有子否李德裕對綸四子簡能簡辭弘正簡求皆擢進士第在臺閣帝遣中人悉索家笥得詩五百篇以聞中孚鄆陽人官戶部侍郎翃字君平南陽人侯希逸表佐淄青幕府府罷十年不出李勉在宣武復辟之俄以駕部郎中知制誥

時有兩韓翃其一為刺史宰相請孰與德宗曰與詩人韓翃終中書舍人起吳興人天寶中舉進士與郎

士元齊名時詔曰前有沈宋後有錢郎終考功郎中曙字文初廣平人從韋臯於劍南終虞部郎中發晉卿子終都官員外郎嗣終右補闕漳右拾遺審侍御史端趙州人始郭曖尚昇平公主主賢明有才思尤招納士故端等多從曖游曖嘗進官大集客端賦詩最工錢起曰素為之請賦起姓端立獻一章又工于前客乃服主賜帛百後移疾江南終杭州司馬

歐陽詹字行周泉州晉江人其先皆為本州州佐縣令閩越地肥衍有山泉禽魚雖能通文書吏事不肯北宦及常袞罷宰相為觀察使始擇縣鄉秀民能文辭者與為賓主鈞禮觀游饗集必與里人矜耀故其俗稍相勸仕初詹與羅山甫同隱潘湖往見袞袞奇之辭歸泛舟飲餞舉進士與韓愈李觀李絳崔羣王涯馮宿庾承宣聯第皆天下選時稱龍虎榜閩人第進士自詹始詹事父母孝與朋友信義其文章切深回復明辨與愈友善詹先為國子監四門助教率其徒伏闕下舉愈博士卒年四十餘崔羣哭之甚愈為詹哀辭自書以遺羣初徐晦舉進士不中詹數稱之明年高第仕為福建觀察使語及詹必流涕從子相字降之亦工為文陸澹自右拾遺除司勳郎中棄官隱吳中詔召之既在道相遺書讓出處之遽澹不至還相名益聞開成中擢進士第而里人蕭本妄言與貞獻太后近屬恩寵赫然相恥之會澤潞劉從諫表

租在幕府租爲辨質本之僞本終得罪其子槿拒命租方休假還家租表斥損時政或言租爲之詔流崖州賜死臨刑色不撓爲書徧謝故人自誌墓人皆憐之

李賀字長吉系出鄭王後七歲能辭章韓愈皇甫湜始聞未信過其家使賀賦詩援筆輒就如素構自目曰高軒過二人大驚自是有名爲人纖瘦通眉長指爪能疾書每旦日出騎弱馬從小奚奴背古錦囊遇所得書投囊中未始先立題然後爲詩如它人牽合程課者及暮歸足成之非大醉弔喪日率如此過亦不甚省母使婢探囊中見所書多卽怒曰是兒要嘔出心乃已耳以父名晉肅不肯舉進士愈爲作諱辨然卒亦不就舉辭尙奇詭所得皆驚邁絕去翰墨畦逕當時無能效者樂府數十篇雲韶諸工皆合之絃管爲協律郎卒年二十七與游者權璩楊敬之王恭元每譏著時爲所取去賀亦早世故其詩歌世傳者鮮焉

吳武陵信州人元和初擢進士第淮西吳少陽聞其才遣客鄧平邀之將待以賓友武陵不答俄而少陽子元濟叛武陵遣以書自稱東吳王孫曰夫勢有不必得事有不必疑徒取暴逆之名而殄物敗俗不可謂智一日亡破平生親愛連頭就戮不可謂仁支屬繁衍因緣磨滅先魂傷餒不可謂孝數百里之內拘若檻穽常疑死於左右手低回姑息不可謂明且三皇以來數千萬載何有勸理亂常而能自奉者哉

元時德宗以函容御天下河北諸鎮專地不臣朝廷資以餽餉外歸者自謂得計以反爲利於是楊惠琳

劉闢李錡盧從史等又亂皇帝卽位赫然命偏師討之盡伏其辜所謂時也日者張太尉猷垣捍之勤謝易定爲國老田尙書知慮絕俗又以魏博來歸幽檀滄景皆爲信臣然而與足下者獨齊趙耳夫齊安可爲恃哉徐壓其首梁薄其翼魏斫其脛滑鍼其腹淮南承其衝分兵不足相救全舉則曹魯東平非其有也彼何苦而自棄哉若趙則固豎子耳前日主上以澤潞爲之導旣斥從史姑赦罪復爵祿之天下之人欲討者十八無何殘丞相御史朝廷以足下故未加斧鉞也然則中山博藁城之險太原乘井陘之隘燕御樂壽邢扼臨城清河絕其南弓高斷其北孤雛腐鼠求責不暇又曷以救人哉二鎮不敢動亦明矣足下何待而窮處邪昔僕之師裴道明嘗言唐家二百載有中興主當其時狠傲者盡滅河湟之地復矣今天子英武任賢同符太宗寬仁厚物有玄宗之度罰無貸罪賞無遺功諸侯豢齊趙以稔其孽羣帥築室礪兵進窺房蔡屯田繼漕前鋒扼喉後陣撫背左排右掖其幾何而不踣邪足下勿謂部曲勿我欺人心與足下一也足下反天子人亦欲反足下易地而然則嬰兇橫之命不若奉大君官守矣枕戈持矛死不得地不若坐兼爵命而保眉嗣矣足下苟能挺知幾之烈莫若發一介籍士馬土疆歸之有司上以覆載之仁必保納足下滌垢洗瑕以倡四海將校官屬不失寵且貴何哉爲國者不以纖惡蓋大善也且貳而

伐服而捨寵榮可厚骨肉可保何獨不爲哉三州至狹也萬國至廣也力不相侔判然可知假使官軍百敗而行陣未嘗乏足下一敗則成禽矣夫一壯士不能當十夫者以其左右前後咸敵也矧以一卒欲當百人哉昏迷不返諸侯之師集城下環壘劓整灌以流瘳主將怨攜士卒崩離田儉呂興發於肘腋屍不得裹宗不得祀臣僕以爲誠子孫所不祖生爲暗懷之人沒爲幽憂之鬼何其痛哉元濟得書不悟會裴度東討而韓愈爲司馬武陵勸愈爲度謀取中官常所不快者爲監軍歸素所快者於內爲吾地以傾諸侯出帛百萬以給士大夫則孰不爲丞相之人然後分三大將環賊而屯明斥候牛酒高會潛以實期授灑蔡諸將而以三期給賊令辯士持尺書劫元濟及將士約降彼無所竄謀矣時度部分已定故不見用元濟未破數月武陵自硤石望東南氣如旗鼓矛楯皆顛倒橫斜少選黃白氣出西北盤蜿相交武陵告愈曰今西北王師所在氣黃白喜象也敗氣爲賊日直木舉其盈數不閱六十日賊必亡夫天見其祥宜修事應之且洞曲守將急緩不可使吳城賊將趙陟詐而輕若以兵誘之伏以待一舉可奪其城則右臂斷矣武陵之奇譎類如此長慶初竇易直以戶部侍郎判度支表武陵主鹽北邊易直以不職薄其遇會表置和羅貯備使擇郎中爲之武陵諫曰今緣邊膏壤鞠爲榛杞父母妻子不相活前在朔方度支米價四十而無踰月積皆先取商人而後求牒還都受錢脫有寇薄城不三旬便當餓死何所取財而云和羅哉天下不治病權不歸有司也鹽鐵度支一戶部郎事今三分其務吏萬員財賦日蹙西北邊院官皆御史員外郎爲之始命若實可信今又加使權其務是御史員外久於事返不可信也今更旬月又將以郎中之爲不可信卽更時歲明公之爲亦又不可信上下相阻一國交疑誰爲可信者況一使之建胥徒走卒殆百輩督責騰呼數千里爲不寧誠欲邊隅完實獨募浮民徙罪人發沃土何必加使而增吏也易直不納久之入爲太學博士太和初禮部侍郎崔郾試進士東都公卿咸祖道長樂武陵最後至謂郾曰君方爲天子求奇材敢獻所益因出袖中書指笏郾讀之乃杜牧所賦阿房宮辭旣警拔而武陵音吐鴻暢坐客大驚武陵請曰牧方試有司請以第一人處之郾謝已得其人至第五郾未對武陵勃然曰不爾宜以賦見還郾曰如教牧果異等後出爲韶州刺史以職貶潘州司戶參軍卒初柳宗元謫永州而武陵亦坐事流永州宗元賢其人及爲柳州刺史武陵北還大爲裴度器遇每言宗元無子說度曰西原蠻未平柳州與賊犬牙宜用武人以代宗元使得優游江湖又遣工部侍郎孟簡書曰古稱一世三十年子厚之斥十二年殆半世矣霆砰電射天怒也不能終朝聖人在上安有畢世而怒人臣邪且程劉二韓皆已拔或處大州劇職獨子厚與猿鳥爲伍誠恐霧露所嬰則柳氏無後矣度未及用而宗元死始李愬節度唐鄧武陵薦李景儉王湘健智沈敏可表以自副時號知人

李商隱字義山懷州河內人或言英國公世勣之裔孫令狐楚帥河陽奇其文使與諸子游楚徙天平宣武皆表署巡官歲具資裝使隨計開成二年高錡知貢舉令狐綯雅善錡獎譽甚力故擢進士第調弘農尉以活獄忤觀察使孫簡將罷去會姚合代簡諭使還官又試拔萃中選王茂元鎮河陽愛其才表掌書記以子妻之得侍御史茂元善李德裕而牛李黨人蚩謫商隱以為詭薄無行共排笮之茂元死來游京師久不調更依桂管觀察使鄭亞府為判官亞謫循州商隱從之凡三年乃歸亞亦德裕所善緡以為忘家恩放利偷合謝不通京兆尹盧弘止表為府參軍典箋奏緡當國商隱歸窮自解緡憾不置弘止鎮徐州表為掌書記久之還朝復干緡乃補太學博士柳仲郢節度劍南東川辟判官檢校工部員外郎府罷客滎陽卒商隱初為文瑰邁奇古及在令狐楚府楚本工章奏因授其學商隱儷偶長短而繁縟過之時温廷筠段成式俱用是相夸號三十六體

薛逢字陶臣蒲州河東人會昌初擢進士第崔鉉鎮河中表在幕府鉉復宰相引為萬年尉直弘文館歷侍御史尚書郎持論繩切以謀略高自標顯初與彭城劉瑑交瑑文辭出逢數人下常易之瑑稍親近逢不得意遂相忿恨會瑑當國有薦逢知制誥者瑑猥言先朝以兩省官給事舍人先治州縣乃得除逢未試州執不可乃出為巴州刺史而楊收王鐸同牒署第收輔政逢有詩微辭譏收銜之復斥逢歸一州刺史收罷以太常少卿召還歷給事中鐸為宰相逢又以詩嘗鐸鐸怒中外亦鄙逢編傲故不見齒遷祕書監卒子廷珪進士及第大順初以司勳員外郎知制誥遷中書舍人從昭宗次華州引拜左散騎常侍稱疾免客成都光化中復為舍人累尚書左丞朱全忠兼四鎮廷珪以官告使至汴客將先見諷其拜廷珪佯不曉曰吾何德敢受令公拜乎及見卒不肯加禮

李頻字德新睦州壽昌人少秀悟遠長廬西山多所記覽其屬辭於詩尤長與里人方干善給事中姚合名為詩士多歸重頻走千里丐其品合大加獎挹以女妻之大中八年擢進士第調祕書郎為南陵主簿判入等再遷武功令於是畿民多籍神策軍吏以其橫類假借不敢繩以法頻至有神策士尚君慶通賦六年不送睥然出入閭里頻密適比伍與競君慶叩縣廷質頻即械送獄盡條宿惡請於尹殺之督所負無少貸豪猾大驚屏息奉法縣大治有六門堰者厥廢百五十年方歲饑頻發官廩庸民浚渠按故道厥水溉田穀以大稔懿宗嘉之賜緋衣銀魚俄擢侍御史守法不阿徇遷累都官員外郎表丐建州刺史既至以禮法治下更布條教時朝政亂盜興相椎斂而建賴頻以安卒官下喪歸父老相與扶柩葬永樂州為立廟黎山歲祠之天下亂盜發其冢壽昌人隨加封掩云

吳融字子華越州山陰人祖彞有名大中時觀察府召以署吏不應帥高其槩言諸朝賜號文簡先生融

學自力富辭調龍紀初及進士第韋昭度討蜀表掌書記遷累侍御史坐累去官流浪荆南依成汭久之
召爲左補闕以禮部郎中爲翰林學士拜中書舍人昭宗反正御南闕羣臣稱賀融最先至于時左右歡
駭帝有指授疊十許稿融跪作詔少選成語當意詳帝咨賞良厚進戶部侍郎鳳翔劫遷融不克從去客
閩鄉俄召還翰林遷承旨卒官

唐書卷二百三

唐書卷二百三考證

李賀傳卒年二十七○舊書作二十四

宋 端 明 殿 學 士 宋 邢 撰

列傳第一百二十九

方技

凡推步卜相醫巧皆技也能以技自顯於一世亦悟之天非積習致然然士君子能之則不迂不泥不矜不神小人能之則迂而入諸拘礙泥而弗通大方矜以夸衆神以誣人故前聖不以爲教蓋吝之也若李淳風諫太宗不濫誅許慎宗不著方劑書嚴撰諫不合乾陵乃卓然有益于時者茲可珍也至達知果撰等詭行幻怪又技之下者焉

李淳風岐州雍人父播仕隋高唐尉棄官爲道士號黃冠子以論撰自見淳風幼爽秀通羣書明步天麻算貞觀初與傅仁均爭麻法議者多附淳風故以將仕郎直太史局制渾天儀誠撫前世得失著法象書七篇上之擢承務郎遷太常博士改太史丞與諸儒修書遷爲令太宗得祕識言唐中弱有女武代王以問淳風對曰其兆既成已在宮中又四十年而王王而夷唐子孫且盡帝曰我求而殺之奈何對曰天之所命不可去也而王者果不死徒使疑似之戮淫及無辜且墜下所親愛四十年而老老則仁雖受終易

姓而不能絕唐若殺之復生壯者多殺而逞則陛下子孫無遺種矣帝采其言止瀆風於占候吉凶若節契然當世術家意有鬼神相之非學習可致終不能測也以勞封昌樂縣男奉詔與算博士梁述助教王真儒等是正五曹孫子等書刊定注解立於學官撰麟德厯代戊寅厯候者推最密自祕閣郎中復爲太史令卒所撰典章文物志已巳占等書傳於世子該孫仙宗並擢太史令唐初言厯者惟傅仁均仁均滑州人終太史令

甄權許州扶溝人以母病與弟立言究習方書遂爲高醫仕隋爲祕書省正字稱疾免魯州刺史庫狄嶽風痹不得挽弓權使穀矢嚮棚立鍼其肩隅一進曰可以射矣果如言貞觀中權已百歲太宗幸其舍視飲食訪逮其術擢朝散大夫賜几杖衣服尋卒年一百三歲所撰脈經針方明堂等圖傳于時立言仕爲太常丞杜淹苦流腫帝遣視曰去此十日午漏上且死如之有道人腹滿煩瀰二歲診曰腹曰蠱誤食髮而然令餌雄黃一劑少選吐一蛇如拇無目燒之有髮氣乃愈後以醫顯者清漳宋俠義興許胤宗洛陽張文仲李虔縱京兆韋慈藏俠官朝散大夫藥藏監胤宗仕陳爲新蔡王外兵參軍王太后病風不能言脈沈難對醫家告術窮胤宗曰餌液不可進卽以黃耆防風煮湯數十斛置牀下氣如霧熏薄之是夕爾擢義興太守武德初累進散騎侍郎關中多骨蒸疾轉相染得者皆死胤宗療視必愈或勸其著書貽後世者答曰醫特意耳思慮精則得之脈之候幽而難明吾意所解口莫能宣也古之上醫要在視脈病

乃可識病與藥值唯用一物攻之氣純而愈速今之人不善爲脈以情度病多其物以幸有功譬獵不知兔廣絡原野冀一人獲之術亦疏矣一藥偶得它味相制弗能專力此難愈之驗也脈之妙處不可傳虛善方劑終無益於世此吾所以不著書也卒年七十餘文仲仕武后時至尙藥奉御特進蘇良嗣方朝疾作仆廷中文仲診曰憂憤而成若脅痛者殆未可救頃告脅痛又曰及心則殆俄心痛而死文仲論風與氣尤精后集諸言方者與共著書詔王方慶監之文仲曰風狀百二十四氣狀八十治不以時則死及之惟頭風與上氣足氣藥可常御病風之人春秋末月可使洞利乃不困劇自餘須發則治以時消息乃著四時輕重術凡十八種上之虔縱官侍御醫慈藏光祿卿

袁天綱益州成都人仕隋爲鹽官令在洛陽與杜淹王珪韋挺游天綱謂淹曰公蘭臺學堂全且博將以文章顯謂珪法令成天地相臨不十年官五品謂挺面如虎當以武處官然三君久皆得譴吾且見之淹以待御史入天策爲學士珪太子中允挺善隱太子薦爲左衛率武德中俱以事流嶺州見天綱曰公等終且貴杜位三品難與言壽王韋亦三品後於杜而壽過之但晚節皆困見寶軌曰君伏犀貫玉枕輔角完起十年且顯立功其在梁益間邪軌後爲益州行臺僕射天綱復曰赤脈干瞳方語而浮赤入大宅公

爲將必多殺願自戒軌果坐事見召天綱曰公母憂右輔澤而動不久必還果還爲都督貞觀初太宗召見曰古有君平朕今得爾何如對曰彼不逢時臣固勝之武后之幼天綱見其母曰夫人法生貴子乃見二子元慶元爽曰官三品保家主也見韓國夫人曰此女貴而不利夫后最幼姆抱以見給以男天綱視其步與目驚曰龍瞳鳳頸極貴驗也若爲女當作天子帝在九成宮令視岑文本曰學堂瑩夷眉過目故文章振天下首生骨未成自前而視法三品肉不稱骨非壽兆也張行成馬周見曰馬君伏犀貫腦背若有負貴驗也近古君臣相遇未有及公者然面澤赤而耳無根後骨不隆壽不長也張晚得官終位宰相其術精類如此高士廉曰君終作何官謝曰僕及夏四月數既盡如期以火山令卒子客師亦傳其術爲廩犧令高宗置一鼠于匱令術家射皆曰鼠客師獨曰雖實鼠然入則一出則四發之鼠生三子嘗度江叩舟而還左右請故曰舟中人鼻下氣皆墨不可以濟俄有一男子跛而負直就舟客師曰貴人在吾可以濟江中風忽起幾覆而免跛男子乃婁師德也時有長社人張憬藏技與天綱埒太子詹事蔣儼有所問答曰公厄在三尺土下盡六年而貴六十位蒲州刺史無有祿矣儼使高麗爲莫離支所囚居士室六年還及爲蒲州歲如期則召掾史妻子告當死俄詔聽致仕劉仁軌與鄉人靖賢請占憬藏答曰劉公當五品而讎終位冠人臣謂賢曰君法客死仁軌爲尙書僕射賢曰我三子皆富田宅吾何客死俄喪三子蓋豐田宅寄死友家劉元忠尙少往見憬藏問之久不答元忠怒曰竊通有命何預君邪拂衣去憬藏遽起曰君之相在怒時位必卿相姚崇李迥秀杜景佺從之游憬藏曰三人者皆宰相然姚最貴郎中裴珪妻趙見之憬藏曰夫人目修緩法曰豕視淫又曰目有四百五夫守宅夫人且得罪俄坐姦沒入掖廷裴光廷當國憬藏以紙大署台字投之光廷曰吾既台司矣尙何事後三日貶台州刺史隋末又有高唐人乙弗弘禮當煬帝居藩召見弘禮賀曰大王爲萬乘主所戒在德而已及卽位悉詔請術家坊處之使弘禮總攝海內寢亂帝曰而昔言朕旣驗然終當奈何弘禮逡巡帝知之乃曰不言且死弘禮曰臣觀人臣相與陛下類者不長然聖人不相故臣不能知由是敕有司監視毋得與外語薛大鼎坐事沒爲奴及貞觀時有請於弘禮答曰君奴也欲何事請解衣視之弘禮指腰而下曰位方岳玄宗時有金梁鳳者頗言人貴賤天壽裴冕爲河西留後梁鳳輒言不半歲兵起君當以御史中丞除宰相又言一日向雒一日向蜀一日向朔方此時公當國冕妖其言絕之俄而祿山反冕以御史中丞召因問三日答曰雒日卽滅蜀日不能久朔方日愈明肅宗卽位而冕遂相薦于帝拜都水使者梁鳳謂呂諲曰君且輔政須大怖乃得誣責驛史撈之史突入射誣兩矢幾中走而免明年知政事李揆盧允毀服給謁梁鳳不許二人語以情梁鳳曰李自舍人闕歲而相盧不過郎官揆已相擢允吏部郎中王遠智系本琅邪後爲揚州人父曇

選爲陳揚州刺史母晝寢夢鳳集其身因有娠浮屠寶誌謂曇選曰生子當爲世方士遠知少警敏多通書傳事陶弘景傳其術爲道士又從臧兢游陳後主聞其名召入重陽殿辯論超詣甚見咨挹隋煬帝爲晉王鎮揚州使人介以邀見少選髮白俄復鬢帝懼遣之後幸涿郡詔遠知見臨朔宮帝執弟子禮咨質仙事詔京師作玉清玄壇以處之及幸揚州遠知謂帝不宜遠京國不省高祖尙微遠知密語天命武德中平王世充秦王與房玄齡微服過之遠知未識迎語曰中有聖人非王乎乃諭以實遠知曰方爲太平天子願自愛太宗立欲官之苦辭貞觀九年詔潤州卽茅山爲觀俾居之璽詔曰省所奏願還舊山已別詔不違雅素并敕立祠觀以伸曩懷未知先生早晚至江外祠舍何當就功令太史令薛頤等往宣朕意遠知多怪言詭其弟子潘師正曰吾少也有累不得上天今暑少室伯吾將行卽沐浴加冠衣若寢者遂卒或言壽蓋百二十六歲云遺命子紹業曰爾年六十五見天子七十見女君調露中紹業表其言高宗召見嗟賞追贈遠知大中大夫諡升真先生武后時復召見皆如其年又贈金紫光祿大夫天授中改諡升玄

薛頤者滑州人當隋大業時爲道士善天步律麻武德初追直秦王府密語曰德星舍秦分王當帝天下王表爲太史丞稍遷令貞觀時太宗將封泰山彗星見頤因言臣竊天意陛下未可東亦會大正上表

上與太史李淳風合數歲卒高宗時又有葉法善者括州括蒼人世爲道士傳陰陽占繇符架之術能狀劾怪鬼帝聞之召詣京師欲寵以官不拜留內齋賜殊饗時帝悉召方士化黃金治丹法善上言丹不可遽就徒費財與日請覈真僞帝許之凡百餘人皆罷嘗在東都凌空祠爲壇以祭都人悉往觀有數十人自奔火中衆大驚救而免法善笑曰此爲魅所馮吾以法攝之耳問而信病亦皆已其譎幻類若此歷高中二宗朝五十年往來山中時時召入禁內雅不喜浮屠法常力詆毀議者淺其好憎然以術高卒回之測睿宗立或言陰有助力先天中拜鴻臚卿員外置封越國公舍景龍觀追贈其父歙州刺史龍映當世開元八年卒或言生隋大業丙子死庚子蓋百七歲云玄宗下詔褒悼贈越州都督

明崇儼洛州偃師人梁國子祭酒山賓五世孫少隨父恪令安喜吏有能召鬼神者盡得其術乾封初應岳牧舉調黃安丞以奇技自名高宗召見甚悅擢冀王府文學試爲窟室使宮人奏樂其中召崇儼問何祥邪爲我止之崇儼書桃木爲二符刺室上樂卽止曰向見怪龍怖而止盛夏帝思雪崇儼坐頃取以進自云往陰山取之四月帝憶瓜崇儼索百錢須臾以瓜獻曰得之緜氏老人圍中帝召老人問故曰埋一瓜失之土中得百錢累遷正諫大夫帝令入閣供奉每謁見陳時政多託鬼神爲言至爲武后作厭勝事

又言章懷太子不德儀鳳四年爲盜所刺於東都好事者爲言崇儼役鬼勞苦爲鬼所殺而太后疑太子使客殺之故贈侍中諡曰莊擢子珪爲祕書郎命御史中丞崔謐等雜治誣服者甚衆及太子廢死狀乃明

尙獻甫衛州汲人善占候武后召見由道士擢太史令辭曰臣梗野不可以事官長后改太史局爲渾儀監以獻甫爲令不隸祕書省數問災異又於上陽宮集術家撰方域等篇長安二年熒惑犯五諸侯獻甫自陳五諸侯太史位臣命納音金也火金之仇臣且死后曰朕爲卿獸之遷水衡都尉謂曰水生金卿無憂至秋卒后嗟異復以渾儀監爲太史局云

嚴善思名讓同州朝邑人以字行父延與河東裴玄證隴西李真蔡靜皆通儒術該曉圖讖善思傳延業褚遂良上官儀等奇其能高宗封泰山舉銷聲幽數科及第調襄陽尉居親喪廬墓因隱居十年武后時擢監察御史兼右拾遺內供奉數言天下事方酷吏構大獄以善思爲詳審使平活八百餘人原千餘姓長壽中按囚司刑寺罷疑不實者百人來俊臣等疾之誣以罪譴交趾五歲得還時李淳風死候家皆不效乃詔善思以著作佐郎兼太史令聖歷二年熒惑入輿鬼后問其占對曰大臣當之是年王及善卒

長安中熒惑入月鎮犯天關善思曰法當亂臣伏罪而有下謀上之象歲餘張柬之等起兵誅二張遷給事中后崩將合葬乾陵善思建言尊者先葬卑者不得入今崩葬乾陵是以卑重尊者家月息且女國不

治金錮隙非攻鑿不能開神道幽靜多所驚竊若別攻隧以入其中卽往昔葬時神位前定更且有害曩營乾陵國有大難易姓建國二十餘年今又營之難且復生合葬非古也況事有不安豈足循據漢世皇后別起陵墓魏晉始合葬漢積祀四百魏晉祚率不長亦其驗也今若更擇吉地附近乾陵取從葬之義使神有知無所不通若其無知合亦何益山川精氣上爲列星葬得其所則神安而後嗣昌失其宜則神危而後嗣損願割私愛使社稷長久中宗不納神龍中武后喪公除太常請大習樂供郊廟詔未許善思奏曰樂者氣化所以感天地調五行漢魏喪禮以日易月蓋三年不爲禮禮必壞三年不爲樂樂必崩禮陰也樂陽也樂崩陽伏禮廢陰愆故變以適時孝道之大安人神公也茹哀戚私也王者不以私害公請如太常奏帝從之遷禮部侍郎表皇后擅政爲社稷憂求汝州刺史嘗語姚崇曰韋氏禍且塗地相王所居有華蓋紫氣必位九五公善護之及睿宗立崇以語聞召拜右散騎常侍初譙王重福徙均州過汝善思爲刺史及謀反僞除禮部尙書重福敗坐關通論死吏部尙書宋璟戶部郎中李邕薄其罪給事中韓思復固請乃流靜州始善思爲御史中書舍人劉允濟爲酷吏所陷且死善思力訟其寃得免戶部尙書王本立見之曰祁奚之救叔向嚴公有之後見允濟語未嘗及之思復之解善思也亦不自德時稱長者

之報後遇赦還開元十六年卒子向乾元中爲鳳翔尹三世皆年八十五云

杜生者許州人善易占有亡奴者問所從追戒曰自比行逢使者懇丐其鞭若不可則以情告其人果值使者於道如生語使者異之曰去鞭吾無以進馬可折道傍募代之乃往折募見亡奴伏其下獲之它日又有亡奴者生戒持錢五百伺於道見進鵠使者可市其一必得奴俄而使至其人以情告使者以一與之忽飛集灌莽上往取之而得亡奴衆以爲神時有浮屠泐者黃州人與天官侍郎張敬之善敬之以武后在位常指所服示子冠宗曰莽朝服耳俄冠宗以父應入三品詣有司言狀泐忽曰君無煩求三品也敬之大驚已而知出冠宗意敬之弟訥之疾殆泐曰公弟當位三品不足憂也已而愈嘗爲燕國公張說市宅戒曰無穿東北王隅也它日見說曰宅氣索然云何與說共視隅有三坎丈餘泐驚曰公富貴一世而已諸子將不終說懼將平之泐曰客土無氣與地脉不連譬身瘡痛補它肉無益也說子皆汗賊死斥云

張果者晦鄉里世系以自神隱中條山往來汾晉間世傳數百歲人武后時遣使召之即死後人復見居恆州山中開元二十一年刺史韋濟以聞玄宗令通事舍人裴晤往迎見語輒氣絕仆久乃蘇晤不敢逼馳白狀帝更遣中書舍人徐嶠齎書邀禮乃至東都會集賢院肩輿入宮帝親問治道神僊事語秘不傳果善息氣能累日不食數御美酒嘗云我生堯丙子歲位侍中其貌實年六七十時有刑和璞者善知人天壽師夜光者善視鬼帝令和璞推果生死懵然莫知其端帝召果密坐使夜光視之不見果所在帝謂高力士曰吾聞飲葢無苦者奇士也時天寒因取以飲果三進頽然曰非佳酒也乃寢頃視齒爛縮顧左右取鐵如意擊墮之藏帶中更出藥傳其斷良久齒已生粲然駢潔帝益神之欲以玉真公主降果未言也果忽謂祕書少監王迴質太常少卿蕭華曰諺謂娶婦得公主平地生公府可畏也二人怪語不倫俄有使至傳詔曰玉真公主欲降先生果笑固不奉詔有詔圖形集賢院懇辭還山詔可擢銀青光祿大夫號通玄先生賜帛三百匹給扶持二人至恆山蒲吾縣未幾卒或言尸解帝爲立樓霞觀其所夜光者薊州人少爲浮屠至長安因九僊公主得召見溫泉帝奇其辯賜冠帶授四門博士賜緋衣銀魚金繪千數得侍左右如幸臣和璞喜黃老作潁陽書世傳之天寶中有孫甌生者以伎聞能使石自鬪草爲人騎馳走楊貴妃喜觀之數召入宮中又有羅思遠能自隱帝學不肯盡其術試自隱常餘衣帶及思遠共試則驗厚賜金帛然卒不得帝怒裏以幘壓殺之數日有中使者自蜀還逢思遠駕而西笑曰上爲戲何虐也

姜撫宋州人自言通僊人不死術隱居不出開元末太常卿韋縉祭名山因訪隱民還白撫已數百歲召

至東都會集賢院因言服常春藤使白髮還鬢則長生可致藤生太湖最良終南往往有之不及也帝遣使者至太湖多取以賜中朝老臣因詔天下使自求之宰相裴耀卿奉觴上千萬歲壽帝悅御花萼樓宴羣臣出藤百奩徧賜之擢撫銀青光祿大夫號冲和先生撫又言終南山有旱藕餌之延年狀類葛粉帝作湯餅賜大臣右驍衛將軍甘守誠能詔藥石曰常春者千歲藟也旱藕杜蒙也方家久不用撫易名以神之民間以酒漬藤飲者多暴死乃止撫內慙悻請求藥牢山遂逃去

桑道茂者寒人失其系望善太一遁甲術乾元初官軍圍安慶緒於相州勢危甚道茂在國中密語人曰三月壬申西師潰至期九節度兵皆敗後召待詔翰林建中初上言國家不出三年有厄會奉天有王氣宜高垣堞爲王者居使可容萬乘者德宗素驗其數詔京兆尹嚴郢發衆數千及神策兵城之時盛夏趣功人莫知其故及朱泚反帝蒙難奉天賴以濟李晟爲右金吾大將軍道茂齋一縑見晟再拜曰公貴盛無比然我命在公手能見赦否晟大驚不領其言道茂出懷中一書自具姓名署其右曰爲賊逼脅固請晟判晟笑曰欲我何語道茂曰第言準狀赦之晟勉從已又以縑願易晟衫請題衫膺曰它日爲信再拜去道茂果汗朱泚僞官晟收長安與逆徒縛旗下將就刑出晟衫及書以示晟爲奏原其死是時藩鎮擅地無寧時道茂曰年號元和寇盜翦滅矣至憲宗乃驗道茂居有二柏甚茂曰人居而木蕃者去之木盛則土衰土衰則人病乃以錢數千錢埋其一復曰後有發其地而死者太和中溫造居之發藏鏹而造死

杜佑與楊炎善盧杞疾之佑懼以問道茂答曰君歲中補外則福壽叵涯矣俄拜饒州刺史後終司徒李泌病道茂署於紙曰厄三月二日就饗國與家吉而身危會中和日泌雖篤彊入德宗見泌不能步詔歸第卒是日北軍謀亂仗士禽斬之李鵬爲盛唐令道茂曰君位止此而冢息位宰相次息亦大鎮子孫百世鵬卒後石至宰相福歷七鎮諸孫通顯云

唐書卷二百四

唐書卷二百四考證

李鴻風傳子該○舊書作子該

袁天綱傳仕隋為鹽官令○舊書大業中為資官令

劉仁軌與鄉人靖賢請占云云○舊書作靖思賢

宋 端 明 殿 學 士 宋 祁 撰

列傳第一百三十一

列女

女子之行於親也孝婦也節母也義而慈止矣中古以前書所載后妃夫人事天下化之後彤史職廢婦訓姆則不及於家故賢女可紀者千載間寥寥相望唐興風化陶淳且數百年而聞家令姓竊窈淑女至臨大難守禮節白刃不能移與哲人烈士爭不朽名寒如雪霜亦可貴矣今采獲尤顯行者著之篇以緒正父子子夫夫婦婦之懿云

李德武妻裴字淑英安邑公矩之女以孝聞鄉黨德武在隋坐事徙嶺南時嫁方踰歲矩表離婚德武謂裴曰我方貶無還理君必儷它族于此長決矣答曰夫天也可背乎願死無它欲割耳誓保婦持不許夫姻媾歲時朔望裴致禮惟謹居不御薰澤讀列女傳見迹不更嫁者謂人曰不踐二廷婦人之常何異而載之書後十年德武未還矩決嫁之斷髮不食矩知不能奪聽之德武更娶余朱氏遇赦還中道聞其完節乃遣後妻為夫婦如初

楊慶妻王者世充兄之女慶以河間王子爲郇王守滎陽陷於世充故世充妻之用爲管州刺史太宗攻洛陽慶謀於王歸唐謝曰鄭以我奉箕箒者綴公之心今負恩背義自爲身謀可若何至長安則公家婢耳願送我還東都慶不聽王謂左右曰唐勝則鄭滅鄭安則吾夫死若是生何益乃飲藥死慶入朝官宜州刺史

房玄齡妻盧氏其世玄齡微時病且死諉曰吾病革君年少不可寡居善事後人盧泣入帷中剔一目示玄齡明無它會玄齡良愈禮之終身

王蘭英者獨孤師仁之姆師仁父武都謀歸唐王世充殺之師仁始三歲免死禁錮蘭英請髡得保養許之時喪亂餓死者籍籍游丐道路以食師仁身啖土飲水後詐爲採薪竊師仁歸京師高祖嘉其義詔封蘭英永壽鄉君

楊三安妻李京兆高陵人舅姑亡三安又死子幼孤寡晝田夜紡凡三年葬舅姑及夫兄弟凡七喪遠近嗟涕太宗聞而異之賜帛三百段遣州縣存問免其徭役

樊會仁母敬蒲州河東人字象子笄而生會仁夫死事舅姑祥順家以其少欲嫁之潛約婚於里人至期陽爲母病使歸視敬至知見給乃外爲不知者私謂會仁曰吾孀處不死者以母老兒幼今舅將奪吾志汝云何會仁泣敬曰兒母嗚乃何隙遁去家追及半道以死自守乃罷會仁未冠卒時敬母又終歸葬謂所親曰母死子亡何生爲不食數日死聞者憐之

衛孝女絳州夏人字無忌父爲鄉人衛長則所殺無忌甫六歲無兄弟母改嫁遠長志報父仇會從父大延客長則在坐無忌抵以甕殺之詣吏稱父冤已報請就刑巡察使褚遂良以聞太宗免其罪給驛從雍州賜田宅州縣以禮嫁之

鄭義宗妻盧者范陽士族也涉書史事舅姑恭順夜有盜持兵劫其家人皆匿竄惟姑不能去盧冒刃立姑側爲賊摔捶幾死賊去人問何爲不懼答曰人所以異鳥獸者以其有仁義也今隣里急難尙相赴況姑可委棄邪若百有一危我不得獨生姑曰歲寒然後知松柏後凋吾乃今見婦之心

劉寂妻夏侯滑州胙城人字碎金父長雲爲鹽城丞喪明時劉已生二女矣求與劉絕歸侍父疾又事後母以孝稱五年父亡毀不勝喪被髮徙跣身負土作冢廬其左寒不縣日一食者三年詔賜物二十段粟十石表異門閭後其女居母喪亦如母行官又賜粟帛表其門

于敏直妻張者皖城公儉女也生三歲每父母病已能晝夜省視顏色如成人及長愈恭順仁孝儉病篤聞之號泣幾絕儉死一慟遂卒高宗懿其行賜物百段以狀屬史官

楚王靈龜妃上官者下邳士族也靈龜出繼哀王後而舅姑在妃朝夕侍奉謹甚凡珍美非經獻不先嘗靈龜卒將葬前妃無近族議者欲不舉妃曰逝者有知魂可無託乎乃備禮合葬聞者嘉歎喪除兄弟共諭妃少又無子可不有行泣曰丈夫以義婦人以節我未能殉溝壑尚可御粧澤祭他胙乎將自刎則眾遂不敢彊

楊紹宗妻王華州華陰人在祿而母亡繼母鞠愛父征遼歿繼母又卒王年十五乃舉二母柩而立父象招魂以葬廬墓左永徽中詔楊氏婦在隋時父歿遼西能招魂克葬至祖父母塋隧親服板築哀感行路因賜物段并粟以闕表門

賈孝女濮州鄆城人年十五父為族人玄基所殺孝女弟彊仁尚幼孝女不肯嫁躬撫育之彊仁能自樹立教伺玄基殺之取其心告父墓彊仁詣縣言狀有司論死孝女詣闕請代弟死高宗閱歎詔并免之內徙洛陽

李氏妻王阿足深州鹿城人早孤無兄弟歸李氏數歲夫死無子以孀姊高年無供養乃不忍嫁晝耕夜織能辦生事餘二十年姊乃亡葬送如禮鄉人服其義爭遣女妻往師其風訓壽終于家

樊彥琛妻魏者揚州人彥琛病魏曰公病且篤不忍公獨死彥琛曰死生常道也幸養諸孤使成立相從而死非吾取也彥琛卒值徐敬業難降兵中聞其知音令鼓筆魏曰夫亡不死而遺我管絃願由我發引刀斬其指軍伍欲彊妻之固拒不從乃刃擬頸曰從我者不死魏厲聲曰狗盜乃欲辱人速死吾志也乃見害聞者傷之

李會母者失其氏有淵識會為監察御史得粟米量之三斛而贏問于史曰御史米不繫也又問車庸有幾曰御史不償也母怒救歸餘米償其庸因切責會會乃劾會官自言狀諸御史聞之有慙色

汴女李者年八歲父亡殯于堂十年朝夕臨及笄母欲嫁之斷髮丐終養居母喪哀號過人自庀葬具州里送葬千餘人廬于墓蓬頭跣而負土以完園塋時松數百武后時按察使薛季昶表之詔樹闕門闕崔繪妻盧者鸞臺侍郎獻之女獻有美名繪喪盧年少家欲嫁之盧稱疾不許女兄適工部侍郎李思沖早亡思沖方顯重表求繼室詔許家內外姻皆然可思沖歸幣三百舉盧不可曰吾豈再辱於人乎寧沒身為婢是夕出自寶篋織幘面暹崔舍斷髮自誓思沖以聞武后不奪也詔為浮屠尼以終

堅貞節婦李者年十七嫁為鄭廉妻未踰年廉死常布衣蔬食夜忽夢男子求為妻初不許後數數夢之李自疑容貌未衰醜所召也即截髮麻衣不薰飾垢面塵膚自是不復夢刺史白大威欽其操號堅貞節婦表旌門闕名所居曰節婦里

符鳳妻某氏字玉英尤姝美鳳以罪徙儋州至南海為獠賊所殺裔玉英私之對曰一婦人不足事眾男子請推一長者賊然之乃請更衣有頃盛服立於舟罵曰受賊辱不如死自沈於海

高叡妻秦叡為趙州刺史為默嚙所攻州陷叡仰藥不死至默嚙所示以寶帶異袍曰降我賜爾官不降自死叡視秦秦曰君受天子恩當以死報賊一品官安足榮自是皆瞑目不語默嚙知不可屈乃殺之

王琳妻韋者士族也琳為眉州司功參軍俗僭侈盛飾韋不知有警珥訓二子堅冰有法後皆名聞琳卒時韋年二十五家欲壻嫁之韋固拒至不聽音樂處一室或終日不食卒年七十五著女訓行於世

盧惟清妻徐淄州人世客陳留惟清仕歷校書郎徐女兄之夫李宜得以罪斥惟清坐僚姻貶播川尉徐還鄉里糲食斥鈔膏采締不御會大赦徐間關迎惟清至荊州聞惟清死二髯奴將劫徐歸下江徐知之數其罪奴不敢逼劫其貲去徐倍道行至播川足齟流血得惟清尸以喪還闔歲至洛陽既葬以無子終服遺陳留汴州刺史齊澣高其節頌而詩之

饒娥字瓊真饒州樂平人生小家勤織紝頗自修整父勸漁于江遇風濤舟覆屍不出娥年十四哭水上不食三日死俄大震電水蟲多死父屍浮出鄉人異之歸贈具禮葬父及娥鄱水之陰縣令魏仲光碣其墓建中初黜陟使鄭叔則表旌其閭河東柳宗元為立碑云

受汙於賊乃自投下賊大駭俄而仲亦躍而墜京兆尹第五琦表其烈行詔旌門閭免其家徭役官為庀葬

盧甫妻李秦州成紀人父瀾永泰初為斬令梁宋兵興瀾諭降劇賊數千人刺史曹昇襲賊敗之賊疑瀾賣已執瀾及其弟渤兄弟爭相代死李見父被執亦請代父遂皆遇害又有王泛妻裴者亦倖賊中欲汙之罵曰吾衣冠子豈愛生受汙邪賊臨以兵罵不止乃支解焉宣慰使李季卿聞狀詔贈李孝昌縣君裴河東縣君瀾渤並贈官

鄒待徵妻薄者從待徵官江陰袁晁亂薄為賊所掠將汙之不從語家媪使報待徵曰我義不辱即死於水賊去得其尸義聲動江南聞人李華作哀節婦賦

金節婦者安南賊帥陶齊亮之母也常以忠義誨齊亮頑不受遂絕之自田而食紡而衣州里矜法焉大厯初詔賜兩丁侍養本道使四時存問終身

高慙女名妹妹父彥昭事李正己及納拒命質其妻子使守濮陽建中二年挈城歸河南都統劉玄佐納屠其家時女七歲母李憐其幼請免死為婢許之女不肯曰母兄皆不免何賴而生母兄將被刑徧拜四

乾隆四年校刊 唐書卷二百五列傳 四

方女問故答曰神可祈也女曰我家以忠義誅神尚何知而拜之問父在所西嚮哭再拜就死德宗駭歎詔太常諡曰愍諸儒爭爲之誄彥昭從立佐救靈陵復汴州累功授潁州刺史朝廷錄其忠居州二十年不徙卒贈陝州都督

楊烈婦者李侃妻也建中末李希烈陷汴謀襲陳州侃爲項城令希烈分兵數千略定諸縣侃以城小賊銳欲逃去婦曰寇至當守力不足則死焉君而逃尚誰守侃曰兵少財乏若何婦曰縣不守則地賊地也倉廩府庫皆其積也百姓皆其戰士也於國家何有請重賞募死士尚可濟侃乃召吏民入廷中曰令誠若主也然滿歲則去非如吏民生此土也墳墓存焉宜相與死守忍失身北面奉賊乎衆泣許諾乃徇曰以瓦石擊賊者賞千錢以刀矢殺賊者萬錢得數百人侃率以乘城婦身自爨以享衆報賊曰項城父老義不下賊得吾城不足爲威宜亟去徒失利無益也賊大笑侃中流矢還家婦責曰君不在人誰肯固死于外猶愈於牀也侃遽登城會賊將中矢死遂引去縣卒完詔遷侃太平令先是萬歲通天初契丹寇平州鄒保英爲刺史城且陷妻奚率家僮女丁乘城不下賊詔封誠節夫人默啜攻飛狐縣令古玄應妻高能固守虜引去詔封徇忠縣君史思明之叛衛州女子侯滑州女子唐青州女子王相與歃血赴行營計賊滑濮節度使許叔冀表其忠皆補果毅雖敢決不忘於國然不如楊烈婦慨知君臣大義云

賈直言妻董直言坐事貶嶺南以妻少乃訣曰生死不可期吾去可而無須也董不答引繩束髮封以帛使直言署曰非君手不解直言貶二十年乃還署帛宛然及湯沐髮墮無餘

李孝女者名妙法瀛州博野人安祿山亂被劫徙它州聞父亡欲間道奔喪一子不忍去割一乳留以行既至父已葬號踊請開父墓以視宗族不許復持刀刺心乃爲開見棺舌去塵髮治拭之結廬墓左手植松柏有異鳥至後母病或不食飲女終日未嘗視匕箸及亡刺血書于母臂而葬廬墓終身

李湍妻某氏湍籍吳元濟軍元和中自拔歸烏重胤妻爲賊縛而嚙食之將死猶號湍曰善事烏僕射觀者歎泣重胤請以其事屬史官詔可

董昌齡母楊世居蔡昌齡更事吳少陽至元濟時爲吳房令母常密戒曰逆順成敗兒可圖之昌齡未決徙鄆城楊復曰逆賊欺天神所不福當速降無以我累兒爲忠臣吾死不憚會王師逼鄆城昌齡乃降憲宗喜卽拜鄆城令兼監察御史昌齡謝曰母之訓也臣何能帝嗟嘆元濟囚楊欲殺者屢矣蔡平而母在陳許節度李遜表之封北平郡太君

王孝女徐州人字和子元和中父兄皆防秋屯涇州吐蕃寇邊並戰死和子年十七單身被髮徒跣縶裳抵涇屯日丐貸護二喪還葬于鄉植松柏翦髮壞容廬墓所節度使王智興白狀詔旌其門

段居貞妻謝字小娥洪州豫章人居貞本歷陽俠少年重氣決娶歲餘與謝父同賈江湖上並為盜所殺小娥赴江流傷腦折足人救以免轉側丐食至上元夢父及夫告所殺主名離析其文為十二言持問內外姻莫能曉隴西李公佐隱占得其意曰殺若父者必申蘭若夫必申春試以是求之小娥泣謝諸申乃名盜亡命者也小娥詭服為男子與傭保雜物色歲餘得蘭于江州春于獨樹浦蘭與春從兄弟也小娥託傭蘭家日以謹信自效蘭寢倚之雖包苴無不委小娥見所盜段謝服用故在益知所夢不疑出入二期伺其便它日蘭盡集羣偷醜酒蘭與春醉臥廬小娥閉戶拔佩刀斬蘭首因大呼捕賊鄉人牆救禽春得賊千萬其黨數十小娥悉疏其人上之官皆抵死乃始自言狀刺史張錫嘉其烈白觀察使使不為請還豫章人爭聘之不許祝髮事浮屠道垢衣糲飯終身

楊含妻蕭父歷為撫州長史以官卒母亦亡蕭年十六與媚皆韶淑毀貌載二喪還鄉里貧不能給舟庸次宣州戰鳥山舟子委柩去蕭結廬水濱與婢穿壙納棺成墳時松柏朝夕臨有馴烏縞兔菌芝之祥長老等為立舍歲時進粟繾裘滿不釋縷人高其行或請昏女曰我弱不能北還君誠為我致二柩葬故里請事君子於是含以高安尉罷歸聘之且請除素蕭以親未葬許其載辭其采已葬乃釋服而歸楊云

章雍妻蕭張弘靖鎮幽州也表雍在幕府朱克融亂雍被劫蕭聞難與雍皆出左右格之不退雍臨刃曰我生無益願今日死君前刑者斷其臂乃殺雍蕭意象晏然觀者哀歎是夕死大和中楊志誠表其烈詔贈蘭陵縣君雍字和叔擢進士第

衡方厚妻程大和中方厚為豈州錄事參軍招討使董昌齡治無狀方厚數爭事昌齡怒將執付吏辭以疾不免即以死告臥棺中昌齡知之使闔棺甚牢方厚閉久以爪攫棺爪盡乃絕程懼并死不敢哭昌齡恬不疑厚遣其喪程徒行至闕下叩右銀臺門自刎陳寃下御史鞠治有實昌齡乃得罪文宗詔封程武昌縣君賜一子九品正員官

鄭孝女兗州瑕丘人父神佐為官兵戰死慶州時母已亡又無兄弟女時年二十四即翦髮毀服身護喪還鄉里與母合葬廬墓下手樹松柏成林初許適牙兵李玄慶至是謝不嫁大中中兗州節度使蕭俶狀于朝有詔旌表其閭

李廷節妻崔乾符中廷節為邠城尉王仙芝攻汝州廷節被執賊見崔妹美將妻之詰曰我士人妻死亡有命奈何受賊汙賊怒劓其心食之

殷保晦妻封敖孫也名絢字景文能文章草隸保晦歷校書郎黃巢入長安共匿蘭陵里明日保晦逃賊悅封色欲取之固拒賊誘說萬詞不答賊怒勃然曰從則生不然正膏我劍封罵曰我公卿子守正而死

猶生也終不辱逆賊手遂遇害保晦歸左右曰夫人死矣保晦號而絕

賣烈婦者河南人朝邑令畢某妻初同州軍亂逐節度使李瑋走河中令匿望仙里不知所舍乃仇家也夜半盜入捧令首欲殺之賣泣蔽捍苦持賊袂至中刀不解令得脫走不死賊亦去京兆聞之歸酒帛醫藥幾死而愈

李拯妻盧者美姿能屬文拯字昌時咸通末擢進士遷累考功郎中黃巢亂避地平陽僖宗召爲翰林學士帝出寶雞陷于嗣襄王熈熈敗拯死盧伏尸哭王行瑜兵逼之不從脅以刃斷一臂死

山陽女趙者父盜鹽當論死女詣官訴曰迫飢而盜救死爾情有可原能原之邪否則請俱死有司義之許滅父死女曰身今爲官所賜願毀服依浮屠法以報卽截耳自信侍父疾卒不嫁

周迪妻某氏迪善賈往來廣陵會畢師鐸亂人相掠賣以食迪飢將絕妻曰今欲歸不兩全君親在不可并死願見賣以濟君行迪不忍妻固與詣肆售得數千錢以奉迪至城門守者誰何疑其給與迪至肆問狀見妻首已在柎矣迪裹餘體歸葬之

李延壽妻王者當楊行密時延壽事行密爲壽州刺史惡行密不臣與盩厔節度使田頴謀絕之以歸唐事泄行密以計召延壽欲與揚州延壽信之將行王曰今若得揚州成宿志是與衰在時非衰家也然願日一介爲贈計之及爲行密所殺介不至王曰事敗矣卽歸家僕授兵器方闔扉而捕騎至遂出私帑施民發百煖焚牙居呼天曰我誓不爲婦人辱赴火死

列女傳楊三安妻李京兆高陵人○舊書雍里涇陽人

劉寂妻夏侯時劉已生二女矣求與劉絕歸侍父疾五年父亡毀不勝喪云云○舊書侍養經十五年父卒毀瘠廬墓云云

魏王靈龜妃上官者下邳士族也○舊書作上邳人

宋 端 明 殿 學 士 宋 祁 撰

列傳第一百三十一

外戚

凡外戚成敗視主德何如主賢則共其榮主否則先受其禍故太宗檢貴倖裁賞賜貞觀時內里無敗家高中二宗柄移豔私產亂朝廷武韋諸族羞嬰頸血一日同汗鉄刃玄宗初年法行近親裏表脩敕天寶奪明委政妃宗階召反虜遂喪天下楊氏之誅唯類不遺蓋數十年之寵不償一日之慘甲第厚貲無救同坎之悲寧不哀哉代德而降關尹參嬖後宮雖多無赫赫顯門亦無刀鋸大戮故用福甚者得禍酷取名少者蒙責輕理所固然若乃長孫無忌之功武平一之識吳淑之忠弗緣內寵者自見別傳

獨孤懷恩元貞皇后弟也父整仕隋為涿郡太守懷恩之幼隋文帝獻皇后以姪養宮中逮長稍學記書而居財不訾喜交豪猾博徒為鄆令以疾免高祖平京師拜長安令頗嚴明如職而辦帝受禪擢工部尚書初廣州刺史韋義節擊堯君素於蒲州不克帝遣懷恩代將性貪寡算略戰無功士喪沮詔書切責而懷恩稍怨望帝嘗與戲曰弟姑子悉有天下次當爾邪懷恩內喜以為天命既而居忽忽咤曰我家渠

獨女子富貴也因謀亂是時虞鄉南山多宿盜而劉武周使宋金剛略澮州帝發關中軍屬秦王屯栢壁繇是懷恩與磨下元君寶解令榮靜謀引王行本軍與武周連和割河東以啗之引羣賊取永豐倉絕秦王餉道長驅三輔會君素死而行本得其兵部畫已定而夏人呂崇茂殺縣令應武周帝敕懷恩與永安王孝基陝州總管于筠內史侍郎唐儉擊夏爲金剛所掩諸將皆沒于賊君寶與開府劉讓私侮懷恩曰不早舉大事以及斯辱也故謀澹露及秦王敗武周於美良川懷恩逃歸帝命率師攻蒲州君寶聞曰王者不死果其然唐儉知狀會武周遣劉讓求罷兵因白發懷恩等姦于時行本舉蒲州降懷恩勒兵入城帝方濟河而讓至具得反狀帝召之懷恩不知也單舟以來卽縛之窮索黨與縊死于獄以首徇華陰市籍入其家

武士驥字信世殖貲喜交結高祖嘗領屯汾晉休其家因被顧接後留守太原引爲行軍司鎧參軍募兵既集以劉弘基長孫順德統之王威高君雅私謂士驥曰弘基等皆背征三衛罪當死奈何授之兵吾且効繫之士驥曰此皆唐公客若爾必有大嫌故威等疑不發會司兵參軍田德年欲勸威効募人狀士驥嘗謂曰討捕兵悉起唐公威君雅無與徒寄坐耳何能爲德平亦止兵起士驥不與謀也以大將軍府鎧曹參軍從平京師爲光祿大夫義原郡公自言嘗夢帝騎而上天帝笑曰爾故王威黨也以罷繫劉弘基等其意可錄且嘗禮我故爾汝以官今胡廷妾媵我邪累遷工部尚書進封應國公恩和并一州都督

卒贈禮部尚書諡曰定高宗永徽中以士驥仲女爲皇后故崇贈并州都督司徒周國公咸亨中加贈太尉兼太子太師太原郡王配享高祖廟廷列功臣上后監朝尊爲忠孝太皇建崇先府置官屬追王五世后革命更於東都立武氏七廟追冊爲帝諸妣皆隨帝號曰皇后先天下有詔削士驥僞號仍爲太原王廟遂廢始士驥娶相里氏生子元慶元爽又娶楊氏生三女元女妻賀蘭氏早寡季女妻郭氏不顯士驥卒後諸子事楊不盡禮銜之后立封楊代國夫人進爲榮國后姊韓國夫人於時元慶已官宗正少卿元爽少府少監兄子惟良衛尉少卿楊諷后上疏出元慶等于外以示退讓由是元慶斥龍州元爽濠州惟良始州元慶死元爽流振州乾封時惟良及弟淄州刺史懷運與岳牧集泰山下於是韓國有女在宮中帝尤愛幸后欲并殺之卽導帝幸其母所惟良等上食后寘葷焉賀蘭食之暴死后歸罪惟良等誅之諷有司改姓蝮氏絕屬籍元爽緣坐死家屬投嶺外后取賀蘭敏之爲士驥後賜氏武襲封擢累左侍極關臺太史令與名儒李嗣真等參與刊撰敏之韶秀自喜系於榮國挾所愛桃橫多過失榮國卒后出珍幣建佛廬徵福敏之乾匿自用司衛少卿楊思儉女選爲太子妃告婚期矣敏之聞其美彊私焉楊喪未畢視衰癯奏音樂太平公主往來外家宮人從者敏之悉逼亂之后疊數怒至此暴其惡流雷州表復故姓

道中自經死乃還元爽之子承嗣奉土護後宗屬悉原土護兄士稜士逸士稜字彥威少柔愿力于田官
司農少卿宣城縣公常主苑囿農稼事卒贈潭州都督陪葬獻陵

士逸字述有戰功爲齊王府戶曹叅軍六安縣公從王守太原爲劉武周所執嘗遣間人陳破賊計賊平
擢授益州行臺左丞數言當世得失高祖嘉納之終韶州刺史

承嗣既還擢尙輦奉御襲周國公遷祕書監禮部尙書俄以太常卿同中書門下三品未幾辭位垂拱初
以春官尙書同鳳閣鸞臺平章事改納言代蘇良嗣爲文昌左相性暴輕忍禍聞左司郎中喬知之婢竊
娘美且善歌奪取之知之作綠珠篇以諷婢得詩恨死承嗣怒告酷吏殺之殘其家初后擅政中宗幽逐
承嗣自謂傳國及己武氏當有天下卽諷后革命去唐家子孫誅大臣不附者倡議追王先世立宗廟又
王元慶曰梁王諡憲元爽魏王諡德后從父士讓楚王諡僖士逸蜀王諡節又贈兄子承業陳王而承嗣
爲魏王元慶子三思爲梁王士讓之孫攸靈爲建昌王攸歸九江王攸望會稽王士逸孫懿宗河內王嗣
宗臨川王仁範河間王仁範子載德潁川王士稜孫攸暨于乘王維良子攸宜建安王攸緒安平王從子
攸止恆安王重規高平王承嗣子延基南陽王延秀淮陽王三思子崇訓高陽王崇烈新安王承業子延
暉嗣王延祚咸安王承嗣實封千戶監修國史密諭后黨鳳閣舍人張嘉福使洛州人上書請立己爲

皇太子以難后意后問長信格輔元皆執不宜承嗣不得已奏請責論嘉福等不罪也怨長信等皆以

罪誅以特進罷未幾復同鳳閣鸞臺三品承嗣爲左相而攸靈爲納言故皆罷又與三思同三品不及月
俱免復拜特進后決意還太子矣久之還太子太保不得志鞅鞅憤死贈太尉并州牧諡曰宣延基襲爵
后嫌斥其名更曰繼魏王長安初與妻永泰郡主及邵王私語張易之兄弟事後忿爭語聞后怒令自殺
以延義代王中宗復位侍中敬暉等言諸武不當王與羣臣白奏事不兩大武家諸王宜皆免帝柔昏不
斷又素畏太后且欲悅安之更言攸暨三思皆與去二張功以折暉等纒降封一級三思王德靜郡攸暨
壽春懿宗爲耿國公攸靈江國攸望葉國嗣宗管國攸宜息國重規鄗國延義魏國攸緒葉國崇訓鄆國
延祿爲咸安郡公直臣宋務光蘇安恆上書言武諸王鑿封不厭人心帝不悟載德終湖州刺史諡武烈
攸歸歷司屬少卿至齊州刺史事母孝姊亡甚不嘗五辛語輒流涕攸止絳州刺史三人死太后時不及
削封攸宜歷同州刺史萬歲通天初爲清邊道行軍大總管討契丹后親饒白馬寺師無功還拜左羽林
大將軍景龍時遷右羽林卒總禁兵前後十年嗣宗終司衛卿重規爲汴鄭二州刺史未至役人營繕后
怒貶廬州刺史自是著令諸王爲州不得擅營治爽厥之叛以重規爲天兵中道大總管與沙叱忠義張
仁亶引衆三十萬討之左羽林大將軍閻敬客爲西道後軍兵十五萬後援還爲左金吾衛大將軍終衛

尉卿

延秀母本帶方人坐其家沒入奚官以妹惠賜承嗣生延秀突厥默噶薦女和親后令延秀納之詔右豹韜大將軍闕知微右武衛郎將楊鸞莊齋金幣送至突厥所知微等潛約默噶執延秀進寇媿檀故延秀不得歸神龍初默噶請和因延秀送款還封栢國公左衛中郎將宗兄崇訓尚安樂公主數與宴昵頗通突厥語傲厲驕舞姿度閑冶主愛悅會崇訓死遂私侍主後因尚焉以太常卿兼右衛將軍封恆國公三思死皇后復私延秀故延秀益自肆主府倉曹參軍何鳳說曰今天下繫心武家庶幾再興且讖曰黑衣神孫被天裳神孫非公尚誰哉因勸服阜衣惑眾皇后敗尚與主居禁中同斬蕭章門攸望以太府卿貶死春州諸武屬坐延秀誅徙者略盡獨載德子平一以文章顯與攸緒常避盛滿故免自有傳攸靈天授中擢累納言踰年以左羽林衛大將軍罷俄還納言久乃罷為冬官尚書聖曆初同鳳閣鸞臺平章事自承嗣三思罷政事間一年攸靈三思復當國置句使苛取民貲產毀族者凡七八呼天自冤築大庫百餘舍聚所得財一昔火不遺一錢以冬官尚書罷神龍初終岐州刺史贈尚書右僕射

三思當太后時累進夏官春官尚書監修國史爵為王契丹陷營州以榆關道安撫大使屯邊還同鳳閣鸞臺三品踰月去位又檢校內史罷為太子少保遷賓客仍監國史三思性傾諛善迎諧主意鉤探隱微故后頗信任數幸其第賞予尤渥二張方悉盡三思痛屈節為懷義德馬信言昌宗為王子晉後身引公卿歌咏淫汙覲然媚人而不恥也后春秋高厭居宮中三思欲因此市權誘脅羣不肖即建營三陽宮於嵩山興泰宮於萬壽山請太后歲臨幸己與二張扈侍馳騁竊威福自私云工役鉅萬萬百姓愁歎崇訓之尚主也三思方輔政中宗居東宮欲寵耀其下乃令具親迎禮宰相李嶠蘇味道等及沈佺期宋之問諸有名士造作文辭慢泄相矜無復禮法中宗復位擢崇訓駙馬都尉太常卿兼左衛將軍三思進位司空同中書門下三品加實戶五百固辭進開府儀同三司會降封裁減實戶俄以太皇遺詔還所減而封崇訓鎬國公初彥範等已誅二張薛季昶劉幽求勸并誅三思等不從翌日三思因皇后潛入宮中反

易國政數日而彥範等皆失柄所斥去者悉還詔羣臣復循太后法三思建言大帝封泰山則天皇后建明堂封嵩山二聖之美不可廢帝聽其言遂更名五縣曰乾封合宮永昌登封告成云明年春大旱帝遣三思攸暨禱乾陵而雨帝悅三思因主請復崇恩廟吳順二陵皆置令丞其黨鄭愔上聖感頌帝為刻石補闕張景源建言母子承業不可言中興所下制書皆除之於是天下名祠改唐興龍興云補闕權若訥又言制詔如貞觀故事且太后遺訓母儀也太宗舊章祖德也必襲當自近者始帝褒答是時起毬場苑中詔文武三品分朋為都帝與皇后臨觀崇訓與駙馬都尉楊慎交注膏築場以利其澤用功不訾人苦

之三思既私韋后又與上官昭容亂內忌節愍太子即與主謀廢之太子懼故發羽林兵圍三思第并崇
訓斬之殺其黨十餘人時疾三思姦亂竊國比司馬懿其忌阻正人特甚嘗曰我不知何等善人唯與
我者殆是哉與宗楚客兄弟紀處訥崔湜甘元東相驅煽王同皎周憬張仲之等不勝憤謀殺之為冉祖
雍宋之孫李俊所白皆坐死因逮染五王而崔湜遣周利貞就殺之故祖雍與御史姚紹之等五人號三
思五狗司農少卿趙履温中書舍人鄭愔長安令馬構司勳郎中崔日用監察御史李懷託其權熏炙內
外其尤干政事者天下語曰崔冉鄭亂時政以爵賞自相崇樹凡構大獄汗點善良破壞其宗天下為蕩
然始韋月將高軫上疏極言三思過惡有司殺月將逐軫惡地黃門侍郎宋憬執奏俄見斥其權大抵如
此既死帝為舉哀廢朝五日贈太尉復封梁王諡曰宣追封崇訓魯王諡曰忠主以太子首祭三思柩睿
宗立以父子皆逆節斲棺暴尸夷其墓

懿宗以司農卿爵為郡王歷懷洛二州刺史神功元年孫萬榮敗王孝傑兵詔懿宗為神兵道大總管討
之而婁師德沙叱忠義並為總管兵凡二十萬次趙州懿宗聞賊且至懼不知所出欲棄軍走或勸曰賊
雖眾無輜載以鈔剽為命若按兵老之擊其歸可成大功懿宗不暇計退保相州賊遂進屠趙州後萬榮
死懿宗復與婁師德撫循河北人有自賊中歸者一切抵死先剔取膽乃殺之血沫前而舉動自如始萬
榮入寇也別號何阿小墮冀州殺人無餘種以懿宗暴忍似之故號稱兩何相諺曰唯此兩何殺人最多

初懿宗天授間受詔訊大獄誅大臣王公皆深排巧引內刑適中無有脫者其險酷雖周來等不能繼也
神龍初遷太子詹事終懷州刺史

攸暨自右衛中郎將尚太平公主拜駙馬都尉累遷右衛大將軍天授中自千乘郡王進封定王寶封戶
六百遷麟臺監司祀卿長安中降王壽春加特進中宗時拜司徒復王定加戶千固辭進開府儀同三司
延秀之誅降楚國公攸暨沈謹和厚於時無忤專自奉養而已景龍中卒贈太尉并州大都督還定王諡
曰忠簡坐公主大逆夷其墓

韋温者中宗廢后庶人從父兄也后父玄貞歷普州參軍事以女為皇太子妃故擢累豫州刺史帝幽房
陵玄貞流死欽州妻崔為蠻首甯承所殺四子洵浩洞泚同死容州后二女弟逃還京師帝復政是日詔
贈玄貞上洛郡王太師雍州牧益州大都督温父玄儼魯國公特進并州大都督遣使者迎玄貞喪詔廣
州都督周仁軌討甯承斬其首祭崔柩官仁軌左羽林大將軍汝南郡公柩至帝與后登長樂宮望而哭
贈鄧王諡文獻號廟曰褒德陵曰榮先置令丞給百戶掃除贈洵吏部尚書汝南郡王浩太常卿武陵郡
洞衛尉卿淮陽郡泚太僕卿上蔡郡並葬京師温初試吏坐贓斥神龍初擢宗正卿遷禮部尚書封魯國

公弟潯自洛州戶曹參軍事連拜左羽林大將軍曹國公后大妹嫁陸頌進國子祭酒仲妹嫁嗣號王繼
潯子捷尙成安公主温從弟濯尙定安公主並拜駙馬都尉捷爲右羽林將軍彘龍三年温以太子少保
同中書門下三品遙領揚州大都督温既見天下事在手欲自殖以牢其權引用支黨不相一公卿雖畏
伏然温無能不如諸武凶而熾也潯初兼修文館大學士時熒惑久留羽林后惡之方潯從至温泉后毒
殺之以塞變厚贈司徒并州大都督潯兄弟頗以文詞進帝方盛選文章侍從與賦詩相娛樂潯雖爲學
士常在北軍無所造作有富商抵罪萬年令李令質按之濯馳救令質不從毀於帝帝召令質至左右爲
恐令質從容曰濯於賊非親但以貨爲請濯雖勢重不如守陛下法死無恨帝釋不責帝崩后專政具有
變敕温盡總內外兵守省中又以從子播捷從弟瑋高嵩分領左右羽林軍温與宗楚客武延秀等說后
託圖讖韋氏當受命謀殺少帝內憚相王太平公主屬尊欲先除之然後發其謀而立宗兵夜起將軍萬
福順攻立武門入羽林斬播瑋高嵩首以徇軍中相率而應無敢後后死遲旦斬温分捕諸韋子弟無
少長皆斬周仁軌者京兆萬年人后母族也方爲并州長史殘酷嗜殺戮異日見堂下有斷臂惡之送于
野數昔往視故在是月韋后敗使者誅仁軌刑人舉刀仁軌承以臂墮地乃悟睿宗夷立貞洵墳墓民盜
取寶玉略盡天寶九載復詔發掘長安尉薛榮先往視冢銘載葬日月與發冢日月正同而陵與尉名合

王仁皎字鳴鶴玄宗廢后父也景龍中以將帥舉授甘泉府果毅遷左衛中郎將帝卽位以后故擢將作
大匠進累開府儀同三司封祁國公食戶三百仁皎避職不事委違名譽厚奉積賸美貨而已卒年
六十九贈太尉益州大都督諡昭宣官爲治葬柩行帝御望春亭過喪詔張說文其碑帝爲題石子守一
與后孽生帝微時與雅舊後詔尙清陽公主從討太平主有功由尙乘奉御遷殿中少監晉國公累進太
子少保襲父爵被遇良渥后廢貶柳州別駕至藍田賜死守一沓墨無顧藉財蓄巨萬皆籍入于官

楊國忠太真妃之從祖兄張易之之出也嗜飲博數旬貸于人無行檢不爲姻族齒年三十從蜀軍以屯
優當遷節度使張宥惡其人笞屈之然卒以優爲新都尉罷去益困蜀大豪解于仲通頗資給之從父玄
琰死蜀州國忠護視其家因與妹通所謂號國夫人者哀其貲至成都樗蒲一日費輒盡乃亡去久之調
扶風尉不得志復入蜀劍南節度使章仇兼瓊與宰相李林甫不平聞楊氏新有寵思有以結納之爲奧
助使仲通之長安仲通辭以國忠見幹貌頎峻口辯給兼瓊喜表爲推官使部春貢長安將行告曰鄆有
一日權君至可取之也國忠至乃得蜀貸百萬卽大喜至京師見羣女弟致贈遺於時號國新寡國忠多
分賂宣淫不止諸楊日爲兼瓊譽而言國忠善擄蒲玄宗引見擢金吾兵曹參軍閑廐判官兼瓊入爲戶

部尚書兼御史大夫用其力也國忠稍入供奉常後出專主簿計算鉤畫分銖不誤帝悅曰度支郎才也累遷監察御史李林甫與韋堅等獄欲危太子獄事畏卻以國忠怙寵搏鷲可用倚之使按劾國忠乃慘文峭詆連繫連年誣讎被誅者百餘族度可以危太子者先林甫意陷之皆中所欲林甫方深阻固位陰爲指嚮故國忠乘以爲姦肆意無所憚號國居中用事帝所好惡國忠必探知其微帝以爲能擢兼度支員外郎遷不淹年領十五餘使林甫始惡之天寶七載擢給事中兼御史中丞專判度支會三妹封國夫人兄銛擢鴻臚卿與國忠皆列繁戟而第舍華僭彌跨都邑時海內豐熾州縣粟帛舉巨萬國忠因言古者二十七年耕餘九年食今天置太平請在所出滯積變輕齋內富京師又悉天下義倉及丁租地課易布帛以充天子禁藏明年帝詔百官觀庫物積如丘山賜羣臣各有差錫國忠紫衣金魚知太府卿事初楊慎矜引王鉷爲御史中丞已而有隙鉷挾國忠共劾慎矜抵不道詠由是權傾中外古溫爲國忠謀奪林甫政國忠卽誣奏京兆尹蕭冕御史中丞宋渾逐之皆林甫所厚善林甫不能救遂結怨鉷寵方渥位勢在國忠右國忠忌之因刑穽事構鉷誅死已代爲京兆尹悉領其使卽窮劾支黨引林甫交私狀牽連左逮數以聞帝始默林甫疎薄之先此南詔質子閣羅鳳亡去帝欲討之國忠薦鮮于仲通爲蜀郡長史率兵大討之戰瀘川舉軍沒獨仲通挺身免時國忠兼兵部侍郎素德仲通爲匿其敗更敘戰功使白衣領職因自請兼領劍南詔拜劍南節度使度營田副大使知節度事俄加本道兼山南西道採訪處置使開幕府引寶華張漸宋昱鄭昂魏仲犀等自佐而留京師帝再幸左藏庫班賚百官出納判官魏仲犀言鳳集通訓門門直庫西有詔改爲鳳皇門進仲犀殿中侍御史屬吏率以鳳皇優得調俄拜國忠御史大夫因引仲通爲京兆尹已兼領吏部國忠恥雲南無功知爲林甫掩欲自解於帝乃使磨下請已到屯外示憂邊以合上旨實杜禁言路林甫果奏遣之及辭泣訴爲林甫中傷者妃又爲言故帝益親之豫計召日然國忠就道惴惴不自安帝在華清宮驛追國忠還林甫病已困入見牀下林甫曰死矣公且入相以後事屬公國忠懼其詐不敢當流汗被顏林甫果死遂拜右相兼文部尚書集賢院大學士監修國史崇玄館大學士太清太微宮使而節度採訪等使判度支不解也國忠已得柄則窮蹙林甫姦事碎其家帝以爲功封魏國公因讓魏徙封衛國忠旣以宰相領選始建罷長名於銓日卽定留放故事歲揭版南院爲選式選者自通一辭不如式輒不得調故有十年不官者國忠創押例無賢不肯用選深者先補官牒文謬缺得再通衆議翕然美之先天以前諸司官知政事者午漏盡還本司視事兵吏部尚書侍郎分案注擬開元末宰相員少任益尊不復視本司事吏部銓注常三注三唱自春止夏乃訖而國忠陰使吏到第預定其員集百官尚書省注唱一日畢以夸神明駭天下耳目者自是資格紛謬無復綱序號

國居宣陽坊左國忠在其南自臺禁還趣虢國第郎官御史白事者皆隨以至居同第出駢騎相調笑施
施若禽獸然不以爲羞道路爲恥駭明年大選因就第唱補帷女兄弟觀之士之醜野蹇僂者呼其名輒
笑于堂聲徹諸外士大夫詬恥之先是有司已定注則過門下侍中給事中按閱有不可黜之國忠則召
左相陳希烈偶坐給事中在旁既對注曰已過門下矣希烈不敢異侍郎韋見素張倚與本曹郎趨走堂
下抱案牒國忠顧女弟曰紫袍二主事何如皆大曠鮮于仲通等諷選者鄭愆願立碑省戶下以頌德詔
仲通爲頌帝爲易數字因以黃金識其處帝常歲十月幸華清宮春乃還而諸楊湯沐館在宮東坦連蔓
相照帝臨幸必徧五家賞賚不訾計出有賜曰餞路返有勞曰輓脚遠近饋遺闍稚歌兒狗馬金貝踵疊
其門國忠由御史至宰相凡領四十餘使而度支吏部事自叢夥第署一字不能盡故吏得輕重顯昧公
鵬無所忌國忠性疏悅捷給經經處決樞務自任不疑盛氣驕悞百僚莫敢相可否官屬悉苛督旬剝相
憚又便佞專狗帝嗜欲不顧天下成敗帝雅意事邊故身調兵食取習文簿惡吏任之軍凡須案快成其
手又不能省視也始李林甫給帝天下無事請已漏出休許之文書填湊坐家裁決既成敕吏持案請左
相陳希烈聯署左相不敢詣署惟謹至國忠時韋見素代希烈循以爲常七年大雨敗稼帝憂之國忠擇
晉禾以進曰雨不爲災扶風太守房瑄上郡災國忠怒遣御史按之後乃無敢以水旱聞者前何國忠意
乃敢欺子瞻舉明經不中禮部侍郎達奚珣遣子撫往見國忠國忠方朝見撫喜已而聞珣嘗黜謝曰生
子不富貴邪豈以一名爲鼠輩所賣珣大驚卽致暄高第俄與珣同列珣官不進國忠雖當國常領劍
南召募使遣戍瀘南餉路險乏舉無還者舊勳戶免行所以寵戰功國忠令當行者先取勳家故士無闕
志凡募法願奮者則籍之國忠歲遣宋昱鄭昂韋儼以御史迫促郡縣吏窮無以應乃詭設餉召貧弱者
密縛置室中衣絮衣械而送屯亡者以送吏代之人人思亂尋遣劍南留後李宓率兵十餘萬擊閩羅鳳
敗死西洱河國忠矯爲捷書上聞自再興師傾中國驍卒二十萬踰屢無遺天下寃之安祿山方有寵總
重兵于邊偃蹇不奉法帝護之下莫敢言國忠知終不出己下又恃內援獨暴發反狀帝疑以位相媚不
之信祿山雖逆久以帝遇之厚故隱忍伺帝一日晏駕則稱兵及見帝嬖國忠甚畏不利己故謀日急俄
而祿山授尙書右僕射帝恐國忠不悅故册拜司空祿山還幽州覺國忠圖己反謀遂決國忠令客何盈
蹇昂刺求反狀諷京兆尹李峴圍其第捕祿山所善李超安岱李方來王岷殺之貶其黨吉温於合浦祿
山上書自陳而條上國忠大罪二十帝歸過於峴貶零陵太守以慰祿山意國忠寡謀矜躁謂祿山跋扈
不足圖故激怒之使必反以取信於帝帝卒不悟乃建言請以祿山爲平章事追入輔政以賈循爲使節
度范陽呂知誨節度平盧楊光翽節度河東已草詔帝使謁者輔璿琳覘祿山未還帝致詔坐側而璿琳

納金固言不反帝謂國忠曰祿山無二心前詔焚之矣祿山反以誅國忠爲名帝欲自將而東使皇太子監國謂左右曰我欲行一事國忠揣帝且禪太子歸謂女弟等曰太子監國吾屬誅矣因聚泣入訴于貴妃妃以死邀帝遂寢祿山既發范陽歎咤曰國忠頭來何遲哥舒翰守潼關按兵守險國忠聞欲反已疑之乃從中督戰翰不得已出關遂大敗降賊書聞是日帝自南內移仗未央宮國忠見百官顛咽不自勝監察御史高適請率百官子弟及募豪桀十萬拒守衆以爲不可初國忠聞難作自以身帥劍南豫置腹心梁益間爲自完計至是帝召宰相計事國忠曰幸蜀便帝然之明日遲昕帝出延秋門羣臣不知猶上朝唯三衛驍騎立仗尙聞刻漏聲國忠與韋見素高力士及皇太子諸王數百人護帝右龍武大將軍陳玄禮謀殺國忠不克進次馬嵬將士疲乏食玄禮懼亂召諸將曰今天子震蕩社稷不守使生人肝腦塗地豈非國忠所致欲誅之以謝天下云何衆曰念之久矣事行身死固所願會吐蕃使有請於國忠衆大呼曰國忠與吐蕃謀反衛騎合國忠突出或射中其頰殺之爭啖其肉且盡梟首以徇帝驚曰國忠遂反邪時吐蕃使亦殲矣御史大夫魏方進責衆曰何故殺宰相衆怒又殺之四子暄晁曉晞位太常卿戶部侍郎聞亂下馬蹶弩衆射之身貫百矢乃殞晁尙萬春公主位鴻臚卿陷賊見殺曉奔漢中爲漢中王瑒榜死晁及國忠妻裴柔同奔陳倉爲追兵所斬柔故蜀倡也併坎而瘞其黨翰林學士張勳實華中書會人宋昱吏部郎中與晁俱走山谷民爭其資實皆國忠私蓄實產籍入者爲備兵所殺餘坐誅國忠本

名釗以圖讖有卯金刀當位御史中丞時帝爲改今名

李備字備起寒賤繇莊憲太后姬媼得進歷坊絳二州刺史無它才爲政粗辦性纖巧飾廚傳結納闔寺求善譽憲宗以爲才拜司農卿進京兆尹專聚斂以固恩寵數譖毀近臣一時側目太后崩詔備爲橋道置頓使備官費物裁損爲可喜者梓宮至灞橋從官多不得食始議更造渭城門計錢三萬備以爲勞不聽使鑿軌道深之柱危不支方過爽而門壞輻輳僅免徹門乃得行備妄奏車軸折山陵使李逢吉列罔上請免官方帝用兵而備屢有所獻得不坐纔詔奪粟逢吉持之乃削銀青一階翌日加賜黃金帝以浙西富饒欲掙據遺利以備爲觀察使被疾還京師元和十四年卒士有相賀者

鄭光孝明皇太后弟也會昌末夢御大車載日月行中衢光輝洞照六合寤而占之工曰君且暴貴不闕月宣宗卽位光與民伍拜諸衛將軍遷累平盧軍節度使徙河中鳳翔又賜鄆雲陽二縣良田大中四年詔除其租賦宰相言國常賦窶人下戶不免奈何以外戚廢法帝悟追格前詔俄封其妻爲夫人光曉帝意遺詔不敢拜帝嘉之七年來朝對延英占奏俚近帝失望不悅留爲右羽林統軍兼太子太保太后言其家空短帝厚賜金繒終不復委方鎮卒贈司徒詔罷三日朝羣臣奉慰御史大夫李景讓曰禮外

祖父母舅服小功五月伯叔父若兄弟齊衰暮所以疏外密內也王者不可使外戚彊按王公主喪不過三日光宜少降詔罷二日子漢卿終義昌軍節度使

唐書卷二百六

唐書卷二百六考證

獨孤懷恩傳元貞皇后弟也○舊書作元貞皇后弟之子

武士護孫承嗣既還擢尚輦奉御○舊書作拜尚衣奉御

攸暨壽春○舊書攸暨爲樂壽郡王

主府倉曹參軍何鳳說曰今天下繫心武家云云○舊書作倉曹符鳳

攸望以太府卿貶死春州○舊書攸望至太常卿

武士護兄士稜孫攸暨長安中降王壽春○舊書隨例降封樂壽郡王

韋温傳后父元貞○舊書后父元儼元儼弟元貞

洞衛尉卿淮陽郡○舊書作淮南郡王

楊國忠傳節度使張宥惡其人答屈之○臣德潛按舊書益州長史張寬惡其爲人

蜀大豪鮮于仲通頗資給之○臣德潛按鮮于仲通先資給之復薦之兼瓊得蜀貨百萬乃之京師見羣

女弟因以進身此國忠得寵之由而後之薦仲通討南蠻以致喪師辱國皆根于此也舊書不之及此

新書周密處

國忠薦鮮于仲通爲蜀郡長史率兵六萬討之○舊書作率精兵八萬

唐書卷二百六考證

唐書卷二百七

宋 端 明 殿 學 士 宋 祁 撰

列傳第一百三十二

宦者上

唐制內侍省官有內侍四內常侍六內謁者監內給事各十謁者十二典引十八寺伯寺人各六又有五局一曰掖廷主宮嬪簿最二曰宮闈扈門闕三曰奚官治宮中疾病死喪四曰內僕主供帳鑿燭五曰內府主中藏給納局有令有丞皆宦者爲之太宗詔內侍省不立三品官以內侍爲之長階第四不任以事惟門閤守禦廷內掃除粟食而已武后時稍增其人至中宗黃衣乃二千員七品以上員外置千員然衣朱紫者尙少玄宗承平財用富足志大事者不愛惜賞賜爵位開元天寶中宮嬪大率至四萬宦官黃衣以上三千員衣朱紫千餘人其稱旨者輒拜三品將軍列戟于門其在殿頭供奉委任華重持節傳命光燭殷殷動四方所至郡縣奔走獻遺至萬計修功德市禽鳥一爲之使猶且數千緡監軍持權節度返出其下於是甲舍名園上腴之田爲中人所名者半京畿矣肅代庸弱倚爲扞衛故輔國以尙父顯元振以授立奮朝恩以軍容重然猶未得常主兵也德宗懲艾泚賊故以左右神策天威等軍委宦者主之置護

乾隆四年校刊

唐書卷二百七列傳

一

軍中尉中護軍分提禁兵是以威柄下遷政在宦人舉手伸縮便有輕重至慄士奇材則養以爲子巨鎮疆藩則爭出我門小人之情猥險無顧藉又日夕侍天子狎則無威習則不疑故昏君蔽於所昵英主禍生所忽玄宗以遷崩憲敬以弑殞文以愛憤至昭而天下亡矣禍始開元極於天祐凶悞參會黨類殲滅王室從而潰喪譬猶灼火攻蠹蠹盡木焚詎不哀哉跡其殘氣不剛柔情易遷襲則無上怖則生怨借之權則專爲禍則迫而近緩相攻急相一此小人常勢也噫梟狐不神天與之昏末如亂何故取中葉以來宦人之大者粹之篇

楊思勗羅州石城人本蘇氏冒所養姓少給事內侍省從玄宗討內難擢左監門衛將軍帝倚爲爪牙開元初安南蠻渠梅鷲叛號黑帝舉三十二州之衆外結林邑真臘金隣等國據海南衆號四十萬思勗請行詔募首領子弟十萬與安南大都護光楚客繇馬援故道出不意賊駭貽不暇謀遂大敗封戶爲京觀而還十二年五溪首領覃行章亂詔思勗爲黔中招討使率兵六萬往執行章斬首三萬級以功進輔國大將軍給祿俸防閭從封泰山進驃騎大將軍封號國公邕州封陵獠梁大海反破賓橫等州思勗又平之禽大海等三千人討斬支黨皆盡瀧州蠻陳行範自稱天子其下何游魯號定國大將軍馮璘南越王破州縣四十詔思勗發承道連三州兵淮南弩士十萬襲斬游魯璘於陣行範走盤遼諸洞思勗悉衆窮迫生縛之隄其黨六萬獲馬金銀鉅萬計卒年八十餘思勗嘗忍殺愛所得俘必剝面髻髮皮以示人將士憚服莫敢視以是能立功內給事牛仙童納張守珪賂詔付思勗殺之思勗縛于格籠慘不可勝乃探心截手足剔肉以食肉盡乃得死楚客者樂安人後歷桂州都督致仕封松滋縣侯

高力士馮盎曾孫也聖歷初嶺南討擊使李千里上二關兒曰金剛曰力士武后以其疆悟敕給事左右坐累逐出之中人高延福養爲子故冒其姓善武三思歲餘復得入禁中稟食司宮臺既壯長六尺五寸謹密善傳詔令爲宮闈丞玄宗在藩力士傾心附結已平韋氏乃啟屬內坊擢內給事先天中以誅蕭岑等功爲右監門衛將軍知內侍省事於是四方奏請皆先省後進小事卽專決雖洗沐未嘗出眠息殿帷中微倖者願一見如天人然帝曰力士當上我寢乃安當是時宇文融李林甫蓋嘉運韋堅楊慎矜王鉷楊國忠安祿山安思順高仙芝等雖以才寵進然皆厚結力士故能躡至將相自餘承風附會不可計皆得所欲中人若黎敬仁林昭隱尹鳳翔韓莊牛仙童劉奉廷王承恩張道斌李大宜朱光輝郭全邊令誠等並內供奉或外監節度軍修功德市鳥獸皆爲之使使還所稟獲動巨萬計京師甲第池園良田美產占者什六寵與力士略等然悉藉力士左右輕重乃能然肅宗在東宮兄事力士它王公主呼爲翁戚里諸家尊曰養帝或不名而呼將軍力士幼與母麥相失後嶺南節度使得之瀧州迎還不復記識母曰曾

有七黑子在否力士祖示之如言母出金環曰兒所服者乃相持號慟帝爲封越國夫人而追贈其父廣州大都督延福與妻及力士貴時故在侍養與麥均金吾大將軍程伯獻約力士爲兄弟後麥亡伯獻繼經受弔河間男子呂玄晤吏京師女國姝力士娶之玄晤擢刀筆史至少卿子弟仕皆王傅玄晤妻死中外贈賻送葬自第至墓車徒背相望不絕始李林甫牛仙客知帝憚幸東都而京師漕不給乃以賦粟助漕及用和糴法數年國用稍充帝齋大同殿力士侍帝曰我不出長安且十年海內無事朕將吐納導引以天下事付林甫若何力士對曰天子順動古制也稅入有常則人不告勞今賦粟充漕臣恐國無旬月蓄和糴不止則私藏竭逐末者衆又天下柄不可假人威權旣振孰敢議者帝不悅力士頓首自陳心狂易語謬當死帝爲置酒左右呼萬歲由是還內宅不復事加累驃騎大將軍封渤海郡公於來廷坊建佛祠興靈坊立道士祠珍樓寶屋國貲所不逮鐘成力士宴公卿一扣鐘納禮錢十萬有佞悅者至二十扣其少亦不減十都北堰豐列五磴日僦三百斛直有袁思藝者帝亦愛幸然驕倨甚士大夫疏畏之而力士陰巧得人譽帝初置內侍省監二員秩三品以力士思藝爲之帝幸蜀思藝遂臣賊而力士從帝進齊國公帝聞肅宗卽位喜曰吾兒應天順人改元至德不忘孝乎尙何憂力士曰兩京失守人流亡河南漢北爲戰區天下痛心而陛下以爲何憂臣不敢聞從上皇還進開府儀同三司實封戶五百上皇從西內居十日爲李輔國所誣除籍長流巫州力士方逃瘴功臣閣下輔國以詔召力士趨至閣外遣內養授請制因曰臣嘗死已久天子哀憐至今日願一見陛下顏色死不恨輔國不許寶應元年赦還見二帝遺詔北向哭歐血曰大行升遐不得攀梓宮死有餘恨慟而卒年七十九代宗以護衛先帝勞還其官贈揚州大都督陪葬泰陵初太子瑛廢武惠妃方嬖李林甫等皆屬壽王帝以肅宗長意未決居忽忽不食力士曰大家不食亦膳羞不具邪帝曰爾我家老拙我何爲而然力士曰嗣君未定邪推長而立孰敢爭帝曰爾言是也儲位遂定天寶中邊將爭立功帝嘗曰朕春秋高朝廷細務付宰相蕃夷不襲付諸將靈不暇邪對曰臣間至閣門見奏事者言雲南數喪師又北兵悍且疆陛下何以制之臣恐禍成不可禁其指蓋謂祿山帝曰卿勿言朕將圖之十三年秋大雨帝顧左右無人卽曰天方災卿宜言之力士曰自陛下以權假宰相法令不行陰陽失度天下事庸可復安臣之鉗口其時也帝不答明年祿山反力士嘗揣時事勢侯相上下雖親昵至當覆敗不肯爲救力故生平無顯顯大過議者頗恨宇文融以來權利相賊階天下之禍雖有補益弗相除云

程元振京兆三原人少以宦人直內侍省遷內射生使飛龍殿副使張皇后謀立越王元振見太子發其姦與李輔國助討難立太子是爲代宗拜右監門衛將軍知內侍省事帝以藥子昂判元帥行軍司馬固

辭乃以命元振封保定縣侯再遷驃騎大將軍邪國公盡總禁兵不踰歲權震天下在輔國右凶決又過之軍中呼十郎王仲昇者初為淮西節度使與襄州張維瑾部將戰申州被執賊平元振薦為右羽林大將軍兼御史大夫將軍兼大夫由仲昇始裴冕與元振忤乃拊韓穎等罪貶施州來瑱守襄漢有功元振嘗謖屬不應因仲昇共誣殺瑒同華節度使李懷讓被構憂甚自殺素惡李光弼數媒竭以疑之瑒等上將冕光弼元勳既誅斥或不自省方帥繇是攜解廣德初吐蕃黨項內侵詔集天下兵無一士奔命者虜扣便橋帝蒼黃出居陝京師陷賊剽府庫焚閭閻蕭然為空於是太常博士翰林待詔柳伉上疏曰犬戎以數萬眾犯關度隴秦渭掠邠涇不血刃而入京師謀臣不奮一言武士不力一戰提卒叫呼劫宮闈焚陵寢此將帥叛陛下也自朝義之滅陛下以為智力所能故疏元功委近習日引月長以成大禍羣臣在廷無一犯顏回慮者此公卿叛陛下也陛下始出都百姓填然奪府庫相殺戮此三輔叛陛下也自十月朔召諸道兵盡四十日無隻輪入關者此四方叛陛下也內外離叛雖一魚朝恩以陝郡戮力陛下獨能以此守社稷乎陛下以今日勢為安邪危邪若以為危豈得高枕不為天下計臣聞良醫療疾當病飲藥藥不當決猶無益也陛下視今日病何繇至此乎天下之心乃恨陛下遠賢良任宦豎離間將相而幾于亡必欲存宗廟社稷獨斬元振首馳告天下悉出內使隸諸州獨留朝恩備左右陛下持神策兵付大

臣然後得每號一詔引各率德屬行屏嬖妃任將相若曰天下其計朕自新改過乎宜即募士西與朝

會若以朕惡未悛邪則帝王大器敢妨聖賢其聽天下所往如此而兵不至人不感天下不服請赤臣族以謝疏聞帝顧公議不與乃下詔盡削元振官爵放歸田里帝還元振自三原衣婦衣私入京師舍司農卿陳景詮家圖不軌御史劾按長流濠州景詮貶新興尉元振行至江陵死時又有駱奉先者亦三原人歷右驍衛大將軍數從帝討伐尤見倖廣德初監僕固懷恩軍者奉先恃恩貪甚懷恩不平既而懼其譖遂叛事平擢奉先軍容使掌畿內兵權炤熾然永泰初以吐蕃數驚京師始城鄆以奉先為使悉毀縣外廬舍無尺椽累封江國公監鳳翔軍大厓未卒

魚朝恩瀘州瀘川人天寶末以品官給事黃門內陰黠善宣納詔令至德初監李光進軍京師平為三宮檢責使以左監門衛將軍知內侍省事九節度圍賊相州以朝恩為觀軍容宣慰處置使觀軍容使自朝恩始史思明攻洛陽朝恩以神策兵屯陝洛陽陷思明長驅至硤石使子朝義為游軍肅宗詔銳兵十萬循渭而東以濟師朝恩按兵陝東使神策將衛伯玉與賊將康文景等戰敗之洛陽平徙屯汴州加開府儀同三司封馮翊郡公寶應中還屯陝代宗避吐蕃東幸衛兵離散朝恩悉軍奉迎華陰乘輿六師乃振帝德之更號天下觀軍容宣慰處置使專領神策軍賞賜不涯朝恩資小人恃功岸忽無所懼僕固瑒攻

絳州使姚良據溫誘回紇陷河陽朝恩遣李忠誠討瑒以霍文場監之王景岑討良王希遷監之敗瑒於萬泉生擒良高暉等引吐蕃入寇道劉德信討斬之故朝恩因麾下數克獲竊以自高是時郭子儀有定天下功居功臣第一心媚之乘相州敗醜爲詆譖肅宗不內其語然猶罷子儀兵留京師代宗立與程元振一口加毀帝未及寤子儀憂甚俄而吐蕃陷京師卒用其力王室再安故朝恩內慙乃勸帝徙洛陽欲遣戎狄百僚在廷朝恩從十餘人持兵出曰虜數犯都甸欲幸洛云何宰相未對有近臣折曰敕使反耶今屯兵足以捍寇何遽脅天子棄宗廟爲朝恩色沮而子儀亦謂不可乃止朝恩好引輕浮後生處門下講五經大義作文章謂才兼文武微伺誤寵永泰中詔判國子監兼鴻臚禮賓內飛龍閣殿使封鄭國公始詣學詔宰相常參官六軍將軍悉集京兆設食內教坊出音樂俳優燕大臣子弟二百人朱紫雜然爲附學生列廡次又賜錢千萬取子錢供秩飯每視學從神策兵數百京兆尹黎幹率錢勞從者一費數十萬而朝恩色常不足凡詔會羣臣計事朝恩怙貴誕辭折愧坐人出其上雖元載辯彊亦拱默唯禮部郎中相里造殿中侍御史李衍酬請往返未始降屈朝恩不憚黜衍以動造又謀將易執政以震朝廷乃會百官都堂且言宰相者和元氣輯羣生今水旱不時屯軍數十萬饋運困竭天子臥不安席宰相何以輔之不退避賢路默默尙可賴乎宰相俯首坐皆失色造徙坐從之因曰陰陽不和五穀踴貴皆軍容事

宰相何與哉且軍容不散故天降之沴今京師無事六軍可相維鎮又屯十萬饋糧所以不足百司無稍食軍容爲之宰相行文書而已何所歸罪朝恩拂衣去曰南衙朋黨且害我會釋菜執易升坐百官咸在言鼎有覆餗象以侵宰相王縉怒元載怡然朝恩曰怒者常情笑者不可測也載銜之未發朝恩有賜豎觀沼勝爽表爲佛祠爲章敬太后薦福卽后諡以名祠許之於是用度侈浩公壞曲江諸館華清宮樓榭百司行署將相故第收其材佐興作費無慮萬億既數毀郭子儀不見聽乃遣盜發其先冢子儀詭辭自解以安衆疑久之讓判國子監鴻臚禮賓等使加內侍監徙封韓增實封百戶俄兼檢校國子監初神策都虞候劉希暹魁健能騎射最爲朝恩昵信以太僕卿封交河郡王兵馬使王駕鶴獨謹厚亦封徐國公希暹諷朝恩置獄北軍陰縱惡少年橫捕富人付吏考訊因中以法錄貲產入之軍皆誣服冤死故市人號入地牢又萬年吏賈明觀倚朝恩捕搏恣行積財鉅萬人無敢發其姦朝廷裁決朝恩或不預者輒怒曰天下事有不由我乎帝聞不喜養息令微者尙幼爲內給使服綠與同列爭忿歸白朝恩明日見帝曰臣之子位下願得金紫在班列上帝未答有司已奉紫服于前令微稱謝帝笑曰小兒章服大稱滋不悅元載乃用左散騎常侍崔昭尹京兆厚以財結其黨皇甫溫周皓溫方屯陝而皓射生將自是朝恩隱謀與語悉爲帝知希暹覺帝指密白朝恩朝恩稍懼然見帝接遇未衰故自安而潛計不軌帝遂倚載決除

之懼不克載曰陛下第專屬臣必濟朝恩入殿常從武士百人自衛時統之而溫握兵在外載乃徙鳳翔尹李抱玉節度山南西道以溫代節度鳳翔陽重其權實內溫以自助載又議析鳳翔之郡與京兆以鄆蓋厓及鳳翔之號寶雞與抱玉而以興平武功鳳翔之扶風天興與神策軍朝恩利其土地自封殖不知爲虞也郭子儀密白朝恩嘗結周智光爲外應久領內兵不早圖變且大載留溫京師未卽遣約與皓共誅朝恩謀定以聞帝曰善圖之勿反受禍方寒食宴禁中既罷將還營有詔留議事朝恩素肥每乘小車入宮省帝聞車聲危坐載守中書省朝恩至帝責其異圖朝恩自辨悖傲皓與左右禽縊之死年四十九外無知者帝隱之下詔罷觀軍容等使增寶封戶六百內侍監如故外咸言既奉詔乃投縊云還尸於家賜錢六百萬以葬帝懼軍亂進劉希暹王駕鶴並兼御史中丞又下詔慰曉將士獨希暹自知同惡言不遜駕鶴白發之遂賜死而賈明觀兼得幸於載故載奏隸江西使立功自贖路嗣恭撈殺之所厚禮部尙書禮儀使裴士淹戶部侍郎判度支第五琦皆坐貶

寶文場霍仙鳴者始並隸東宮事德宗未有名自魚朝恩死宦人不復興兵帝以禁衛盡委白志貞志貞多納富人金補軍止收其庸而身不在軍及涇師亂帝召近衛無一人至者惟文場等率宦官及親王左右從至奉天帝遂志貞并左右軍付文場主之興元初詔監神策左廂兵馬以王希遷監右而馬有麟爲

左神策軍大將軍軍額由此始帝自山南還兩軍復完而帝忌宿將難制故詔文場仙鳴分總之廢天威軍入左右神策是時寶文場震朝廷諸方節度大將多出其軍臺省要官走門下丐援引者足相躡衛士朱華以按摩得幸文場參慮補置索賊數萬緡而藩鎮贈遺累百鉅萬略士妻女無所憚詔殺之于軍其隆赫如此久之置護軍中尉中護軍各二員詔文場爲左神策護軍中尉仙鳴爲右焦希望爲左神策中護軍張尙進爲右中尉護軍自文場等始後仙鳴移病帝賜十馬令諸祠祈解後稍愈已而暴死帝疑左右進毒捕詰小使問狀誅數十人贈開府儀同三司以內常侍第五守亮代之文場擢累驃騎大將軍時監察御史崔遠行囚于軍吏爲具酒食遠欲悅媚之故不拒文場劾奏詔流遠遠方文場年老致仕卒其後楊志廉孫榮義爲左右中尉招權驕肆與寶文略等帝晚節聞民間訛語禁中事而北軍捕太學生何竦曹壽繫訊人情大懼司業武少儀上書有如罪不測願明示四方俄得釋是時宦官復盛矣希望者涇陽人歷明威將軍贈洪州都督尙進河東人歷忠武將軍贈開府儀同三司志廉弘農人歷左監門衛大將軍榮義涇陽人歷右武衛大將軍並贈揚州大都督

劉貞亮本俱氏名文珍冒所養宦父故改爲性忠彊識義理平涼之盟在渾瑊軍中會虜變被執且西俄而得歸出監宣武軍自置親兵千人貞元末宦人領兵附順者益衆會順宗立淹瘡弗能朝惟李忠言牛

美人侍美人以帝旨付忠言忠言授之王叔文叔文與柳宗元等裁定然後下中書然未得縱欲遂奪神策兵以自疆即用范希朝爲京西北禁軍都將收宦者權而忠言素懦謹每見叔文與論事無敢異同唯貞亮乃與之爭又惡朋黨熾結因與中人劉光琦薛文珍尙衍解玉呂如全等同勸帝立廣陵王爲太子監國帝納其奏貞亮召學士衛次公鄭綱李程王涯至金鑾殿草定制詔太子已立盡逐叔文黨委政大臣議者美其忠高崇文討劉闢復爲監軍初東川節度使李康爲闢所破囚之崇文至闢歸康求雪貞亮効以不拒賊斬之故以專悍見嘗遷累右衛大將軍知內侍省事元和八年卒贈開府儀同三司憲宗之立貞亮爲有功然終身無所寵假呂如全歷內侍省內常侍翰林使坐擅取樟材治第送東都獄至閩鄉自殺又郭旻醉觸夜禁杖殺之五坊朱超旻王志忠縱鷹隼入民家撈二百奪職由是莫不懼畏

吐突承瓘字仁貞閩人也以黃門直東宮爲掖廷局博士察察有才憲宗立擢累左監門將軍左神策護軍中尉左街功德使封薊國公王承宗叛承瓘揣帝銳征討因請行帝見其果敢自喜謂可任卽詔承瓘爲行營招討處置使以左右神策及河中河南浙西宣歙兵從之內寺伯宋惟澄曹進玉爲館驛使自河南陝河陽惟澄主之京華河中至太原進玉主之又詔內常侍劉國珍馬朝江分領易定幽滄等州糧料使於是諫官李鄴許孟容李元素李夷簡呂元膺穆質孟簡獨孤郝段平仲白居易等衆對延英謂古無

中人位大帥恐爲四方笑帝乃更爲招討宣慰使爲御通化門慰其行承瓘御衆無它遠略爲盧從史侮

狎踰年無功賴中詔隨使執從史而問遣人說承宗上書待罪乃詔班師還爲中尉平仲劾承瓘輕謀弊賦損國威不斬首無以謝天下帝不獲已罷爲軍器莊宅使尋拜左衛上將軍知內侍省會劉希光納羽林大將軍孫璿錢二十萬縉求方鎮有詔賜死跡絳承瓘故令出監淮南軍織人太子通事舍人李涉投匭言承瓘等冤狀於是孔戣知匭事聞其副不受卽表其姦逐爲峽州司倉參軍然帝於承瓘殊厚會李絳在翰林苦論其過故決遣之帝後欲還承瓘爲罷絳宰相召爲內弓箭庫使復左神策中尉惠昭太子薨承瓘請立澧王不從常飾一室藏所賜詔敕地生毛二尺惡之躬糞除瘴之踰年帝崩穆宗銜前議殺之禁中敬宗時左神策中尉馬存亮論其冤詔許子士暉收葬宣宗時擢士暉右神策中尉是時諸道歲進闖兒號私白閩嶺最多後皆任事當時謂閩爲中官區蔽咸通中杜宣猷爲觀察使每歲時遣吏致祭其先時號敕使墓戶宣猷卒用羣宦力徙宣歙觀察使

馬存亮字季明河中人元和時累擢左神策軍副使左監門衛將軍知內侍省事進左神策中尉軍所籍凡十餘萬存亮料粟尤精伍無罷士部無冗員敬宗初染署工張韶與卜者蘇玄明善玄明日我嘗爲子卜子當御殿食我與焉吾聞上晝夜獵出入無度可圖也韶每輸染材入官衛士不呵也乃陰結諸工百

餘人匿兵車中若輪材者入右銀臺門約昏夜爲變有請其載者詔謂謀覺殺其人出兵大呼成列浴室門閉時帝擊毬清思殿驚將幸右神策或曰賊入宮不知衆寡道遠可虞不如入左軍近且速從之初帝常寵右軍中尉梁守謙每游幸兩軍角戲帝多欲右勝而左軍以爲望至是存亮出迎捧帝足泣負而入以五百騎往迎二太后比至而賊已斬關入清思殿升御坐盜乘輿餘膳揖玄明偶食且曰如占玄明驚曰止此乎韶惡之悉以寶器賜其徒攻弓箭庫仗士拒之不勝存亮遣左神策大將軍康藝全將軍何文哲宋叔夜孟文亮右神策大將軍康志睦將軍李泳尙國忠率騎兵討賊日暮射韶及玄明皆死始賊入中人倉卒繇望仙門出奔內外不知行在遲明盡捕亂黨左右軍清宮車駕還羣臣詣延英門見天子然至者不十一二坐賊所入闕不禁者數十人杖而不誅賜存亮實封戶二百梁守謙進開府儀同三司七論功賞有差存亮於一時功最高乃推委權勢求監淮南軍代還爲內飛龍使大和中以右領軍衛上將軍致仕封岐國公卒贈揚州大都督存亮逮事德宗更六朝資端畏善訓士始去禁衛衆皆泣唐世中以忠謹稱者唯存亮西門季玄嚴遵美三人而已

遵美父季實爲掖廷局博士大中時有宮人謀弒宣宗是夜季實直咸寧門下聞變入射殺之明日帝勞曰非爾吾危不免擢北院副使終內樞密使遵美歷左軍容使嘗歎曰北司供奉官以勝衫給事今執紼過矣樞密使無庸事唯三樞舍藏書而已今堂狀帖黃決事此楊復恭奪宰相權之失也蓋疾時中官肆橫云後從昭宗遷鳳翔求致仕隱青城山年八十餘卒

仇士良字匡美循州興寧人順宗時得侍東宮憲宗嗣位再遷內給事出監平盧鳳翔等軍嘗次敷水驛與御史元稹爭會上廳擊傷稹中丞王播奏御史中使以先後至得正寢請如舊章帝不直稹斥其官元和和大和間數任內外五坊使秋按鷹內畿所至邀吏供餉暴甚寇盜文宗與李訓欲殺王守澄以士良素與守澄隙故擢左神策軍中尉兼左街功德使使相糜肉已而訓謀悉逐中官士良悟其謀與右神策軍中尉魚弘志大盈庫使宋守義挾帝還宮王涯舒元與已就縛士良肆辱辱令自承反示牒于朝於時莫能辨其情皆謂誠反士良因縱兵捕無輕重悉斃兩軍公卿半空事平加特進右驍衛大將軍弘志右衛上將軍兼中尉守義右領軍衛上將軍李石輔政稜稜有風岸士良與論議數屈深忌之使賊刺石於親仁里馬逸而免石懼辭位士良益無憚澤潞劉從諫本與訓約誅鄭注及訓死憤士良得志乃上書言王涯等八人皆宿儒大臣願保富貴何苦而反今大戮所加已不可追而名曰逆賊含憤九泉不然天下議夫節士畏禍伏身誰肯與陛下共治邪即以訓所移書遣部將陳季卿以聞季卿至會石遇盜京師擾疑不敢進從諫大怒殺季卿騰書于朝又言臣與訓誅注以注本宦豎所提挈不使聞知今四方共傳宰相

欲除內官而兩軍中尉聞自救死妄相殺戮謂爲反逆有如大臣挾無將之謀自宜執付有司安有縱俘劫橫尸闕下哉陛下視不及聽未聞也且宦人根黨蔓延在內臣欲面陳恐橫遭戮害謹脩封疆繕甲兵爲陛下腹心如姦臣難制誓以死清君側書聞人人傳觀士良沮恐卽進從諫檢校司徒欲弭其言從諫知可動復言臣所陳繫國大體可聽則宜洗宥涯等罪不可聽則賞不宜妄出安有死寃不申而生者苟祿固辭累上書暴指士良等罪帝雖不能去然倚其言差自彊自是鬱鬱不樂兩軍毬獵宴會絕矣開成四年苦風瘠少間召宰相見延英退坐思政殿顧左右曰所直學士謂誰曰周墀也召至帝曰自爾所況朕何如主墀再拜曰臣不足以知然天下言陛下堯舜主也帝曰所以問謂與周赧漢獻孰愈墀惶駭曰陛下之德成康文景未足比何自方二主哉帝曰赧獻受制疆臣今朕受制家奴自以不及遠矣因泣下墀伏地流涕後不復朝至大漸云始樞密使劉弘逸薛季稜宰相李瑀楊嗣復謀奉太子監國士良與弘志議更立瑀不從乃矯詔立潁王爲皇太弟士良以兵奉迎而太子還爲陳王初莊恪太子薨楊貴妃謀引安王不克武宗已立士良發其事勸帝除之以絕人言故王妃皆死士良遷驃騎大將軍封楚國公弘志韓國公實封戶三百俄而瑀嗣復罷去弘逸季稜誅矣帝明斷雖士良有援立功內實嫌之陽示尊寵李德裕得君士良愈恐會昌二年上尊號士良宣言宰相赦書減禁軍織糧芻菽以搖怨語兩軍曰審有是樓前可爭德裕以白帝命使者諭神策軍曰赦令自朕意宰相何豫爾渠敢是士乃帖然士良惶惑不自安明年進觀軍容使兼統左右軍以疾辭罷爲內侍監知省事固請老詔可尋卒賜揚州大都督士良之老中人舉送還第謝曰諸君善事天子能聽老夫語乎衆唯唯士良曰天子不可令閑暇暇必觀書見儒臣則又納諫智深慮遠減玩好省游幸吾屬恩且薄而權輕矣爲諸君計莫若殖財貨盛鷹馬日以毬獵聲色蠱其心極侈靡使悅不知息則必斥經術闕外事萬機在我恩澤權力欲焉往哉衆再拜士良殺二王一妃四宰相貪酷二十餘年亦有術自將恩禮不衰云死之明年有發其家藏兵數千物詔削官爵籍其家始士良弘志憤文宗與李訓謀屢欲廢帝崔慎由爲翰林學士直夜未半有中使召入至秘殿見士良等坐堂上帷帳周密謂慎由曰上不豫已久自卽位政令多荒闕皇太后有制更立嗣君學士當作詔慎由驚曰上高明之德在天下安可輕議慎由親族中表千人兄弟羣從且三百何可與覆族事雖死不承命士良等默然久乃啟後戶引至小殿帝在焉士良等歷階數帝過失帝俛首旣而士良指帝曰不爲學士不得更坐此乃送慎由出戒曰毋泄禍及爾宗慎由記其事藏箱枕間時人莫知將授以授其子墀故墀惡中官終討除之蓋禍原於士良弘志云

楊復光閩人也本喬氏有武力少養於內常侍楊玄价家頗以節誼自奮玄价奇之宣宗時玄价監鹽州

軍誣殺刺史劉臯臯有威名者世訟其冤稍遷左神策軍中尉譖去宰相楊收權寵震時復光有謀略累監諸鎮軍乾符初佐平盧節度使會元裕擊賊王仙芝敗之招討使宋威擊仙芝於江西復光在軍請判官吳彥宏約賊降仙芝遣將尙君長自縛如約威疾其功密請僖宗誅之故仙芝怨復引兵叛後天子寤威階禍罷之以兵與復光乃進禽徐唐莒王鐸爲招討復光仍監軍鐸之棄荆南也山南東道節度使劉巨容定其地以忠武別將宋浩領荆南泰寧將段彥謨佐之復光父嘗監忠武軍而浩已爲大將見復光少之不爲禮彥謨亦恥居浩下遂有隙復光曰胡不殺之彥謨引慄士擊殺浩復光以客常滋假留後而奏浩罪薦彥謨爲朗州刺史詔鄭紹業爲荆南節度使以復光監忠武軍屯鄧州遏賊右衝帝西幸召紹業見行在復光更引彥謨爲荆南節度使彥謨給行邊詣復光以黃金數百兩爲謝其後忠武周岌受賊命嘗夜宴召復光左右曰彼旣附賊必不利公不如毋行復光固往酒所語時事復光泣曰丈夫所感獨恩與義耳彼不顧恩義規利害何丈夫哉公奮匹夫封侯乃捐十八葉天子北面臣賊何恩義利害昧昧邪岌流涕曰吾力不足陽合而陰離之故召公計因持杯盟曰有如酒卽遣子守亮斬賊使于傳舍秦宗權據蔡州叛岌復光以忠武兵三千入見之宗權卽遣部將王淑持兵萬人從復光定荆襄師次鄧淑逗遛復光斬之并其軍爲八以鹿曇弘晉暉張造李師泰王建韓建等爲之將進攻南陽賊將朱温何勣逆戰大敗遂收鄧州追北藍橋會母喪班師俄起爲天下兵馬都監總諸軍與東面招討使王重榮并力定關中朱温守同州復光遣使鑄諭温以所部降方賊之疆重榮憂不知所出謂復光曰臣賊邪且負國拒戰邪則兵寡奈何復光曰李克用與我世共患難其爲人奮不顧身比數召未卽至者由太原道不通耳非忍禍者若諭上意彼宜必來重榮曰善白王鐸以詔使至太原克用兵乃出京師平以功加開府儀同三司同華制置使封弘農郡公賜號資忠輝武匡國平難功臣卒河中贈觀軍容使諡曰忠肅復光御下有恩軍中聞其死皆慟哭而麾下多立功者諸子爲將帥數十人守宗亦爲忠武節度使贊曰楚鄭公辛不敢讎君而忘父冤昭愍之世兩軍寵遇有厚薄而卒用存亮夷難功莫及者自古忠臣出於疏斥不用蓋多矣存亮豈通記書道理之人邪何其識君臣大誼明甚不尸大勞長權處外又愈賢矣與夫書龍蛇之詩者何其小哉

唐書卷二百七考證

宦者序內謁者監內給事各十○舊書內謁者監六人內給事八人

寺伯寺人各六○舊書寺伯二人寺人六人

楊思勗傳擢左監門衛將軍○舊書累遷右監門衛將軍

安南蠻渠梅叔鸞叛號黑帝○舊書作梅元成叛

馮璘南越王○本紀作馮仁智

高力士傳林昭隱○舊書作林招隱

朱光輝○舊書作朱文輝

程元振傳元振自三原衣婦衣私入京師○舊書作元振服縷麻于車中入京城

吐突承璀傳又詔內常侍劉國珍馬朝江分領易定幽滄等州糧料使○馬朝江舊書作馬江朝

